

## VASEGA MATUTUA 2021

### FAASOLOGA O MATAUPU

#### IANUARI:

31 O le Salamo (Pese) a Tavita      Salamo 18: 1 – 9  
(Aso Sa o Tupulaga)

#### FEPUARI:

7 Fafo o le Ana      Salamo 142<sup>o</sup> 1 – 7  
14 Valaauina      Luka 5: 1 – 11  
21 Fua mai lona lava tau      Salamo 1  
28 Luga o le Ala      Levitiko 26: 3–13

#### MATI:

7 Valaauina ma faaigoaina      Ioane 1: 35 – 42  
14 Peteru ma le tatalo      Galuega 3: 1 – 16  
21 Filifiliga      Kenese 39: 6 – 23  
28 Tatalaina o se auala fou      Salamo 118:1-2;19-29  
(Aso Sa o le Laupama)

#### APERILA:

4 O Molimau le leoa      Mareko 16: 1 – 8  
(Aso Sa o le Toetu)  
11 O le sao o le atamai i le foafoaga a le Atua  
Faataoto 8: 22 – 31  
18 I tuugamau      Mareko 5: 1 – 20  
25 O le atamai ofoofogia o le Atua      Mareko 6: 1 – 13

#### ME:

2 Tavita, Ionatana ma Saulo      1 Samuelu 18: 1 – 6  
9 Sili atu nai lo o upu ma tala      Tito 1: 1 – 10  
(Aso Sa o Tinā)  
16 **FONO TELE**  
23 Ua sua uma      Galuega 2: 1 – 21  
30 Faailoa lemea e te tu ai      2 Samuelu 21: 1 – 14

#### IUNI:

6 O le atamai o Iopu      Iopu 1: 6 – 22  
13 E faasolo pea ina malosi o le olaga      Iopu 14: 1 – 17  
20 Olaga sa'o i taimi o afa      Iopu 31: 1 – 15  
27 Ia iloa ua lata mai le taumafanafana      Luka 21: 29 – 31

#### IULAI:

4 O le tusi ta'iala mo le ola      Faataoto 1: 1 – 7  
11 Eleele o finauga      Mataio 13: 24 – 30  
18 O le ivi o o'u ivi      Kenese 2: 18 – 25  
25 Aagalofa ae le o le fasioti      Kenese 4: 1 – 16

#### AOKUSO:

1 E manaomia le fai o se malologa      Esoto 20: 8 – 11  
8 Pei se musika i ou taliga      2 Nofoaiga Tupu 5: 2, 11-14  
(Aso Sa o Tamā)  
15 O le a lau fuainumera?      Kenese 2: 1 – 4  
22 O fuainumera e soifua ai      Galuega 1: 15 – 26  
29 O meli taualoga      Fa'aaliga 1: 4 – 11

**SETEMA:**

5	Lē fiafia <b>(Aso Sa o le Talalelei)</b>	Kalatia 1: 1 – 10
12	Mafaufauga	Kalatia 4: 1 - 11
19	Taulaga o le seleselega	Teuteronome 26: 1 - 15
26	O le loto faafetai	Auega 3: 22 - 33

**OKETOPA:**

3	Faatoilalo le mata'ua	1 Samuelu 24: 1 - 7
10	<b>LOTU TAMAITI</b>	
17	Gaioiga	Mareko 9: 1 - 13
24	Fanua ma faiga fa'a'aimamago	Mareko 12: 1 - 12
31	Faapepepepe i luga o le afā	Esoto 19: 1- 6

**NOVEMA:**

7	Faaletonu mai le falevaai	Mika 7: 1- 7
14	Ia mafaufau i ou ala	Hakai 1
21	Malosi i le alofa	Sakaria 10: 1 – 12
28	Tamā na faavaeina	2 Samuelu 22: 29 – 37

**TESEMA:**

5	Sa fausia faatasi	Efeso 2:11 – 22
12	Filifilia mo se faamoemoe faapitoa	1 Peteru 2: 1 – 10
19	Taumasuasua le faatuatua	Luka 1: 26 – 38
26	Pule Aoao	Kenese 1: 26 – 30

**ASO SA:** 31 IANUARI 2021

**MATAUPU:** **O LE SALAMO (PESE) A TAVITA**  
**(David's Psalm)**

**SINI:** A'oa'o tamaiti ina ia latou iloa, le faamaoni o le lagona faafetai o Tavita i le Atua, o lo o fa'aalia i le pese.

**TUSI FAITAU:** Salamo 18: 1 – 9

### **FESOASOANI MO FAIAOGA:**

O le Salamo lenei a Tavita, o lana tatalo faafetai i le Atua, ona o le tele o lona alofa ia te ia; Ae o le tatalo o lagiina mai faa-pese, e malie i le faalogo, ona o le uiga lasi, ma le matagofie o le Alofa lavea'i o le Atua, i le tagata e faamaoni atu lona loto ia Ia, e pei o Tavita. Toetoe lava tutusa lelei le Salamo lenei, ma le tusiga o i ai i le II Samuelu 22: 1(ff); Ma e foliga mai sa tusia lenei Salamo ma usuina i le tauafiafi o le soifua o Tavita, taimi o lona toafilemu. O le Salamo a Tavita, e mafai foi ona tatou pepese ai, ma tatou lagonaina ai foi le agaga faane'ene'e a'e i le Atua; ona o galuega mamana, ma ana faamanuiaga e tele mo tatou ao gasolo le ola o tatou i ai nei.

O le malu o le puipuiga a le Atua ia Tavita, o ia faatusa ai le Atua i le amataga o lana pese; Muamua, "o le papa" e le mafai e se malosi o taumafai e faaleaga ia ona aveese! Lua, "o le olo," po o le nofoaga lea mo lona saogalemu e le mafai e le fili ona ia ae'a! Tolu, "O le talita," e tu i le va, e va a'i ia ma le o taumafai e faaleaga mai. Fa "O le nifo," o fai ma ona faaolataga, o le faailoga o le pule ma le malosi, Lima "O le olo maualuga," e sili mamao atu nai lo ona fili. O le tele ia o faigata sa fetaia'i ma Tavita; ae mai le toatele sa fia fasioti ia ia, e pei o Saulo; sa ia talitonu faamaoni lava e pei ona ia pese nei; e leai lava se isi na mafua ai ona faasaoina lona ola, "Na o le Atua lava." O lona mautinoa

lea, o faamanatu mai foi ia tatou; A manaomia le puipuiga malu, tatou o i le Atua.

O Kerupi o ta'ua i le f.10, o agelu po'o leoleo, latou te leoleo le ulufale po o le faitotoa, "O le mea se sili ona paia," e Afio ai le Alii (Esoto 26: 31 – 33), e pei foi ona taua i le "Laa'u o le Ola" i le Kenese 3: 24. O le Atua silisili ese, o le Alii e toatasi lava ia, e silisili i lo atua mamate o le lalolagi (f.13) O le f 16-19, o tautino ai lava e Tavita, o ia o le tagata vaivai ma le leai o sona fesoasoani, a'o le Atua e toatasi, o lona lavea'iina lava lea, mai ona fili uma. Ona taaofai ai lea o lea vaega o le Salamo po o le pese i le faapea mai o Tavita – "Ua finagalo alofa mai le Atua ia te au, ma ia lavea'iina o a'u.

Tupulaga o teine ma tama, o se fafagu taua tele lea mo tatou, ma tagata uma lava. Ia tatou iloa mautinoa le Alofa o le Atua ia tatou, ma ia tatou lagonaina le Alofa o le Atua ia tatou, ma ia tatou lagonaina moni ai le faafetai, ina ua tatou talitonu e leai se isi ua na o le Atua lava, lo tatou papa ma lo tatou malu i faigata o lenei ola. O Iesu foi, ua tatou ola uma ai faatasi ma le lalolagi agasala, ina ua na laveai mai tatou, e ala i le Taulaga faaola ua Ia saunia, e faamamā ai a tatou agasala.

### **Uiga o Upu ma Fuaitau:**

- i) kerupi (f.40) - o leoleo po o auuuna o le Atua/E taua foi o le agelu!
- ii) apitaga (f.11) - o le fale, po o le mea e nofo ai.
- iii) uato'a (f.12) - o le timu ua to'a po ua malo e pei o le aisa; ma lanu pa'epa'e.
- iv) iliti vai (f.15) - taele o le vai
- v) mapugatamai o ou fofoga (f 15) alaga mai o fofoga o le Atua/Fetalai mai o fofoga o le Atua/Manava mai o fofoga o le Atua.

**GALUEGA FAATINO:** (Taliga Fesili – Fa'aaoga lau Tusi Paia)

**Fesili ma Tali:**

- 1. O le a le isi upu, e sui ai le upu Salamo, e pei ona tatou masani ai?  
Tali: O le pese.
- 2. O ai ni tagata sa fia fasioti ia Tavita, e te manatu o uiga ia i lenei pese faafetai i le Atua? Ta'u mai se toatasi.  
Tali: Saulo/Apisalomia/Filisitua/Koliata
- 3. O le f.8, o ai lea e tautala i ai le matautia o le fuaiupu lea?  
Tali: O le Atua.
- 4. O le fuaiupu e fia, e te iloa ai, e lē pupu'u aao o le Atua/  
Tali: O le f.16
- 5. O a ni faamaoniga o le Alofa o le Atua ia Tavita o taua i le f.19?  
Tali: Faamaoniga o le Alofa o le Atua, ua le gata ina ia ave Tavita i le mea lautele, ae ua ia lavea'i foi ia ia.

**PESE:** (Pese ma Viiga 160) – “E lou Alii le Faaola e”

**A'OA'OGA:**

- 1. E faamaoni le alofa o le Atua.
- 2. O le Atua lo tatou malu i le ola nei.
- 3. Pese se pese malie i le Atua.  
\*(E ala i lou olaga)

.....

**ASO SA:** 7 FEPUARI 2021

**MATAUPU:** FAFO O LE ANA (Out of the cave)

**SINI:** A'oa'o tamaiti ia latou iloa, o fafo o le ana, e maua ai le malamalama o le Atua e mapu ai.

**TUSI FAITAU:** Salamo 142: 1 – 7

**FESOASOANI MO FAIAOGA:**

O le Salamo e 142, o lo o tauia mai i le Ulutala; “O le tatalo ina ua puapuagatia, ae o lo o fai i totonu o le Ana.” O le alaga, po o le aioi a Tavita i le Atua, e alofa mai ia ia, ma lona mafatiaga. O lo o ta'ua i le pese, sa matuā tagi lava Tavita i luma o le Atua, ma ta'u i ai lona puapuaga. O le tagi, o le faamaoniga lenā o le loto mafatia i le popole ma atuatuva'e, lea ua aliali mai i le loimata maligi. O lo o taua lava i le f.3; le lailoa o Tavita i totonu o ia lava, po'o lagona o lona lava tagata. O le moni o lona lagona mafatia, ma le talitonu o lona loto, na o le Atua lava le laveai mo ia, na silasila alofa ifo ai le Atua ma tali ane iā ia. Aua o le matautia ua oo ia Tavita, ua foliga mai so o se mea o la'a i ai ona vae, o i ai lava ma le matāsele a le fili e lamatia ai o ia. O le f.4; o lo o atagia mai ai vaaiga faigata o totonu o le ana o i ai Tavita. Ua fiu e autilo solo, na te leiloa se tagata ona o le pogisa tele; ae mautinoa foi, e leai se isi o ia iloa maia o ia, sei alofa mai, ma laveai mai iā ia. O lo'o tautino lava e Tavita, o le Atua e toatasi e ola ai, na o Ia foi lona malu e faamoemoe i ai; auā ua avea le ana pogisa ma falepuipui ia te ia; O lo o tatalo ai ma le naunau i le fia sau i fafo, sei vivii ae ma faamanu i le suafa o le Atua. A taunuu lona manao pe a tusa i le alofa o le Atua, ona latou vivii a'e faatasi lea ma le amiotonu, ma ola i le malamalama i fafo o le ana. O totonu o ia faigata, o i ai lava le faamoemoe mautinoa o Tavita i le Atua, auā e leai lava se isi malosi na te mafaia, ua na o le Atua lava. O lona sau i fafo, ua i ai i le malamalama, o le faailoga o le

Atua Soifua ua na laveai ia, ma ola ai. Tupulaga, a fetaiai ma faigata matuitui o le ola nei, e leai lava se isi malosi, ua na o le Atua, o ataata mai pea lona alofa laveai mo tatou. O le malamalama tatou te savavali ai ma le mautinoa, e ala i le faatuatua ia te Ia. O Iesu foi le Alofa sili o le Atua, sa masoe lava, ina ia ola le lalolagi puapuagatia i le agasala.

**Uiga o Upu ma Fuaitau:**

i) alofagā (f.4) - lavea'iina/se mea e sao ai.

**GALUEGA FAATINO:** (Taliga Fesili – Fa’aaoga lauTusi Paia)

1. O le a le falepuipui lea e loka ai Tavita?  
Tali: O le ana
2. Na faafefea ona silafia e le Atua le loto o Tavita, e pei ona taua i le f.3?  
Tali: O le Atua e ati lana silafaga i loto o tagata, sa ia silafia le loto momomo moni o Tavita, ma lona fia ola.
3. Na malō Tavita i lana tauiviga pe leai?  
Tali: Na malō.
4. O le fuaiupu e fia e tusa o lau faitau, e iloa ai o le ana pogisa lea e i ai Tavita?  
Tali: O le f.4 (Ua fiu e autilo solo, na te leiloa se isi, ae leai foi se isi o ia iloa Tavita.
5. O le a tonu lava le ugia o le f.7? E le mafai e Tavita ona vivii mai totonu o le falepuipui, po o le a le uiga?  
Tali: A alu Tavita i fafo o le ana, po o le falepuipui ma le saogalemu, o le faailoga ua ola ma ua tali atu le Atua i ana tatalo, ma le o le a le utu ai foi lona vivii i lona Suafa.

**PESE:** 231 “Ia tiai ia le fefe”

**A’OA’OGA:**

1. E tali mai le Atua i lau tatalo
2. O le Atua lo tatou laveai
3. O le ana pogisa o le ata o leoti.

.....

**ASO SA:** 14 FEPUARI 2021

**MATAUPU:** VALAAUINA (Called)

**SINI** A’oa’o tamaiti ia latou iloa, le taua o le ususitai i le Atua i so o se valaaaina.

**TUSI FAITAU:** Luka 5: 1 – 11

**FESOASOANI MO FAIAOGA:**

E i ai le talitonuga, e le o le taimi muamua lenei ua tatou faitau ai i lenei tala. Ae o le taua foi o lo tatou faitau so’o ai, e le gata ina tatou taofia gofie ai le tala, a’o le tele o feau faa-mataupu silisili foi o iloa mai ai, e pei o le usitai; O le mana fa’aalia o Iesu; o le mulimuli ma le talitonu, ma isi. O le mataupu foi la o lenei taeao, o le tasi foi lea feau o aumai ai i lenei lava tala; “O le valaaaina.” O lea lava ua tatou iloa i le tala, o le valaaaina o Simona Peteru, atoa foi ma Iakopo ma Ioane, o le fanau a Sepetaio. O tagata fagogota uma i latou nei, o tautai o le sami Kalilaia, po o le vai lava lea o Kenesareta o ta’ua i le tala. E foliga foi o le po lava lo latou taimi e masani ona fagogota ai, pe a fua i le tali a Peteru; “Ua atoa le po o tigaina ai latou, a’e leai se ia.” E tele le avanoa e le usitaia ai e i latou nei, le valaaaina o latou e Iesu. Peitai, o lea lava ua fa’aaoga e Iesu la latou galuega o fiasia i ai, “O le fagogota,” ma le taimi ua muta ai lo latou iloa ma le mafai i la latou taleni; e toe faau ai lo latou valaaaina, ina ia avea i latou ma so’o o Iesu. O lea ua latou talia le valaaaina o i latou, ae o lo

latou taliaina, o faavae mai lo latou usiusitai, ma le talitonu. Auā e ui ina o latou tautai o le ogasami lea, ae ua tuu lava lo latou iloa, ae faalogo ma fai le faatonuga o fai atu ai Iesu. Lea la ua tele i'a o le faiva ua maua, i se ata matautia o le masaesae o le upega, ma le tau sue o nisi e lau'a le faiva i uta. O le faailoga lea ua lagona ai foi e Simona Peteru lona faatauvaa, ma le silisili o le Alii e ou le galuega. Ona auauna ai lea i le alofa, e ala i le talitonu ma faatuatua.

Tupulaga o teine ma tama talavou, o le feau lea mo tatou uma. O le a le galuega o valaauina i ai oe e le Atua, po o le aoga foi i lenei taimi, o le usitai ma le talitonu faamaoni i le Atua e ou le valaau, e tua i le manuia ma le faaeaina. A'e aveā foi oe ma fa'aa'oa'o lelei, i isi foi tupulaga o teine ma tama. O Iesu Keriso ma le Taulaga Faaola ua la faia mo le lalolagi, o le valaau mo tagata uma e talia ma faatuatua i ai, e ola ai.

**Uiga o Upu ma Fuaitau:**

- i) fetuleni (f.1) - mumu mai;/lolofi mai/tumutumu mai
- ii) talana'i (.2) - tu'u ai/tau ai
- iii) tali gogoto (f.7) - toetoe lava gogoto/toeitiiti gogoto
- iv) tuta (f.11) - toso/tu'u

**GALUEGA FAATINO:** Taliga Feili – Fa'aaoga lau tusi Paia0

- 1. O fea o i ai Iesu, a'o fea foi o i ai tagata, i le taimi o lana a'oa'oga ia i latou?  
Tali: O Iesu sa i luga o le vaa o Peteru, a'o tagata sa laupae pe sa tutu atu i le matafaga.
- 2. Na faapefea ona valaau e Iesu Peteru e fai ma ona so'o?  
Tali: Sa faatonu e Iesu, o lo o i ai i le f.4. O le usitai la o Peteru i le faatonuga a Iesu, e pei ona tali mai i le f.5. O iina o iloa ai, ua na talia lona valaauina e Iesu.

3. E toa fia le aofai o tagata fai faiva o ta'ua i le tala?

Tali: E toatele, ae le o iloa i le tala se aofaiga.

4. O le f. 11, o ai i latou ia e faatatau i ai le fuaiupu lea?

Tali: Simona Peeru, Iakopo ma Ioane le fanau a Sepetaio.

5. O le a le uiga o upu ia a Iesu o i ai i le f.10? “Aua e te fefe, e amata i nei ona po ona e maua tagata.”

Tali: O lea ua talia e Peteru le valaau, o lea la o le a sui lana galuega, ua le toe alu e sue mai ni i'a, ae o le a alu e su'e mai tagata mo le malo o le Atua. O lona talitonu ia Iesu, o lona mafai lava lea ona maua tagata mo lona Malo.

**PESE:** 152 “Iesu e malie loto”

**A'OA'OGA:**

- 1. Talia le valaau mai o le Alii.
- 2. Usitai i le mea e manuia ai.
- 3. Tu'utu'u i le loloto le upega.

.....

**ASO SA:** 21 FEPUARI 2021

**MATAUPU:** FUA MAI I LONA LAVA TAU  
(Fruit in its season)

**SINI:** Ia malamalama le vasega, o le fua mai i lona lava tau, o le faamoemoe ua taunuu o le faifaatoaga, na naunau i ai o lea ua fua mai i le tau o le seleselega. Ua faatusa foi i ai le tagata e mata'u, ma fialia e ola i Afioga a le Atua.

**TUSI FAITAU:** Salamo 1

## **FESOASOANI MO FAIAOGA:**

O le Salamo lenei, o faatonuga e faatatau i le lelei ma le leaga, ua faataoto mai ai i o tatou luma, le ola ma le oti, o faamanuiaga ma le malaia, e tatou te filifili ai i le ala sa'o ma le tonu, e ta'ita'ia i tatou i le fiafia moni, e faasaoina mai i tatou mai le ola faaleaogaina ma le ola lafoa'iina.

O le Salamo, ua vaevaeina e le Faisalamo ituaiga o fanau a tagata i vaega se lua. O tagata ua ola matata'u i le Atua, ma le fanau a tagata ua ola fiafia i le agasala. O tagata ua matata'u i le Atua, latou te filifili faatasi ma le Atua. O le ola ua faalagolago ma faamoemoe ma faatuatua i le Atua. Ua latou maua le amuia mai le Atua, auā ua finagalo malie mai o Ia, ina ua fia inu ma fia aai pea o latou agaga i le Agaga o le Atua. E tusi i papa aano o latou loto Afioga ma tulafono a le Alii ma ola ai i aso uma.

O le fanau a tagata, ua latou inoino i amioga ma manatunatuga o tagata amio leaga, e le fia tutu foi i ala e savavali ai i latou e fiafia le faatinoga o le tuinanauga o le agasala. E le fia nonofo faatasi ma i latou e tauemu ma tausuai, ae fiafia le loto e sailiili i Afioga ma tulafono a le Atua, ina ia mauaa ia te i latou le finagalo o le Atua e tatau mo lo latou ola. E manatu loloto i taimi uma, ina ia latou iloa le ala tonu e ola ai i aso uma, ina ia fai i latou ma tagata e fiafia mai ai le Atua. E pei ona fai mai le Faataoto 8: 31, "Sa ou olioli i mea e mau ai tagata i lona lalolagi, o lo'u fiafia foi, sa i le fanau a tagata lea. O le fanau a tagata nei, ua a'oa'o i tulafono a le Atua, ma ua naunau i ai e ola ai i aso uma, ua ta'ua o tagata ua matata'u i le Atua. Ua latou maua le potu, ua maua le ola, e maua foi e i latou le alofa mai le Atua. O le amuia lea mai le Atua, e maua e le fanau a tagata ua ola matata'u i le Atua.

O le uiga o le amuia o le manuia o le Atua. O i latou nei ua fai mai le Faisalamo, ua tusa ma le laau ua toto i tafatafa ane o le vaitafe, e fua mai i lona lava tau. E le mafai foi e se mea na faia, po o mea malolosi o le lalolagi ona faaleagaina, pe gauia ona lala, ma toulu ona lau. E tumau pea lona ola lausiusi ma lona lanu lauava, ma fua pea lava pea i ona lava tau ma fua atili ai lava.

A o le fanau a tagata ua latou lafoa'i le Atua, e le faapena i latou o e ua tuinanau i le agasala ma naunau o latou loto i manaoga o le lalolagi. Ua latou saili le tamaoiga o le lalolagi, ua naunau tulaga taualoa, ua faamoemoe i latou lava malosi ma le potu. Ua leai se alofa i e ua manaomia le fesoasoani, a ua latou fa'aaoga le malosi ae vaivai ma matitiva e saili ai o latou manuia. Ua faatusa i latou e le Faisalamo, o aputi o le saito, a oo ina agi mai le matagi ona lelea lea e le toe maua mai ma tuufaatasia. E le mafai ona tutu mai, e pei ona tutu mai o e matata'u ma amiotonu i luma o le faamasinoga a le Atua, e le mafai foi ona tutu o tagata ua tuinanau i le agasala, i le faapotopotoga o e amiotonu.

Aua ua silafia lava e le Atua loto ma agaga o tagata amiotonu, ae o tagata amio leaga ma tagata agasala e faaumatia ma lafoa'iina ma oo atu i le faafanoga. E leai se amuia a le Atua latou te maua, a o le ola e faaumatia.

O le Amuia lea e tautala ai le Faisalamo i le Salamo muamua lenei, e tutusa lelei ma le lauga fa'aamua a Iesu i luga o le mauga, e pei ona faamauiina i le Mataio 5: 3 – 12. O Amuia lava ia e maua e tagata e matata'u i le Atua, ma e taua foi o tagata popoto auā ua latou maua le ola fiafia i tulafono, ma ala o le Alii, ua latou maua foi le alofa mai le Atua. O le feau lea o le tatou mataupu i lenei Aso Sa.

Ia fai i tatou ma fanau e matata'u i le Atua. Ia lafoa'i le amio leaga a le lalolagi, a ia tatou ola i le ola o ia Iesu Keriso lo tatou Faaola. Ia pei lo tatou ola, o le laau ua toto i le tafatafa o vaitafe, ua fua tau fufui mai i lona lava tau, e lausiusi mai ona lau e le mafai foi ona toulu.

Ia mafaufau loloto i le alofa faamaoni o Iesu ia i tatou. Ua Afio mai i le lalolagi i lona itu tagata ina ia faailoa mai le ola e tatau ona tatou ola ai. Na maliu tiga i le satauro, o lona alofa ia faamagaloina i tatou i lona toto. O lona toetu mamalu ua aumai le ola fou atili faavavau mo i tatou.

## **Uiga o Upu ma Fuaitau:**

i) amuia - manuia mai le Atua

- ii) tauemu - amuamu
- iii) aputi o saito - tutusa ma le aputi o le ulu
- iv) fano - faaumatia

***GALUEGA FAATINO:***

Ta’u mai ituaiga tagata e 3, o lo o lapata’i mai ai le Salamo ia tatou o ese ai, ma a latou faatinoga.

1. Ia le savali i le filifiliga a e amio leaga.
2. E le tu foi o ia i le ala o e agasala.
3. E le nofo foi o ia i le nofoa o e tauemu.

***PESE:*** Pese ma Viiga 380 (Ia fai ma sulu)

***A’OA’OGA:***

1. Ia manatunatu loloto i tulafono a le Atua.
2. Ia ola e pei se laau e toto i tafatafa o vaitafe.
3. Ia fai ma sulu e mumu i lau amio.

.....

***ASO SA:*** 28 *FEPUARI 2021*

***MATAUPU:*** *LUGA O LE ALA (On the way)*

***SINI:*** Ia malamalama le vasega e taua lo tatou savavali faatasi ma le Atua i ona ala.

***TUSI FAITAU:*** Levitiko 26: 3 – 13

***FESOASOANI MO FAIAOGA:***

O le vaega o le mataupu 26 o le tusi a Levitiko 3 – 13, o lo o matua toe faamanatu ai e Mose ia Isaraelu le taua o le tapuaiga i le

Atua, ina ia mauaa i o latou loto le Atua soifua, ua na o Ia lava le Atua e tapuai i ai. Ua toe faailoa ma faamamafa ia Isaraelu, le tulafono e lua ma le tulafono e fa. O tulafono nei e lua, ua lapataia ai tagata o le nuu o le Atua. O le tulafono e lua, ia ‘aia nei fai mo i latou ni atua ‘ese i luma o le silafaga a le Atua. Ia ‘aia foi nei fai mo i latou ni tupua ua ta, po o se faatusa lava o mea o i le lagi i luga, po o i le fanua i le lalolagi, po o i le sami i le lalolagi, ia aua ne’i outou auauna i ai.

O le tulafono e fa; “Ia manatua le aso sapatu e te faapaiaina. O aso e ono tou te galulue ai, ma fai ai a outou galuega uma lava, a o le aso fitu o le Sapatu lea i le Alii lou Atua, aua tou te fai ai se galuega e tasi, o outou ma outou fanau ma auauna uma, ma manu foi ma tagata ese o mau ma outou. Aua na faia ai e le Atua lana foafoaga aoao i aso e ono, ona malolo ai lea o ia i le aso fitu o le sapatu lea. O le mea foi lea na faamanuia ai e le Atua le aso sapatu ma ia faapaiaina.

Ua fetalai atu le Atua ia Mose ina ia toe faamanatu ma toe faailoa atu ia Isaraelu, la latou faamuamua e ave i lo latou Atua. Ia totoina i papa aano o latou loto foliga vaaia o le alofa tunoa o le Atua ua ia filifilia ai i latou e fai ma ona nuu. Ia na o le Atua Soifua lava e ifo ma tapuai i ai. Aua, ua na o le tagata soifua lava, o mea uma na faia, e soso’o ma fiafia le Atua e mafuta i ai.

Aua o le nuu o Kanana ua folafola mai mo i latou e fai ma tofi, o lo o nofoia e tagata e tapuai i atua faapaupau, ma tupua ua taina ma mamauina e tufuga popoto, ma ua fai mo latou atua.

Ua fai mo latou atua, lo latou poto ma lo latou tamaoiga, ua latou ifo foi ma tapuai i ai, i fetu ma le masina, ma isi mea o i le lalolagi. Ua avatu foi, ia i latou le poloaiga, afai e taunuu i le nuu filifilia e fai mo latou tofi, ia matua tafi esea tagata uma, ma faaumatia i lalo o latou fata faitaulaga, o lo o faatino ai tapuaiga faapaupau. O tulafono e lua ma le fa e faatatau i le ola tapuai o le nuu o Isaraelu. Ia ua’i ma maua’ a i loto o tagata le ola tapuai o tagata i le Atua Soifua. O le Atua o le punavai o le ola, o lo o ola ai mea uma.

O le ala lea ua faataoto mai e le Atua, mo tagata o lona nuu o Isaraelu e savavali ai. Afai e faalogo, usitai, ma ola ai i aso uma,



ona faamaligi mai ai lea e le Atua o manuia mo i latou. Ua fetalai mai le Atua, ou te avatu le ua i lo outou laueleele, e fua mai foi i ona lava fua, o laau foi o le fanua e fua mai ai i o latou fua, e tamaoaiga le laueleele, e leai se mea e mativa ai. Ou te avatu le filemu i le nuu, e le popole i se tagata e faamataui mai, auā o le Atua o le Leoleo mo i latou. E latou te faatoilalo o latou fili uma, ma nonofo filemu i le nuu ua fai mo latou tofi. E savavali faatasi ma le Atua i luga o le ala, auā ua finagalo malie le Atua ia i latou, ua matata'u ia te Ia. Ua latou maua le poto, o le mea lea ua maua ai e i latou le ola, maua foi le alofa mai ia te Ia. E feafio ai foi le Atua i totonu ia i latou ma lo latou laueleele, e pei ona fealualua'i o le faifaatoaga i totonu o lana faatoaga.

O le finagalo alofa lava o le Atua i lana fanau i le lalolagi, ina ia lē toe faaumatia i latou, e pei ona Ia faaumatia ai tagata o le lalolagi i le taimi o Noa. Ua ia folafola ai, e le toe oo mai se malaia faapea i le lalolagi. Ua ia aumai ai ana tulafono ma ana Afioga Paia, e faalogo ma usitai i ai tagata uma, ma ola ai, ina ia latou maua manuia mai ia te Ia.

O luga o le ala lea ua faataoto mai e le Atua mo lona nuu o Isaraelu, e savavali ai faatasi ma Ia e taunuu atu i ona manuia faavavau. O luga o le ala lava lea e tasi, ua valaauina ai tagata uma o le lalolagi, e savavali faatasi ai ma le Atua, ina ia ausia ona manuia atali. O i latou ua latou le savavali i luga o le ala lea o le ola lava lea ua faaumatia.

O lea lava na toe Afio mai lava le Atua e ala i lona liutino tagata ia Iesu Keriso lona Alo e toatasi a o le Alii ma lo tatou Faaola, ina ia mautinoa lo tatou savavali faatasi ma Ia i luga o le ala e tau atu i le ola e faavavau. E pei ona Ia fetalai mai ai i le Ioane 14: 6 “*O au nei le Ala ma le Upu Moni ma leola, e le alu atu lava se tasi i le Tamā pe a le ui mai ia te A'u.*”

Le fanau e, e taua tele le faalogo ma usitai i Afioga a le Atua, ma tatou ola ai i aso uma, e mautinoa lava le faatasi mai o le Atua, e taitai ma faamalosiā mai, ina ia tatou taunuu atu i lona afioaga faavavau. Ia manuia le Aso Sa.

## Uiga o Upu ma Fuaitau:

- i) ua - o le timu
- ii) taugavine ma le selegasaito - o aso o le seleselega

## ***GALUEGA FAATINO:***

Tau mai ni faamanuiaga se lima e maua e Isaraelu pe afai e savavali faatasi ma le Atua i luga o le ala.

1. Avatu ia Isaraelu le ua mo le laueleele
2. E fua mai le laueleele i ona lava fua
3. Laau foi o le fanua e fua mai i o latou fua.
4. E avatu le filemu i le nuu.
5. E fealua'i foi le Atua i totonu ia te i latou.

***PESE:*** Pese ma Viiga 182

## ***A'OA'OGA:***

1. Ia tausi le sapatu a le Atua.
2. Aua le ifo i se tupua ua ta.
3. Ia savavali i luga o le ala ma le Alii.

.....

***ASO SA:*** 7 ***MATI 2021***

***MATAUPU:*** ***VALAAUINA MA FAAIGOAINA***  
***(Calling and Naming)***

***SINI:*** Ia malamalama le vasega, o le valaauina ma faaigoaina o se tagata e lē ona le feau, e ta'u mai lava e lona valaauina ma le igoa e faaigoaina ai o ia, le uiga moni o le galuega e na te faatinoina.

**TUSI FAITAU:** Ioane 1: 35 – 42

***FESOASOANI MO FAIAOGA:***

O le tatou tusi faitau Ioane 1: 35 – 42, o lo o faamatala mai ai e le tusitala o le Evagelia a Ioane, le amataga o le valaauina e Iesu o ona so’o, latou te galulue faatasi, e aveesea le agasala mai tagata o le lalolagi.

I le aganuu faasamoa, a oo ina valaauina se tagata e fai ma matai sa’o o le aiga, e vaavaai tagata o le aiga i lona olaga tautua, ma ona agavaa e i ai, e mafai ai ona ia tausii mea sina a le aiga, ma ia ola manuia tagata. O lona valaauina e fai ma matai sa’o, e faaigoaina ai foi o ia i le suafa matai sa’o o le aiga, e le toe valaauina i lona igoa na faaigoa ai e ona matua. E ta’u mai lava e le suafa sa’o ua faaigoaina ai le aano moni o lona valaauina.

E tai foliga faapea le uiga o le tatou mataupu o lenei Aso Sa – “Valaauina ma Faaigoaina.” O Aneterea ma le isi so’o, e le o taua e le tusitala o le Evagelia a Ioane le igoa, ae i ai le manatu o le au su’esu’e o le Tusi Paia, o le so’o lea, o Ioane lava le tusitala.

O i la’ua nei sa i ai i le papatisoina o Iesu, ina ua foi mai Iesu ina ua uma ona faaososoina e le tiapolo. Ua vaai atu Ioane le papatiso ia Iesu i le taeao, Ioane 1: 29 “Faauta i le Tama’i Mamoe a le Atua, na te aveese le agasala a le lalolagi.”

Fai mai le Ioane 1: 35. O le taeao na soso’o ai sa toe tu ai Ioane le papatiso ma nisi ona soo e toalua, ua ia vaai foi ia Iesu o savali ane, ona faapea atu lea o ia, “Faauta i le Tamai Mamoe a le Atua.”

O upu ia a Ioane le papatiso, ua faalua ona faalogo i ai le au so’o e toalua, na afua ai ona mulimuli ia Iesu. O uluai fua ia o le galuega teuteu ala a Ioane le papatiso. Ua silafia e Iesu o lo o mulimuli mai i laua, ona faliu ai lea o Ia i tua, ma fetalai atu, Se a ea la oulua feau? Ae sau le tali, o le fesili foi, Rapi e, o lona uiga le a’oa’o, o fea e te mau ai? O le fesili a tagata o loo fia maua se mafutaga ma Iesu, e le taua po o le a le ituiga nofoaga e mau ai Iesu, pau lava le mea ia maua se avanoa e sului ai laua i le malamalama o le Atua ua Afio mai i le lalolagi, e na te aveesea le agasala a le lalolagi. Ia aveesea a la agasala, ma ofo atu o la ola

mo le galuega faaola a le Atua. O le mafutaga lenei a Iesu ma so’o e toalua o Ioane le papatiso, ua maua ai le iloa ma le malamalama e faatatau ia Iesu o le Mesia o lo o faatalitali i ai Isaraelu mo lo latou Faaolaina. Ua tele lo laua fiafia ma le olioli, ina ua la maua le Mesia, e pei ona faatalitali i ai Isaraelu uma, ua atili ona maua le mautinoa ina ua la maua le faamaoniga o upu a Ioane le papatiso na tautala ai.

O le faailoga o le la olioli, ua alu atu ai Aneterea ma saili loa Simona lona uso ina ia ta’u atu i ai le Tala Lelei i le Mesia, auā o ia foi na faalogologo i le tala a Ioane le papatiso. Ua maua Simona e Aneterea lona uso, ua logo atu i ai le tala fiafia, ua la maua ma le isi so’o le Mesia. Ua aumaia i lea lava taimi o Aneterea lona uso Simona ia Iesu.

Ua silasila atu Iesu ia te ia, ona fetalai atu lea o Iesu, o Simona oe, o le atalii o Iona. O le mea lea na faateia ai Simona, ona e le masani ma Iesu, a o le taimi muamua foi lea ua la faafesagai ai, a o lea e na te silafia lona igoa ma lona tamā. O le faailoga ofoofogia lea ua iloa e Simona ia Iesu, ma aumai ai le mautinoa o Iesu o le Tamai Mamoe a le Atua.

O le manaia ia o le igoa o Simona, auā o lona uiga o le usitai, a o le uiga o le igoa o lona tamā o le lupe, i se isi faaupuga, o le usitai ma le filemu e pei o le lupe o agaga o tagata, e agavaa e fai ma so’o o Iesu. A ua faaigoaina e Iesu lava ia, Simona ia Kefa, o lona uiga o Peteru. I le tatou gagana o Peteru o lona uiga o le ma’a. O le valaauina e Iesu o Simona Peteru i lana galuega o le aveesea o le agasala a le lalolagi. O lona faaigoaina o Peteru, o le pine faamau lena o lona faatuatua i le Atua, e le mafai ona maluelueina. O le ma’a foi e fetogia’i solo e tagata, e faapena foi ona fetogia’i solo e puapuaga ma mea faigata o le faatinoga o le aveesea o le agasala a le lalolagi.

O Iesu Keriso, o le Ma’a Tulimanu, a o Peteru o le ma’a e soso’o ma le ma’a tulimanu. Ua silafia e Iesu le uiga lelei o Peteru, e ia ia te ia le loto, e manatu loa e fai se mea fai loa, e aunoa ma le solomuli. O lona loto e malosii ma e maa’a, e leai se faavaivai. Ua malamalama lelei lava Peteru i lona valaauina e Iesu i lana galuega faaso’o, ma o lona faaigoaina ia Peteru, e fai ma

taulogologo lelei mo ia i le Tala Lelei o le faaolataga a le Atua. A oo mai taimi e sau ai le faavaivai ona manatua lea o le uiga ma le mafuaaga o le igoa ua faaigoaina ai.

O le a'oa'oga foi lea o le tatou mataupu o lenei Aso Sa. Ua valaauina ma faaigoaina i tatou e matua. E tasi moemoe lava le manatu o matua, ia ola ae fanau i le faalogo ma usitai i a'oa'oga ma faatonuga mo lo latou lelei. Ia maua ni lumanai manuia o fanau. A oo ina outou matutua, ia outou manatua lo outou valaauina e o outou matua, ina ia mafai ona faaigoaina outou o fanau amio pulea, fanau e ola faapaiaina o fanau e matatau i le Atua, ma ni fanau e tausaaafia e tagata. Ua valaauina i tatou e Iesu i le amio lelei, ina ia faaigoaina i tatou o fanau a le Atua ua ola i le malamalama o Kersio.

O Iesu Keriso, o lona valaauina ma lona faaigoaina na matilatila mai lava i luga o le satauro, o Ia o le Faaola o le lalolagi uma, o lona toetu mamalu, ua faaigoaina ai o Ia i le suafa e silisili i suafa uma lava. Ia manuia le sapatu.

### ***GALUEGA FAATINO:***

Tusi mai sau tala pu'upu'u i lou valaauina ma le faaigoaina o oe i lou igoa ua e igoa ai, e ou matua.

***PESE:*** Pese ma Viiga 125

### ***A'OA'OGA:***

1. Valaauina ma faaigoaina e mai le Agaga o le Atua.
2. Ia fa'aaoga lou valaauina ma faaigoaina, ia fai ma faaola i si tagata.
3. Valaauina ma le faaigoaina e ta'u aoga ai lou ola.

.....

***ASO SA:*** ***14 MATI 2021***

***MATAUPU:*** ***PETERU MA LE TATALO***  
***(Peter and prayer)***

***SINI:*** Ia malamalama le vasega, o le tatalo, o le auala na faatinoina e Peteru mo le galuega a le Alii.

***TUSI FAITAU:*** Galuega 3:1-16

### ***FESOASOANI MO FAIAOGA:***

O le tupu ma le ola o le ulua'i Ekalesia i le taimi o le tala faasolopito (history), e talitonu le au faatuatua ma tagata ua faa-Kerisianoina, o le galuega e lē mafaia e se malosi o se tagata, ua na o le Agaga o le Atua. O le Agaga Paia na afio ifo i loto ma agaga o tagata, ma faama'ite se olaga fou i tagata e ala i le talia ma le talitonu i le Talalelei ia Iesu Keriso.

O Peteru, o ia lava lea sa tausolomua faatasi ma nisi o le au uso, o e sa fai ma molimau i le galuega a le Alii o Iesu, a'o i ai faatasi ma i latou. O le tatalo, o le a'upega silisili lea ona tãua ma aoga, sa fa'aaogaina e i latou ia, mo le galuega o le faasalalauina atu lea o le Talalelei ina ia soo ai le lalolagi. Auã o le tatalo, o le fesoota'i atu lea o le tagata i le Atua, ina ia fesoasoani mai ma alofa mai, e manuia ai ona ala i lea aso ma lea aso.

O le mataupu o lenei aso Sa, o le tala ia Peteru ma Ioane na aga'i atu i le malumalu o le Matagofie i Ierusalem e tatalo, ae iloa ane e le pipili o lo o nofonofu i le faitoto'a o le malumalu, ma faatoga atu mo se meaalofa, e pei o lana masani.

O lo o manino le tala na faitauina, o le oo ane o Peteru ma Ioane i le malumalu i le tolu i le afiafi, ona o le itula e fai le tatalo. O lona uiga, o Peteru ma Ioane, o tagata e fiafia e tatalo. O le aiaoi ma le ta'u atu i le Atua o le mana'oga, e ala i le tatalo. Aemaise lava la i le taimi lea, a'o vevela le tauamaatina o le ulua'i Ekalesia i lona

faasalalauina, e pei ona gapatia ai le au Aposetolo, ta'ita'iina e Peteru i lea vaiatau.

O le augani ma le valaau atu a le pipili ia Peteru ma Ioane mo se meaalofo, o le tatalo a le tagata ma'i, e fia maua se mea e ola ai. O le natura lava lea ia o nai tagata mama'i, o e ua lē ato'atoa lo latou malosi i le tino ma le mafaufau, ma i ai mana'oga faapitoa . O le aisi ma le faatauanauiina o ni meaalofo faapei o tupe ma meaai, latou te faaauauina ai le ola. E mafai foi la ona faamatalaina le augani ma le faatoga a le ma'i pipili, o le tatalo. E ui lava ina inosia e nisi o tagata ma le faatigā taliga i tagata e ulu atu i le malumalu, a'o le mea ua mautinoa, o le faatoga mo se fesoasoani, o le tatalo mo le fia ola, e pei o lona naunau ia Peteru ma Ioane.

***“E leai sa'u ario po o sa'u auro; a o le mea ua ia te a'u, ou te avatu lea ia te oe; o le suafa o Iesu Keriso le Nasareta, ou te fai atu ai, ina savali ia”*** o le tatalo lena a Peteru. O le faamalologa ma le galuega alofa ua ofoina mo le tagata pipili, o le isi lea faatinoga o le tatalo, a le tagata ua ia te ia le Agaga o le Atua.

Na malolo le ma'i pipili, ona ulufale faatasi loa lea ma Peteru ma Ioane i le malumalu. O le faailoga o le tagata ua fia tatalo i le malumalu, ae sa lē mafai ona e pipili. E le gata i lea, ae ua faasa'o e Peteru i le pipili, e aua ne'i toe tatalo i tagata i fafo o le malumalu, ae tatalo sa'o i le Atua o le ola, i totonu o le malumalu. E lē faapea ua na o le malumalu e mafai ai ona tatalo. E mafai lava ona tatalo i so o se nofoaga ma so o se mea. Peita'i o le faata'ita'iga ua faia, ina ia fiafia e ulu i le fale tatalo poo le malumalu, faatoga i le Atua, ma faanonomanū mo le ola manuia i aso uma. O le mea ua faia e Peteru ma Ioane i le tagata ma'i pipili, o le faasalalauina lava lea o le Talalelei mo le pipili, ae faapea foi mo tagata uma.

O le ofo ai o tagata i le toe savali o le pipili, o le faailoga o le soifua pogisa i le mana o le Alii Faaola na tuuina i le au so'o, latou te faatino ai le galuega o le Talalelei faasalalauina atu.

***GALUEGA FAATINO:*** FONO TATALO  
(PRAYER MEETING)

O le upu moni lava, e eseese tagata ma o latou mana'oga, e eseese foi ma faafitauli. O le tāua lea o le Fono tatalo, ina ia faasoa i le Atua ou faafitauli ma ta'u i le Atua ou mana'oga. E le gata foi i lea, e ese foi le tāua o le tatalo o le isi mo le isi.

1. Ia faalapopototo le vasega, ma faia se Fono Tatalo.
2. Ia faasoa i le Atua mea o loo moomia mo le ola.

***PESE:*** O outou e fia sao (122 Pese ma Viiga)

***A'OA'OGA:***

1. Ia fiafia e tatalo i aso uma i le Alii, e manuia ai.
2. O le tatalo, o le fesoata'iga i le va o le tagata ma le Atua.

.....

***ASO SA:*** 21 MATI 2021

***MATAUPU:*** FILIFILIGA (Choices)

***SINI:*** Ia malamalama le vasega, na sa'o le filifiliga na faia e Iosefa.

***TUSI FAITAU:*** Kenese 39:6-23

***FESOASOANI MO FAIAOGA:***

O le filifiliga, e tauluga e le loto o le tagata lona faataunuaina. Auā po o le a lava le tosina o mata, manogi manaia i le sogisogi o le isu, mālie i le faalogo o taliga, suamalie i le tofo o le laulaufaiva, ae a lē mana'o i ai le loto, e faaleaogaina lava.

O le filifiliga foi, e na o le lua a vaega e filifili i ai. A lē o le lelei, o le leaga. A lē o le ioe foi, o lona uiga o le leai. Ia po o le oti foi po o le ola.

O le tala o lenei aso Sa, o loo atagia ai le faigatā o le filifiliga na faia e Iosefa, pe a fua i le olaga o aso uma. Na lē mafai lava e le to'alua o Potifara le auauna sili a Farao, ona faasesēina le mafaufau ma le amio Atua a le taule'ale'a o Iosefa, a'o i ai na o la'ua i totonu o le fale o Potifara. Ua mana'o le to'alua o Potifara ia Iosefa ina ia o la momoe, e pei ona faamatalaina i le tusi faitau o lenei aso Sa. O se tu ma se aga faapaupau, aemaise ai o le agasala matuiā lea i le silafaga a le Atua. O le ala lea na lē mafai ai Iosefa, i le faatauanau atu a lea fafine leaga, ina ia o la momoe. O le filifiliga lava na faia e Iosefa, o le leai. O se filifiliga amiotonu ma le faamaoni lea mai le Atua. O le "say no" po o le "leai" i le faaosooso mai o le ti'apolo, ma faiga taufaasese, auā o loo silafaga fofoga o le Atua i mea uma lava. O Iosefa foi, o le taule'ale'a na mafuta i le Atua, ma o le ala foi lea o le auai o le Agaga o le Atua ia te ia, na lē mafai ai ona manumalo le avā amioleaga a Potifara ia te ia.

O loo manino le tala, na faamoemoeina le taule'ale'a o Iosefa i totonu o le aiga o Potifara, ona o lona faamaoni ma lona amio taupulea ma tausaaafia. O lona faamaoni tele, na ia tumau ai lava i lona valaauina faa-auauna i totonu o le fale o Potifara le auauna sili a Farao.

A tuu i le va-nonofu o Iosefa ma le to'alua o lona matai, e faalogo Iosefa i mea uma lava e fai atu ai le to'alua o lona matai. E tusa lava po o le a le faigatā ma le tigā, e pau lava le mea e fai e Iosefa, o le faalogo ma usita'i, e aunoa ma se leo e lagona, ona o ia o le auauna. Peita'i, ua lē usita'i le auauna i le mana'o o le to'alua o lona matai. Ua filifili i le lotu o le auauna, ina ia lē usita'i i le faaosoosoga ma faiga a le agasala, a ua filifili i le musumusuga a le Agaga o le Alii, e manuia ai.

O le oo ai o Iosefa i le falepuipui, o le filifiliga na faia e Potifara, e mafua mai i le pepelo a lona to'alua, e tusa o le tala na faitauina. Peita'i, a fua i le taunuuga o le tala, ma le faaeaina o Iosefa mai le falepuipui ina ua ia faamatalaina miti a le tupu o Farao, o lo o

manino mai ai se mafaufauga, o le filifiliga lava na faia e le Atua, mo le faasaoina ma le faaeaina o Iosefa. O le oo i le falepuipui, o le sala maualalo ma faalumaina mo so o se tagata soifua. Ua oo i ai le taule'ale'a o Iosefa, i lea maualalo, ina ia maualuga ai i faiga a le Atua. O le maualalo lava o le mea na oo i ai Iosefa, ona o faiga a le tagata, o le maualuga foi lea o le tulaga na ia oo i ai, i faiga a le Atua Silisiliese, ina ua sosoo lona tulaga i totonu o le faiganuu o Aikupito, ma le nofoalii o le tupu o Farao.

E mananaia filifiliga o lo o i ai i le tala o lenei aso Sa. O filifiliga leaga, e pei ona faia e le fafine, ina ua leai lona to'alua i le fale. O le filifiliga foi na faia e Potifara, na ia tuuina ai Iosefa i le falepuipui, e aunoa ma le sailia o le faamaoni. Aea filifiliga potu ma le atamai na faia e Iosefa, na ia lē talia ai le faatauanau atu a le to'alua o lona matai. O le isi itu na sili ai ona atamai le filifiliga na faia e Iosefa, o lona sola ese mai, mai le faaosoosoga. Peita'i, e le'i mapu foi le Atua ia, i lana filifiliga i le tagata e fiafia e mafuta atu ia te Ia. Na lē toe avea ai Iosefa ma auauna i le auauna a le tupu, a ua fai ma alii sili o le nuu, e pei ona faamatalaina i le tala o lenei aso Sa. Ae o le a la sau filifiliga i lenei vaitau?

### ***GALUEGA FAATINO:* TA'UTINOGA**

O le avanoa lelei lea mo le vasega ina ia ta'ito'atasi ma ta'utino se mea ua ia filifili i ai mo lona lumana'i. Aisea ua filifili ai i lea - (Ft). O a'u ua ou filifili e fai ma kapeteni o se vaa i le va o Samoa ma atunuu mamao.

***PESE:*** Ua ou filifili e mulimuli ia Iesu.

### ***A'OA'OGA:***

1. Faalagolago i le Agaga o le Alii a o fai filifiliga.
2. Aua nei faaseseina oe e le ti'apolo.

.....

**ASO SA:** 28 MATI 2021 (ASO SA LAUPAMA)

**MATAUPU:** TATALAINA O SE AUALA FOU  
(Opening a new way)

**SINI:** Ia malamalama le vasega, o le Atua le ala e faavavau.

**TUSI FAITAU:** Salamo 118:1-2, 19-29.

**FESOASOANI MO FAIAOGA:**

O le mea ua maitauina i lenei vaitau, i le usua'i ai i galuega ma aoga a le fanau, ua tele ina poloka le auala, ona o le tele ma le faatuputupula'ia o le fuainumera o taavale, ae ua vaitiiti le auala. E moomia le i ai o se isi auala fou ma nisi auala fou mo le faafaigofie ai o femalagaaiga a tagata. Peita'i o le mataupu o lenei aso Sa, e foliga e faapea se vaaiga o loo atagia ai le manatu autu o lenei aso Sa, "Tatalaina o se auala fou", i le manatu o le fai-Salamo.

E mafai ona faamatalaina le naunau o le loto o le fai-Salamo i le fia oo ma le fia alu atu i lona Atua, ae ua faigatā ona ua poloka le magāala o lo o ia i ai. Ua ia moomia ai se isi auala fou ina ia ui ai, ma taunuu sa'o ai i lona Atua, le mea o lo o ia mana'o ai. O le agaga atoa lea o loo afifi ma faaata mai i le Salamo o lenei aso Sa. O le loto naunau o le fai-Salamo ina ia to maia le faitoto'a ina ia ulufale atu ai, o lo o atagia le olaga sa i ai i le fai-Salamo. E foliga mai ai sa ese ma sesē le olaga sa soifua ma ola ai le fai-Salamo, ma ua saisaitia ma pologa ai. Ua lagona le fia sa'oloto ma ua mana'omia se isi olaga fou i lona ola. O le augani ma le faatoga, o le faamatalaina lea o le valaau a le fai-Salamo. "To maia!" e mafai ona faamatalaina, "tatala maia, alofa maia". O le valaau o le fia ola sa'oloto. Auā afai o le tatalo ina ia to maia le faitoto'a o le amiotonu, o lona uiga, o lo o tūtu la le fai-Salamo i le faitoto'a o le amioleaga. O lo o ola la le fai-Salamo i se olaga leaga. Ma ua

moomia le faitoto'a o le amiotonu, ma o le auala fou lea i le manatu o le fai-Salamo e vivii atu ai i lona Atua.

E manatu nisi, o le Salamo lenei e 118, o le pese faafetai a le nuu o le Atua, ina ua fo'i mai le tafeaga, ma ua valoia ai le afio mai o le Mesia. O lo o atagia lava i le gagana o le Salamo mai lava i lona amataga, se ia oo i le faaiuga. O le laupepa fou ua susu'e mai le ola pologa, i le ola sa'oloto i tagata o le nuu o le Atua, ina ua mautinoa ma talitonu, o le Atua lava na faasaoina i latou mai le pologa, ma ua na o le Atua lava e silisiliese ma mamalu, e na te mafaia mea uma lava.


Peita'i, e lē faia fua le galuega faaola a le Atua, i le pologa ma le saisaitia o le tagata. E moomia e le Atua le loto faamaoni o le tagata ua salamō ma iloa le Atua i lona ola. O le tagata e atagia ai le alofa, faamaoni, amio lelei, ola faapaiaina, usita'i ma faalogo, onosa'i, ma isi uiga lelei uma faapena. O faitoto'a na o le amiotonu, mo so o se tagata faatuatua lava, e ulufale atu ai i le malo o le Atua.

O le oo mai la o le tala ia Isaraelu, i le Mesia o le a afio mai, o se tala o le faafiafia loto, ma le ola faaeaina mo tagata uma, leaga ua leva na faatalitali i ai. O le lavea'i mo tagata uma, auā o le Mesia e na te faato'ilaloina ona fili ma aumai le faaolataga mo le lalolagi uma. Ma o le pese faafetai la lea a le au Eperu, auā o le Mesia ua valoia mai ma ua lalata mai, o le auala fou lea mo tagata o lo o mafatia i so o se avega. Afai la o le afio mai o le Mesia, o se auala fou lea mo le Isaraelu pologa ma sauaina, e manatu ai la le mataupu o lenei aso Sa, o le auala fou foi lea mo i tatou uma lava o tagata. O le upu moni lava, ua pologa ma saisaitia o tatou ola, ona o faiga a le agasala, talu le fili ma le ti'apolo. Ua faapologaina o tatou ola i le faia o mea sesē ma mea leaga, ma ua pei ai lo tatou ola o lo o i totonu o se falepuipui, o lo o tau saili se ala e faasa'olotoina mai ai.

E iloa le tagata ua fou le auala o loo savali ai, i lona ola vivii i le Atua i aso uma ma faamaoni i ai. E iloa foi i le tagata ua suia mai le olaga tuai sa ola ai, i le olaga fou ua i ai.

**GALUEGA FAATINO:** TAALOGA

Saili e oe lou auala i fafo.



**PESE:** Ave lo'u ola ia aoga. (157 Pese ma Viiga)

**A'OA'OGA:**

1. Ua na o le Atua e fou ai le ola.
2. Ia faia le amiotonu, o le auala fou lea i le Atua e faavavau.

.....

**ASO SA**

**4 APERILA 2021(ASO SA TOETU)**

**MATAUPU:**

**O MOLIMAU LĒ LEOA  
(The Silent Witnesses)**

**SINI:**

Ia a'oa'oina le fanau ina ia latou iloa ma malamalama i le tāua o le fa'aleo o ni fa'afitauli ma ni mea e tutupu i o latou olaga. Ma ia sili foi ona latou fiafia e fa'aleo le alofa o le Atua mo i latou i aso uma.

**TUSI FAITAU:**

Mareko 16:1-8

**FESOASOANI MO FAIAOGA:**

O le molimau a Mareko, e to'atolu tina na o i le tu'ugamau e ave mea manogi e ū'u ai le tino o Iesu. O le fa'aāliga o le alofa valevale o nei tina i lo latou Ali'i, aemaise o le tu ma le aganu'u lava lea fa'a-Iutaia. Na pau le mea ua iloa, e lua ni fa'afitauli tetele o lo o i mafaufau o nei tina, a'o agai atu i latou i le tu'ugamau. Muamua, o lo latou fefefe lea i fitafita Roma o lo o leoina le tu'ugamau o Iesu. Ma lona lua, o lo latou leiloa lea pe fa'afefea ona o latou fuli ese le ma'a o lo o tapuni ai le gutu o le tu'ugamau.

Peita'i, e ui i le faigata o mea o lo o mafaufau i ai nei tina, ae le'i taofia ai i latou mai le fa'aāliga o lo latou agaga alofa i lo latou matai po o Iesu. Ae tasi lea fe'au taua o lo o tau fa'apupula mai e Mareko, ma o le feau tupito foi lea na Afio mai ai Iesu. O le a lea fe'au? O le fe'au o le alofa.

O le alofa e le fefe ai e fa'ailoa le upu moni po o Iesu Keriso. O lona uiga o le manatu, a moni le alofa, e lē mafai e fa'afitauli ma fa'afatiatama'i o le ola ona taofia le tagata mai le fa'atinoina lea o se mea lelei, e pei foi ona faia e nei tina. A moni foi lo tatou alolofa ia Iesu, tatou te lē popole i ni mea e tutupu ma fa'afitauli,

ae fa'atino lava le alofa. A'o fa'afitauli e tu'u atu lea i le Atua na te tau'aveina.

Peitai o le tatou matā'upu o lenei aso, "O molimau lē leoa". O lo o fa'atatau lava le matā'upu i tina nei e to'atolu e pei ona ta'ua. O lo o manino lava i le tusi faitau, na o'o atu nei tina i le tu'ugamau, ua uma ona fuli ese le ma'a mai le gutu o le tu'ugamau. Sa latou o i totonu o le tu'ugamau ma iloa ai le agelu a le Atua o lo'o nofo i le tulimanu, ae ua leai se tino o Iesu.

Na lagona e nei tinā le popole ma le fefefe. Peitai, na ta'u atu e le agelu ia i latou le mea ua tupu, ma fa'amanatu atu i ai ia i latou le fetalaiga a Iesu a'o le'i maliu. O le feau ina ia latou o atu e ta'u atu i le auso'o. Ae fai mai le tusitala i le fuaiupu e 8, "Ona latou vave o atu lea i fafo, ma sosola ese i le tu'ugamau; ua maua foi i latou i le gatete, ma le ofo tele lava; ua latou le fai atu foi se upu e tasi, aua ua matata'u".

O lea ua uma ona ta'u atu e le agelu le feau latou te o atu e ta'u atu ia Peteru ma le auso'o, peitai ua latou le fai atu se upu e tasi. Aisea ua fa'apea ai nei tinā? Aisea ua latou le ta'uina atu ai le feau e pei ona fai atu ai le agelu? E tele lava ni mafua'aga. Peitai o nai mafua'aga taua lava nei, muamua, o le lē talitonu.

E mafai e le fa'atinoga ua faia e nei tina ona ta'u mai, lo latou masalosalo ma le lē talitonu i le feau ua logo atu e le agelu. Aua foi o le natura lea o le tagata o le lē talitonu. I le ma le isi mea ua iloa, o le tagata e gata lona iloa i le tu'ugamau. O le mafaufau o nei tinā, a oti le tagata, ona tanu lea i le tu'ugamau, ona gata ai lea. O lona uiga latou te le o malamalama i le Keriso toetu, e ui o lea ua fa'ailoa i ai e le agelu.

Lua, o tinā e lē vavevave i se fa'aiuga. Atonu ai o le tasi lea o mafua'aga na ala ai ona fa'atuai ona ta'u e nei tina le feau e pei ona latou molimauina. Aua o i latou lava o ulua'i molimau o le Toetu o Iesu. Ae sa latou fa'atalitali ma le onosai i se taimi lelei ma le paganoa, e momoli ai le feau i le auso'o, aua e lē faigofie ona talitonu le auso'o ia latou ma le feau.

A fua i le tulaga o lo o i ai le auso'o, o lo o nonofo ma le fefefe ona o le mea ua tupu i lo latou matai, e le faigofie la ona o latou talitonuina tinā ma la latou feau.

O tatou foi, e taua le fa'amanatu mai o lenei mataupu mo tatou. E ao lava ona moni lo tatou alolofa ia Iesu. Manatua, o tatou foi o isi tagata molimau ia Iesu ma lana Tala Lelei. O le tagata molimau, e le tatau ona fefe pe pala'ai i mea e tutupu i le ola. Ae ao ona faia le molimau ma le alofa fa'amaoni ia Iesu, ae lafoa'i fa'afitauli i le Atua, o Ia lenei na te feagai ma fa'afitauli. O le alofa, e lavatia mea uma lava.

E le tatau foi ona tatou vavevave ia tatou fa'aiuga fai. Ae ao ona tatou matua fa'alogolelei i le mea e fetalai mai ai le Agaga o le Atua ia i tatou, ona tatou faia lea ma le fa'atuatua. O le taua lenei o le nofo i lalo ma mafaufau lemu i le Atua, pe a o'o ina tutupu fa'afitauli i o tatou olaga. A e ita foi, e le tatau lava ona e vave faia se fa'aiuga, ae ao ona e nofo i lalo ma mafaufau i le Atua, o Ia na te fa'amalosi mai ia te oe, ma maua ai lou loto tele e fa'ailoa atu ai lona alofa i isi tagata.

### ***GALUEGA FAATINO:***

Vaelua le vasega ona tuu lea i vaega taitasi galuega nei e fai:

1. Tusi mai itu taua e ao ina faailoa ua mafua ai faafitauli tutupu i olaga o fanau.
2. Tusi mai ni itu taua e tatau ai ona faateletelegese ni faaiuga i mea tutupu i olaga o fanau.

\*Ia fesoasoani lau susuga e fa'apupula atili manatu o le fanau e fa'aali.

***PESE:*** Ma'eu le molimau... (145 Pese ma Viiga)

### ***A'OA'OGA:***

1. Ia fiafia e molimau i le suafa o Iesu.
2. Aua le fefe e fa'ailoa le mea moni.

.....



**ASO SA :** **11 APERILA 2021**

**MATAUPU :** **O LE SAO O LE ATAMAI I LE FOAFOAGA A LE ATUA(Wisdom's part in God Creation)**

**SINI :** Ia malamalama le vasega o le atamai o le Atua na ia faia ai mea uma o le foafoaga.

**TUSI FAITAU:** Faataoto 8: 22 – 31

### **FESOASOANI MO FAIAOGA:**

O Solomona ua na'o se auauna faatauvaa na faatotogaina e le Atua i lona potu ma lona atamai matautia. Sa leai lava se isi e muamua pe mulimuli mai e tutusa ma le atamai o Solomona. O le atamai na augani ai Solomona ina ia faamasino ai i lona nuu ua matua toatele lava. O le atamai lona faa-le-Atua o lo o tautala ai Solomona sa i le amataga i le foafoaga a le Atua.

I le mataupu atoa lena e valu o le tusi o Faataoto, o lo o amata ina ua faatusa ai e le Tusitala le potu o se tagata (lady wisdom). O lo o tu o ia i mea maualuluga ma fetaulaigaala ma tauvalaau i tagata. O le tauvalaau a le atamai i tagata ina ia latou iloa le mea leaga ma le mea faapiopio. O le natura lea o le atamai o le Atua. O le atamai e le manumalo ai se mea sese. O le atamai e susulu mai ai mea sili ma mea tonu e taitaina ai le tagata faatauvaa.

Ao le vaega sa faitauina o lo o faamatalaina ai le atamai sa fai ma auupega e foafoaina le lalolagi i le amataga. O le atamai lona o lo o faamatala e Kenese o le Agaga feagaoioi ai o le Atua i le amataga. O le Agaga e feagaoioia'i, e galue, e mataala. A o lumana'i le aso, a o le'i oo mai le faatinoga, ae ua loa ona feagaoioia'i le Agaga mai le vavau. Sa feagaoioia'i i lana silasila toto'a, e fuafua lelei, le faatinoga o le foafoaga. O le Agaga faamatuaofaiva, e tapena muamua ma tusi le ata (plan, design); fuafua, Iloilo, fetuuna'i, ma saga teuteu atili, e oo mai le aso ma le taimi ua atofa, faatino loa le galuega foafoa. O le Agaga tapena

mamao, tapena lelei, tapena mae'ae'a. Sa feagaoioia'i; lana silasila ma fetuutuuna'i lana faautaga, O a mea o le a fai? O le a e tatau ona fai muamua, ma le sosoo ai? E fia aso e tatau ona fai ai? O le a le taualuga?

I upu o lo o faaaaogaina mai e le Tusitala, o lo o manino mai ai le tele o le sao o le atamai lea i le foafoaina o le lalolagi. O le atamai sa auai i le amataga ina ua faia le lagi ma le lalolagi. *Na faauuina a'u mai le vavau, mai le amataga a o leai se lalolagi.* O le atamai i manatu o le Tusitala, o Ia lava o le Atua foafoa e pei ona faamauina e Kenese. *Ina ua ia tofia e ia le tuaoi i le sami, ia le sopoia e lona suasami lona matafaga.*

O le atamai lava lea sa fesoasoani i le foafoaga, lea lava foi na foafoa ai ma le tagata soifua. *O lo'u fiafia foi sa i le fanau o tagata lea.* O lona uiga ua ia te i tatou foi le atamai lea o le Atua sa i ai i le amataga o le foafoaina o le lalolagi. O le atamai lona e afua ai ona tatou faia o mea lelei ma faaiuga sa'o. O le atamai faa-le-Atua lea, e leo se atamai e suesue ai i mea o le natura ma isi. Ao le atamai ua uma ona topule mai le amataga.

O se aoga foi lea mo tatou le fanau, o le atamai o le Atua ua ia i tatou e ala lea i le faalogo ma usitai e le gata i o tatou matua, a ia faapea foi i tagata matutua aemaise o le finagalo o le Atua o lo o ala mai i le Tusi Paia. O le atamai lona tatou te faia ai faaiuga lelei ma amio e tatau. O nisi fanau ua maua le potu aogoina, a ua leai se faautauta lelei. E le o se atamai faa-le-Atua lona. Ia iloa ona faautauta lelei ma faia le finagalo o le Atua.

### **Uiga o Upu:**

i) efu : pefu

### **GALUEGA FAATINO: TUSIGA SOLO**

Tusi mai sau solo e faatatau i le Foafoaga po o le Siosiomaga na faia e le Atua?

Ia lua fuaiupu, ae tai fa laina i le fuaiupu

**PESE:** O LE ATUA SILISILI ESE

O le Atua silisili ese, malosi ofoofogia  
E leai se mea e le mafai ona ia faia  
Na ia faia o atumauga  
Na ia faia o vaitafe  
Ona foliga ua vaaia i le lalolagi HA! HA!

My God is so big, so strong and so mighty  
There's nothing my God cannot do,  
FOR YOU

**A'OA'OGA:**

1. E tulagaese le atamai o le Atua
2. Ua ia te i tatou le atamai mai le Atua
3. Ia faautauta lelei

.....

**ASO SA :** **18 APERILA 2021**

**MATAUPU :** **I TUUGAMAU (Among the Tombs)**

**SINI :** Ia malamalama le vasega o le nofonofu o le tagata na uluitinoina e temoni i tuugamau, o le faailoga ua faatoilaloina e temoni, peitai e lei manumalo i ai temoni i le mana laveai o le Alii Faaola.

**TUSI FAITAU:** Mareko 5: 1 – 20

**FESOASOANI MO FAIAOGA:**

A talanoa loa i tuugamau o le nofoaga ua teu ai tino maluu o tagata. O le tala sa faitauina o le tagata ua uluitinoina e temoni ua

nofonofu i le fanua tanu po o le fanua o lo o i ai tuugamau. O le fanua tanu lenesi e i autafa o le itu i sasa'e o le vaituloto o Kalilaia, pe a ma le 40 mita le mamao mai le vai, o lo o i ai le ogaeelele e pei o se tafa vanu. O iina o lo o i ai tuugamau sa fai ma nofoaga e nofo ai lenesi tagata sa uluitinoina e temoni.

O tuugamau lava ia o nofoaga o tagata oti, peitai lea ua nofonofu ai le tagata ola. O le tagata ola ua pulea ma lima taitaina e temoni e toatele. Aua o lenesi tagata ua le mafai ona saisai, ua oo a i filifili uamea ua na motusi. Sa nofo foi o ia i tuugamau i le ao atoa ma le po, sa alaga ma selei o ia ia te ia i maa. O le faailoga lea o le malosi o temoni o lo o i totonu o lenesi tagata.

Na agai atu Iesu ma ona soo i le itu i sasae o le vai e fia maua se malologa mai le motu o tagata. Ae alu atu ae iloa mai ai o Ia e lenesi tagata o lo o nofonofu i le nofoaga o tuugamau. O le taimi lava na alu ese ai Iesu mai le vaa, na alu atu ai lenesi tagata ua tumu i temoni. Na momoe atu lenesi tagata ma faapea atu. "*Se a lau na ia te a'u.....ia e le faatiga mai ia te a'u.*" Na iloa lelei e temoni Iesu, ma lo latou manatu ua le sili atu lava lo latou malosi nai lo Iesu, tusa lava po o le a le toatele o latou e le sili lava nai lo le mana silisili ese o le Keriso. O le fetaliaiga a Iesu ma temoni o lo o manino ai le usitai o temoni ia Iesu Keriso.

O le igoa Lekeono e i ai lona uiga e faatusa i se autau o fitafita Roma pe a ma le 5000 lona aofai. Lea lava na tautino ina ua fesili Iesu – *Po o ai lona igoa??* Aua ua toatele temoni o lo o faapologaina lenesi tagata. E tusa o le molimau a Mareko – e lei faia lava e Iesu se faaiuga i nei temoni. O temoni lava na latou aioi ia Iesu e le gata ina ia aua nei aueseina i latou, a ia auuina i latou latou te uluitino i le lafu puaa o lo o tataa e latalata ane i ai.

O le ta'ua ai o le lafu puaa i le molimau a Mareko, ua iloa maunoina ai o lo o i ai Iesu i aai o nuu ese. Ona e le o faatagaina le aai ai o tagata Iutaia i aano o puaa e tusa o lo latou tu ma le agaifanua. O le galuega faaola a Iesu ua faia e aofia ai mamoe o Isaraelu ma tagata o nuu ese. E lei sili i manatu o tagata e ona puaa a latou puaa, a ua tu matie le vavega na faia e Iesu i le tagata na uluitinoina e temoni, le ala lea o lo latou sosola ma talai atu i aai ma faoa aai le mea uiga ese ua faia e Iesu. Ae le gata i lea ua

latou faatoga ia Iesu ina ia maliu ese atu i lo latou nuu. O le faailoga o le maofa ma le fefefe aua o ai ea lenei tagata ua na tulia temoni e toatele. Na iloa ua matua suia le ulavale o le tagata sa uluitinoina e temoni ina ua filemu ma nofo i lalo, ua ofu foi ma ua atamai.

O lenei tagata sa matua pologa ma faatasina solo, ma ua nofonofu ma mafuta i tuugamau. Sa le maua se filemu i lona mafaufau i le ao atoa ma le po. E le gata sa pologa ma sauaina lona tino, ae sa sili ai ona sauaina lona agaga ina ua pulea e temoni. Peitai ua nao Iesu lava na ia maua ai lona mapusaga ma le saolotoga moni. Ina ua maua lona filemu ma ua atamai. O se aoaoga foi lea mo tatou le fanau. E tele mea ua fai ma temoni e faalavelaveina ai o tatou ola. O temoni ua fai ai tatou ma pologa i le ola nei. A ua aoao mai lenei tala, tatou faalagolago ma faamoemoe i le mana silisili ese o Iesu Keriso e na te tafiese nei faafitauli ua fai ma avega e mamafa tu i ai tatou.

### Uiga o Upu:

- i) motumotusia : motusi, momotu
- ii) tu'ipalaina : nuti lili, faaleagaina
- iii) selei : tatipi, tipi
- iv) Lekeono : o le igoa ua faaigoa ai se au tau e toatele (temoni e toatele)
- v) tofe : vanu, alia

### **GALUEGA FAATINO:** Matega Tupua

- 1) Ou te nofo i le manava o le eleele, e pule foi le pogisa ia te au. O au e tini taunuu i ai le tamoega o foliga vaaia ma le lalelei o le tagata. E fai a'u ma fili o le ola, peitai na ona feita ae ua na o a'u le auala e iloa ai le fe'ilafi o le ola i tala atu. Ou te le faailoga tagata, so'o se tasi e tuitui mai i lo'u faitoto'a, ou te tatala le avanoa ma faaulufale ia te ia. E ma te mafuta e oo i le faavavau.....O ai la a'u?

- 2) E toatele i matou, sa matou au faatasi e osofai se tasi o tagata. O lo matou malosi na mafaia ai e lenei tagata ona motusi i noanoataga uamea na noatia ai o ia. Sa matou faanofoesea o ia i tuugamau. Peitai na faateia i matou ina ua matou iloa le tagata e sili atu lona malosi nai lo matou...O ai la matou...?

- 3) E taifa o matou vae, sa leai foi sa matou agasala, na sese o matou lagona ina uluitinoina i matou e temoni, ma matou feosofi ai i le tofe??

### **PESE:** O IESU E MANUMALO

O Iesu e manumalo, e manumalo, e manumalo  
O Iesu e manumalo e manumalo i taimi uma  
Manumalo x8  
Manumalo i taimi uma

O Satani e toilalo, e toilalo, e toilalo  
O Satani e toilalo, e toilalo i taimi uma  
Toilalo x8  
Toilalo i taimi uma

Mulimuli nei loa ia Iesu, ia Iesu, ia Iesu  
Mulimuli nei loa ia Iesu, o ia o le manumalo

### **A'OA'OGA:**

1. E le manumalo ni temoni ia Iesu
2. Tatou tuu i le Atua ni mea ua faalavelaveina ai lo tatou ola
3. Aua tatou te tuu avanoa i ni mea e ono avega ma temoni i lo tatou ola.

.....

**ASO SA :** 25 APERILA 2021

**MATAUPU :** **O LE ATAMAI OFOFOGIA O LE ATUA (Jesu's Astonishing Wisdom)**

**SINI :** Ia a'oa'oina le vasega ia malamalama o Iesu Keriso o le atamai ofoofogia lea o le Atua sa i le amataga, a o lea ua liutino tagata.

**TUSI FAITAU:** Mareko 6:1 – 13

**FESOASOANI MO FAIAOGA:**

O le gagana ua masani ai – O le tagata ma lona tupuaga, o le tagata foi ma lona faasinomaga. O o tatou faasinomaga o o tatou aiga. O tupuaga ia o lo o nonofo malamalama ai le nuu i soo se tupuaga o se aiga i totonu o le nuu. E le tutusa uma foi aiga i totonu o nuu. O nisi aiga na tupuga mai i le mativa ma le faatauva, peitai ua oo i le tulaga o le faamanuiaina ma maualuga le tamaoiga. O nisi foi o aiga na tupuga mai i le ola manuia ma le tamaoiga, peitai ua ifo i se tulaga maualalo ma le le tagolima. Ua iloga foi a ituaiga tagata i tupuaga o so o se aiga.

Ua oo atu nei le galuega faaola ma le talaiga a Iesu i lona lava tupuaga po o lona nuu o Nasareta. Lea ua fesiligia ai e le nuu le tupuaga o le aiga o le Alii Faaola. “*E le o le tufuga ea lenei, le tama a Maria, o lona uso foi o Iakopo ma Iose ma Iuta ma Simona?....*” Na mafua ona fesiligia le tupuaga o le Alii Faaola ona o le matautia o le ofoofogia o le atamai o le Atua na aoao atu ai Iesu i totonu o le sunako. O le masani lava lea a Iesu i lana galuega folafola e ulufale i malumalu e pei ona ia faia i Kapanauami ma isi nuu. Peitai, o ana aoaoga i isi nuu e pei o Kapanauami, na faalogo tagata ma ua taufaiofo, auā ua ia aoao atu e pei o se ua i ai le pule ae le pei o le au tusiupu (Mareko 1:22). O le Au Tusiupu o ni taitai o le lotu Iutaia ua lautele ma loloto foi lo latou aoaoina i tulafono ma agaifanua o le lotu Iutaia. Peitai, na

tulagaese lava le faalogo a tagata Kapanauami i le aoao atu a Iesu. O lo o manino ai lava le atamai ofoofogia o le Atua o lo o ala mai ia Iesu.

A o le eseese lea o le a'oa'o atu a Iesu i isi nuu mai lona lava nuu moni e tusa o le molimau. Na faalogo ai isi nuu e pei o Kapanauami ma talitonu aua ua sili atu nai lo le au tusiupu. Ao lea ua aoao atu i lona nuu moni, ae fesiligia ai lona tupuaga. E mafua ona fesiligia lona tupuaga ona e le talitonu i le atamai o le Atua o lo o aoao atu ai Iesu i ai latou. Ua pei e faatauva le tupuaga o Iesu i lo latou manatu. Ua toe vili faa-ata i o latou mafaufau matua o Iesu. O Iosefa lona tama ua na o se kamuta, ao po o fea e maua ai e lenei tagata lenei atamai.

O le mea mautinoa lava o aiga i totonu o le nuu e leai lava se aiga e le fesootai ma malamalama le isi aiga i le isi foi aiga. Lea foi e iloa ai e Nasareta le aiga o Iesu ma ona matua ma le tulaga o ona matua. E ui ina nuu faatasi, ae o lo o papa'u a lo latou iloa i le tupuaga o Iesu. Ua gata la latou silasila i le faatauva o le galuega a Iosefa sa faufautane ai Maria, ma ona uso ua na o ni tagata faifaiva. Ae le o loloto la latou silasila i le afuaga o le atamai o lo o ia Iesu. “*E leai a se perofeta e le mamalu, ua na o lona lava nuu, ma lona aiga, ma lona fale e le mamalu ai.*” O upu ia na tali ai ai e Iesu le tausui o lona nuu ia te ia. Ua ofo foi Iesu i lo latou le talitonu ma le le faatuatua i ana aoaoga.

O le upu moni, o Iesu Keriso o ia o le atamai ofoofogia ua liutino tagata. O le vaisua lea o lo o ua matua pogisa atoa ai tagata Nasareta. Ua faamuamua i o latou manatu le faatauva o Iosefa ma Maria, a ua le iloa ai le malosi uiga ese na faaaogaina ai le faatauva o le aiga o Iesu i Nasareta na tupuga mai ai Iesu i le tino tagata. O le upu foi ua a'oa'o atu ai Iesu, e le o se atamai mai ia Iosefa ma Maria ao le atamai mai le Atua. O le atamai ofoofogia lea o le Atua sa i le amataga, ma ua liutino tagata. Pei ona tautala ai Ioane “*Sa i le amataga le upu, sa i le Atua le upu, o le Atua foi le upu...*” O le atamai ofoofogia o le Atua ua liutino tagata ia Iesu Keriso, ao lea ua tausui ai tagata o Nasareta.

O le atamai ofoofogia lena o le Atua lea na topule e Iesu i ona soo latou te faia ai vavega, ma le pule e pule ai i agaga leaga. O le

atamai ofoofogia ua latou talai ai le Tala Lelei ina latou salamo. O le atamai ofoofogia o le Atua e ola ai agaga o le tagata pe a salamo ma faatuatua ia te Ia. O se feau foi lea mo tatou le fanau. Aua nei tatou tausuai pe faalotolotolia i le atamai o le Atua na ala mai i lona alo pele o Iesu Keriso. O le atamai o le Atua tatou te iloa ai mea lelei uma, e ola ai o tatou tino faatasi ai ma o tatou agaga.

### Uiga o Upu:

- i) Tufuga : tagata faufale
- ii) F. 11 : faailoga e iloa ai le tagata le faalogo ma le aiga ua talia le upu, faatinoga e faailoa ai o lo o faia pea la latou galuega e tatau ma le tala lelei., ia toe foi pea i ia tagata lo latou le faalogo i le upu o le tala lelei.

### **GALUEGA FAATINO:** FA’AALIGA MANATU

E i ai le fuaitau faa-Samoa ‘a malu a i fafo, malu foi i fale.’ A o lea na fetalai Iesu i tagata o lona nuu “E leai se perofeta e le mamalu, ua na o lona lava nuu e le mamalu ai.”

Ia tuu le avanoa e aumai ai ni manatu o le fanau i le feteenaiga o fuaitau nei e lua.

### **PESE:** HE IS LORD

He is Lord (x2)  
He has risen from the dead  
He is Lord  
Every knee shall bow  
Every tongue confess  
That Jesus Christ is Lord

O Ia o le Alii (x2)  
Ua toetu mai le oti  
O Ia o le Alii  
Tootuli uma i ai tulivae  
Ta’uta’u atu i laulaufaiva  
O Iesu Keriso le Alii

### **A’OA’OGA:**

1. Aua tatou te tausuai i tupuaga o isi tagata
2. E ofoofogia le atamai o le Atua
3. Ua ia te i tatou le atamai o le Atua

.....

**ASO SA :** 2 ME 2021

**MATAUPU :** TAVITA, IONATANA MA SAULO  
(David, Jonathan and Saul)

**SINI :** Ia a’oa’oina le vasega ia malamalama e saunia e le Atua auala e faaeaina ai le tagata faamaoni ma amio lelei.

**TUSI FAITAU:** 1 Samuelu 18:1 – 16

### **FESOASOANI MO FAIAOGA:**

Na fesilisili le tupu o Saulo po o se atalii o ai lea na ia fasi faamo’amo’a le toa tino ese o Filisitua. O le ala lea o le o’o ai o Tavita i luma o le tupu o Saulo ma lona atalii o Ionatana. O ala lava ia na saunia e le Atua aua ua i ai le faamoemoe o le Atua i le tama o Tavita mo lona nuu o Isaraelu. Na faifai malie fuafuaga a le Atua ina ua pipii le loto o Ionatana ia Tavita, aua e atuga lelei Tavita ma Ionatana, ma o la faia ai se faigauo e tumau ma vava lalata le sootaga. E manino lea sootaga aua ua nofo ai lava Tavita i

le aiga o Ionatana, ma ua osi foi le feagaiga i lo la va. Ae le gata i lea, ua to ese e Ionatana lona ofu talaloa sa ia te ia ma foai atu ia Tavita. O lona ofu tino atoa ma lana pelu, ma lana aufana, atoa ma lona fusi. O ofu o mea totino lava ia e patino i le tagata, peitai lea ua ofoina e Ionatana mo Tavita. O faailoga o le alofa moni faaleuo. E i ai le manatu o le faatomuaga foi lea o le nofoaiga a Saulo o le a sosoo e Tavita.

Ua tupu pea le faaeaina o Tavita aua ua tofia o ia e Saulo e pule i 'au. O le molimau ua fiafia lava Saulo ia Tavita. Peitai na mamae faafuasei le lausiusi o le fiafia o Saulo ina ua foi mai le taua, ma ua lagi fetaliai ai e fafine mai aai uma o Isaraelu le pese. Ua latou sisiva ma faafetaiai le tupu o Saulo ma tata a latou topa ma le olioli ma apa tagitagi. Ae faimai upu o le pese "*Ua fasia e Saulo o ana afe, ao Tavita o ana sefulu o afe*" O upu nei na agi faamatagi malosi i le faalogo, ma tatagi faaleo oō i le mafaufau o Tavita, aua peiseai ua sili atu le malosi o Tavita nai loo Saulo. O le taimi lava lea na muta ai le fiafia, ae amata ai loa le fili matautia o taulamalama. Ioe! O lea lava ua amata suiga na faia e le Atua ia Tavita ma Saulo.

E ui o lea lava e mafuta Tavita, Saulo ma Ionatana, peitai o lo o ua i ai le vaega o le tafatolu ua pei e motusia. E alofa Ionatana ia Tavita, ae lamalama e Saulo ia te ia. O le tala **ua osofaia o ia e le agaga leaga mai le Atua**. Lea ua manino mai ai ii ua amata ona faia e le Atua auala ina ia tupu atili ai pea le ita o Saulo. O lo o aumaia ai le ata o le Atua pule aoao, ma le Atua e pule i o tatou loto ma agaga. Na i ai oi laua o Saulo ma Tavita i totonu o le fale, sa ta e Tavita le kitara, ao lo o i ai le tao i le lima o Saulo. O le faamoemoe o le kitara a Tavita ina ia faafiafia ia Saulo. Peitai o le pese a Tavita ua pei o se mea e oona i le tofo a Saulo ona o le agaga leaga o lo o nofo i totonu ia te ia. Lea la e aumai e Tavita le leo o le Kitara e faafiafia ai Saulo, ao lea e velo atu e Saulo i le tao ina ia fasioti ai Tavita.

O le 'alo a Tavita o gaoiga ia na tapena ma fuafua mai e le Atua. O le mea moni ua filifilia e le Atua Tavita ina ia suitulaga ia Saulo. Ua amata ona mata'u Saulo ia Tavita aua ua iloa e Saulo ua ia te ia le Alii. Sa matua faautauta Tavita i lana amio, e ui ina

lamalama e Saulo. O le tagata o le Atua e tusa lava pe taulamalama mai e nisi, e le mafai ona afaina ai aua o lo o i ai faatasi o ia ma le Alii.

O se a'oa'oga foi lea mo tatou le fanau – Aua tatou te lamalama i o tatou uso a tagata, e le o le finagalo lena o le Atua mo tatou. A ia tatou maua le loto mau ma le faautauta mai le Alii, o ala ia tatou te faia ai faaiuga sa'o ma amio e tatau i le finagalo o le Atua. O le faigauo foi a Tavita ma Ionatana o lo o i ai le ata o le sootaga faale-Atua. Ia faapena tatou le fanau, ia tatou maua le alofa faale-Atua i lo tatou va ma isi tagata.

### Uiga o Upu ma Fuaitau:

- i) Pii mau : mafanafana, fealofani.
- ii) Fetaliai : o le pese e usu vaega...uma le isi vaega tali mai le isi vaega
- iii) Faautauta i lana amio: amio lelei: leai se mea leaga na te faia, mafaufau muamua a o lei faia se mea.
- iv) Tuilua ma le pa o le fale: ia tu ai le tao ma ati ia pipii i le wall o le fale

### GALUEGA FAATINO: Taliga Fesili

1. O a ni faailoga e iloa ai le mafanafana o le faigauo a Tavita ma Ionatana?
2. O le a le galuega muamua na tofia ai Tavita?
3. O a upu na leaga i le faalogo a Saulo?
4. O a ni auala e foia ma toe faaleleia ai mafutaga ua malepelepe ?(O le fesili lea o le fesili lautele, a ia faataua le faigauo po o mafutaga i le va o matua ma fanau, ia po o le teine i lana uo teine, ma le tama i lana uo tama)

### TALI:

1. Ina ua to ese e Ionatana lona ofu talaloa sa ia te ia ma foai atu ia Tavita. O lona ofu tino atoa ma lana pelu, ma lana aufana, atoa ma lona fusi.

2. Tofia e pule i ‘au
3. Ua fasia e Saulo o ana toaafe, ao Tavita ana sefulu o afe

**PESE:** TAVITA MA IONATANA  
 O Tavita ma Ionatana  
 O se uo mafanafana  
 Saulo ua taulamalama  
 Ia fasioti o si tama  
 O le Atua ua fai ma lafitaga  
 .....(Fati: Jesus loves the little children)

**A’OA’OGA:**

1. Aua le ola taulamalama
2. Ia atagia le alofa faa-le-Atua i lo tatou va fesootai ma isi
3. Ia tatou maua le loto faamagalalo

.....

**ASO SA:** 9 ME 2021

**MATAUPU:** **SILI ATU NAI LOO UPU MA TALA**  
**(More than words)**

**SINI:** Ia a’oa’oina tamaiti ia malamalama, e sili le taua o le faamaoni i lo o le tele o upu ma tala e fai.

**TUSI FAITAU:** Tito 1: 1- 16

**FESOASOANI MO FAIAOGA:**

O le tusi lenei a le Aposetolo o Paulo i lona atalii faale-faatuatua ia Tito, o lo o apoapoai atu ai Paulo mo le faatinoina o lana galuega (Tito) i Kereta. Ia faataua e Tito lona tulaga ua avea ai o ia ma taitai o le lotu i Kereta. Ia avea ma taitai e tautala ma le

faamaoni i le upu moni. Aua nei faalogo i upu tau faasese o lo o gagana ai tagata Kereta, nei avea ma mea e pelogia ai le galuega a le Atua.

“O le Atua e le mafai ona tala pepelo.” O le faamaoni o le Atua i lana ‘Upu moni, lea na liutino tagata ai ia Iesu Keriso, ma Afio mai ai i le lalolagi.

O Kereta o se tasi o aai o le malo o Eleni – I le tausaga 140 TLM (Taimi Lumanai le Mesia) (BC) Na avea ai Kereta ma aai nofia e le tele o tagata Iutaia, i lalo o le faamalumaluga o le malo o Roma. I le taimi o Samuelu ma le tupu o Tavita, o Kereta sa nofoia e tagata Kereti mai Filisitua (Esekielu 25: 16). O lo o molimau foi le Aposetolo o Paulo, sa i ai tagata Kereta i le ‘Penetekoso’ (Galuega 2: 11). A o i latou ia na tauemu ma faifai ina ua gagana le au Aposetolo i gagana Eseeese ona o le Agaga Paia.

E foliga mai o tagata Iutaia, ia ua nonofo i Kereta, o lo o tumau pea o latou loto i tala o le Feagaiga Tuai ma tulafono. A o tagata Kereta o lo o tapuai pea i atua o Eleni. Aua o lo o faapea o latou manatu – O le mauga o Ita-(Mt Ida) i totonu o Kereta, o i na fanau ai Seu (Zeus) O le atua sili lea i o latou manatu.

O le mafuaaga lea ua faamalosi au atu ai Paulo ia Tito. Tautuana, aua nei faalogo i upu pepelo a tagata Kereta ma le au Iutaia. E moni latou te tautau Iesu Keriso, ae le talitonu ma talia, o Ia o le Faaola.

Na oo lava i le perofeta o le nuu o Kereta, na tautino lava i le ola pepelo o Kereta, “O tagata Kereta, e sagasaga tala pepelo lava i latou, o manu feai leaga, o e usuusuai ina ai.”

A o tagata Iutaia, o lo o faapea atu Paulo ia Tito – “Aua e toatele o e solitulafono ua tautalatala i upu le aoga ma faasese atu, ae sili musa le au peritome.”

O le molimau moni lea i le tala pepelo o tagata Kereta, O tagata e ola le mama, e loto eleelea, e le mama a latou galuega e fai. O le mafuaaga foi lea ua le mama ai o latou mafaufau mai o latou loto fuatia ifo e fai le galuega lelei. “U mama mea uma i e ua loto mama.”

Ese le manaia o le faaupuga lenei a Paulo. O le tagata e faamaoni ma loto mama, e sili atu ona lelei galuega ma upu e tautala ai. E

le aoga le tele o upu ma tala e faalele solo, ma faatiga taliga ae gagana le loto i galuega leaga ma upu pepelo.

**Uiga o Upu ma Fuaitau:**

- i) sagasaga pepelo - pepelo pea, pepelo e le uma
- ii) usuusuai - fia moe, matamoe, le mataala
- iii) ia maamaai ona e aoai- ia matuai malosi le tautala i le upu moni.
- iv) ae faafiti ia te ia i a latou galuega- e leaga galuega latou te faia
- v) matauleagaina - o se tagata ua tauleagaina.

**GALUEGA FAATINO:**

- 1. O ai tagata sa nofoia muamua le aai o Kereta?  
Tali: O Filisitia
- 2. O le a le taimi na nofoia ai e tagata Iutaia Kereta?  
Tali: 140 TLM (Taimi Lumanai le Mesia0
- 3. O ai le atua sa tapuai ai tagata Kereta?  
Tali: Seu (Zeus)
- 4. O le a le faailoga o lo o tumau pea Iutaia i tulafono o le Feagaiga Tuai?  
Tali: O le peritomeina
- 5. O ai le perofeta Kereta lea e taua i le tala?  
Tali: Epimoni (Epimendes)

**PESE:** 371 (Pese ma Viiga)

**A’OA’OGA:**

- 1. E iloa upu i galuega.
- 2. E taua le tautala ma le faamaoni.
- 3. E iloa mea o i le loto i upu e tautala ai.

.....

**ASO SA: 16 ME 2021**

**FONO TELE**

**MANATU AUTU: O LE MALAMALAMA MO LANA EKALEZIA**

**TUSI FAITAU:** 1 Ioane 1: 1 – 10

**“O LE MALAMALAMA LAVA LE ATUA”**

Ua tatou masani i le malamalama, pe a tau mai e le Tusi Paia. O le Atua o le malamalama – le malamalama lea na ia fausia ai le lalolagi ma mea uma. Ae e le faapea o le malamalama susulu, ae o le malamalama e iloa ai, ma mautinoa, le Alii. Ia tatou manatua pea le fetalaiga a Iesu Keriso, “O outou o le malamalama o le lalolagi outou.”  
E mafai ona avea i tatou ma malamalama pe afai tatou te talitonu ma le loto tumau ia Iesu Keriso. O Iesu Keriso o le malamalama lea, ua avea ma malamalama o Lana Ekalesia. Ia susulu mai le malamalama o le Alii i ana galuega fai.

.....



**ASO SA:** 23 ME 2021 (ASO PENETEKOSO)

**MATAUPU:** UA SUIA UMA (All change)

**SINI:** Ia a’oa’oina le fanau, ia malamalama le fanau, i suiga ua oo i le au Kerisiano ina ua Afio ifo le Agaga Paia i o latou luga.

**TUSI FAITAU:** Galuega 2: 1 – 21

### **FESOASOANI MO FAIAOGA:**

Ina ua Afio Iesu i le lagi, sa i ai pea le lagona o le popole, atuatuvaale ma le fefe i le au so’o. E lei iloga foi ona moni le talitonu ma lo latou faatuatua. Ua leiloa pe faapefea ona fa’aaau le galuega ua tuu mai ia te i latou. Ae na silafia lelei e Iesu lea tulaga. O le mea lea na ia fetalai ai, a Afio o Ia i le lagi, e auina mai le Agaga Paia i o latou luga. Le fetalaiga lea a le Alii, na faataunuaina i le aso Penetekoso. Ua Afio ifo le Agaga Paia e peiseai o se laulau faiva afi ma ua faatuina i o latou ulu. O le aso lea ua suia ai le auso’o loto vaivai ma le fefefe, e avea ma so’o loto tetele ma le malosi. Ua sauni e oti mo le Talalelei ia Iesu Keriso. O le aso Penetekoso, ua faamauina o le aso fanau lea o le Ekalesia. Ona o le aso lea na lagonaina ai e le au Kerisiano uma le malosi faaleagaga e fai ai le galuega a Keriso.

O se tasi o suiga na oo i le au so’o, ua mafai ona latou tautala i gagana eseese. E le o so latou potu ma so latou atamai, ae o le silisili ese o le Agaga Paia, e mafaia ai e le tagata ona fai so o se mea. E oo foi i e ua latou le talitonu ua amata ona suia le loto tetele ia Keriso, i le avea ai ma tagata talitonu.

A fua foi ia Peteru, sa faafiti le Alii, e palaai ma fefe, ae maise lava i le taimi na maliu ai le Alii, ma oo foi ina Afio i le lagi. Ae o le Afio ifo o le Agaga Paia, na avea ai Peteru ma taitai o le au so’o, e loto tele, toa ma le toe fefe. Ae a fua foi i le taimi o le Penetekoso e lei toatele nisi na faalogo i le Talalelei ia Iesu Keriso, ae o le Agaga Paia na vave ai ona sosolo i itu e fia o

Ierusalem ma Isaraelu le Talalelei, seia oo atu i nuu ese. E oo mai i le taimi nei, ua toetoe lava so’o le lalolagi uma i le talalelei. Le talalelei, ua mafai ona tele ai suiga lelei mo le olaga o le tagata. Ae o le suiga i atunuu ma malo ua faakerisianoina. Ua tupu le alofa, ua maua le loto faamagalalo, ua nofo fealofani nisi o aiga ma malo. Ua alofa le tagata mauoa i le tagata mativa. O mea uma ia e mafai ona suia ai le tagata, pe afai na te lagonaina i lona loto, le Agaga Paia o le Atua, o lo o faamalumu mai pea i o tatou luga i aso uma.

Le Agaga Paia lava lea o le Atua, na togiolaina ai le lalolagi agasala e ala ia Iesu Keriso.

### **Uiga o Upu:**

- i) faafuasei - vave ona oo mai
- ii) taalili - leo tele
- iii) faatutumuina - ua lagona i le loto
- iv) fememeai - leai se filemu
- v) segia o latou mauili - ua ofo ma tetele

### **GALUEGA FAATINO:**

Faaliliu mai i le gagana faa-Peretania le parakalafa lenei

“Ua oo atu foi i le aso Penetekoso, sa i ai uma lava latou i le mea e tasi ma le loto gatasi. Ona faafuasei mai lea o le taalili mai le lagi, peiseai o le matagi ua agi tele mai ua tumu uma ai le fale sa latou nonofo ai.”

**PESE:** 42 (Pese ma Viiga) E le siufofoga o le alofa

### **A’OA’OGA:**

1. O Iesu e maua ai suiga lelei.
2. O le Agaga Paia o lo tatou malosi lilo lea.

**ASO SA:** **30 ME 2021**  
**(ASO SA O LE TOLU TASI PAIA)**

**MATAUPU:** **FAAILOA LE MEA E TE TU AI**  
**(Making a stand)**

**SINI:** Ia a’oa’oina le fanau ia malamalama e sili ona manuia le tagata, e tumu o le Atua ma Lona finagalo.

**TUSI FAITAU:** 2 Samuelu 21: 1 – 14

### **FESOASOANI MO FAIAOGA:**

Tasi lenei o tala e tele fesili e fesiligia ai le tupu o Tavita ma lana faaiuga na fai i le fanau a Saulo. Ua faatautauina le fanau a Risepa ia Saulo e toalua, ma le fanau e toa 5 a Mekala le afafine o Saulo. Ae foliga mai, o le oge tele ua i le taimi o Tavita i tausaga e 3, ma manatu nisi ua mafua ona o le mea na faia e Saulo, ina ua ia saili e fasioti tagata Kipeona. A o Kipeona na osi feagaiga ma Iosua, ina ua finagalo le Atua e faasao le nuu o Kipeona ia aua nei faaumatia. Ua tauto foi tagata Kipeona, e avea i latou ma fai fafie ma utu vai mo le nuu o Isaraelu. Ae ina ua tulai mai Saulo e avea ma tupu o Isaraelu, na ia le usitai i le Atua, ma oo ai ina manao e faaumatia Kipeona.

O le tupu ai la o le oge, ua manatu Tavita e togiola lea mala i le fanau a Saulo, lea na ia avatu i tagata Kipeona. O Tavita, e ui ina i ai foi ona vaivaiga, ae o se tagata e malosi lona loto i le Alii, po o a lava mea e taufaafefe mai ia te ia, e tu pea Tavita mo lona Atua, e le mafai ona liliu ese lona loto mai le Alii. O le mea lea na alofaina ma faamanuia ai Tavita e le Atua.

Ae a tatou manatu foi i le mea na faia e le tinā ia Risepa, ina ua faatautauina ma fasiotia lana fanau. O se tinā e moni lona alofa mo lana fanau. Pe oo lava i le oti, e tu pea lona alofa mo lana fanau. Ua fofola le ie talatala i le papa ua taoto ai i le ao ma le po.

Ua le fefe, ua le afaina le manogi o tino oti o lana fanau. Na toe lava o ivi, ona mapu lea o lana tatalo.

Le fanau, po o le a lava lo outou faalogotata, ma le faafiufiu i matua. E tu pea matua mo outou, o taimi lelei, o taimi foi e le lelei. O le alofa e tumu o outou lefanau. Po o le a lava le agasla o le tagata ua tu pea le alofa tunoa o le Atua, mo le tagata, e ala ia Iesu Keriso.

**GALUEGA FAATINO:** Tusigatala

**Ulutala - ‘Alofa o matua’**

**Faatonuga:** - Tusi sau talai le Ulutala o i luga  
- Ia tau o le a 2 parakalafa  
- Ia i ai se feau taua o i ai.

### **Fesili ma Tali**

1. O le a le feagaiga na osia e Iosua ma le nuu o Kipeona?  
Tali: Ia faasao le nuu o Kipeona
2. Aisea na fasiotia ai le fanau a Saulo?  
Tali: Togiola mo le oge
3. O ai le igoa o le fanau a Risepa?  
Tali: Aremoni ma Mefiposeta
4. O ai Mekala?  
Tali: Afafine o Saulo
5. O ai le tama o Risepa?  
Tali: Aia

**PESE:** 168 (Pese ma Viiga)

**A'OA'OGA:**

1. Ia tu mo le Atua.
2. E tutoatasi lava le Alofa o Iesu Keriso.
3. Aua le fefe e tu mo le mea moni.

.....

**ASO SA: 6 IUNI 2021**

**MATĀ'UPU: O LE ATAMAI O IOPU  
(The Wisdom of Job)**

**SINI:** Ia malamalama le fanau o le atamai o Iopu o lona iloa o le Atua o Lē na faia mea uma.

**TUSI FAITAU:** Iopu 1:6-22

**FESOASOANI MO FAIAOGA:**

O Iopu o le auauna a le Atua, o lē sa mata'u ma talitonu i le Atua. O ia foi o le tagata sa fialia e tatalo i le Atua, mo le manuia o lana fanau e le gata i le tino, ae sili ai lo latou ola fa'a-le-agaga. O ia o le tagata poto na fa'amanuiaina e le Atua i le tele o mea, ae o ia foi o le pou tu o le ola fa'atuatua i le va ma le Atua. Tasi le mea e le i iloa e Iopu, o le taua lea i le lagi i le va o le lelei ma le leaga, po o le Atua ma Satani.

E le'i iloa e Iopu o le gata, po o Satani lea na ia fa'asese le ulua'i tagata, o lea ua sau e fa'aāoga lona tagata e fa'asagatau ai i le Atua. Na silafia lelei e le Atua, le tonu o le amio a Iopu i ona luma, ma na matuā talitonu foi le Atua, e le mafai e Satani ona fa'asese lana auauna. E pei ona ta'ua i le fuaiupu e 8, o lo'o fa'apea mai le Atua, o Iopu o lana auauna, e leai se tasi e tusa ma ia i le lalolagi, aua o ia o le tagata amiotonu ma sao lana amio, o le ua mata'u i le Atua ma 'alo'alo ese i le leaga.

O le ala lea na fa'ataga ai e le Atua Satani, na te fa'ao'o puapuaga ia Iopu, ina se'ia matuā iloa tino lana amiotonu i luma o le Atua, ma fa'ato'ilaloina ai le ti'apolo. E tele la puapuaga na o'o ia Iopu e tofotofoina ai lona fa'atuatua. E le gata o ana meatotino ma lona tamao'aiga, ae na o'o lava i lana fanau pele, na ave'eseina lava mai ia te ia. Ma e 27 ii nei tiga ogaoga o le ola na fetaia'i ma si toeaina, ae le'i avea lea ma ala e ave'eseina ai lona talitonuga i le Atua, pe upu vale foi i le Atua. O le fa'ailoga muamua lea o le poto o Iopu.

Fai mai le fuāi'upu e 20, ina ua uma ona ta'u atu ia Iopu o mea uma ua tutupu i lona tamao'aiga fa'atasi ai ma lana fanau ua fasiotia, ona tula'i ai lea o ia ma saei ona ofu, ma tafi lona ulu, ma fa'apa'ū faō i le 'ele'ele. O le saei o ona ofu, o le fa'ailoga o lona saei o lona lava tagata fa'atauva'a. O le tafi o lona lau ao, o le fa'ailoga o lona fa'anoanoa loloto ma le ofoina atu o lona loto i le Atua, e toe fa'alelei mai e le Atua. I le ma lana fa'apa'ū faō i le 'ele'ele, o le fa'aaliga o lona loto fa'afetai po'o lona loto vivi'i i le Atua.

Aisea ua vivi'i ai Iopu i le Atua, ae o lea ua matuā tigaina ma mafatia i puapuaga ua o'o ia te ia. O le fa'ailoga lea o lona poto ma lona mata'u i le Atua. O le poto o Iopu na ia iloa lelei ai o le Atua na ia foa'i atu mea uma ia te ia, o le Atua fo'i e pule aoao i mea uma. O le uiga lea o ana upu e pei ona ta'ua i le fuāi'upu e 21. "Na ou sau le lavalavā mai le manava o lo'u tinā, o le a ou foi atu i ai ua le lavalava; na foa'iina mai e le Ali'i, ua 'ave'eseina e le Ali'i, ia fa'amanuina le suafa o le Ali'i".

Malamalama lelei Iopu e leai lava se mea e tasi na sau ma ia i le lalolagi. O mea uma ua ia maua o a le Atua ia. O le fa'amanatu taua foi mo tatou, e ao ina tatou malamalama o mea uma ua tatou maua, e le ni a tatou mea. O mea uma e a le Atua, e pule ai foi le Atua e o'o lava i lo tatou ola. O tatou ua na o se efuefu o le 'ele'ele na faia ai i tatou, peita'i o le ola ma le malosi fa'atasi ai ma le poto ma le atamai ma mea uma, o mea na foa'i mai e le Atua. O lona uiga o le tagata e malamalama ma iloa ia mea, ma mata'u i le Atua, o le tagata poto e tusa ma le manatu o Iopu. E pei ona ta'ua i le matā'upu e 28 a'o le fuāi'upu e 28 o le tusi lava

lenei a Iopu, o lo'o fa'apea mai Iopu, "Fa'auta, o le mata'u i le Ali'i, o le poto lava lea; o le alo ese i le amio leaga, o le mafaufau lea".

O le poto o Iopu na ia mata'u ai i le Ali'i, ma savali i ala o le Ali'i, e ui ina feagai ma tiga. Sa tumau pea lona fa'atuatua ma lona talitonu i le Atua, e pule le Atua i mea uma e o'o lava i lona ola.

***GALUEGA FAATINO:***

E manaia pe a fa'asoa lau susuga a le faiaoga ma le vasega i le uiga o fuaitau nei.

Iopu 28:28, ma le Fa'ataoto 1:7

***PESE:*** 237 (Pese ma Vi'iga)

***A'OA'OGA:***

1. O le tamaitiiti poto e malamalama i le Atua ma mata'u i ai.
2. Ia tatou fa'ailoa atu lo tatou poto e ala i la tatou amio lelei.
3. Aua le upu vale i le Atua, e iloa ai lou vaivai.

.....

***ASO SA:*** 13 IUNI 2021

***MATA'UPU:*** ***E FAASOLO PEA INA MALOSI LE OLAGA (Life is stronger yet!)***

***SINI:*** Ia malamalama tamaiti o le oti e lē o le muta'aga lea o le ola, ae e i ai le fa'amoemoe i le ola e fa'avavau.

***TUSI FAITAU:*** Iopu 14:1 – 17

***FESOASOANI MO FAIAOGA:***

O le matā'upu lenei o le tusi o Iopu, o lo'o fesiligia ai e Iopu le aga'iga o le olaga o le tagata. E pei e foliga e le o malamalama Iopu i le gasologa o le olaga o le tagata e pei ona fa'ata'oto mai ai e le Atua. Na pau le mea o lo'o malamalama lelei i ai Iopu, o mea uma o lo'o sapi ai le tagata, o mea uma lava na aumai mai le Atua. Fa'atasi ai ma le ola, o le ola e pule ai le Atua.

Peita'i o le va'ai a Iopu i le ola o le tagata, e gata i le tu'ugamau. E le o matuā manino Iopu i le ola i tala atu o le tu'ugamau. E foliga mai i le manatu o le toea'ina, ua sili atu le la'au i le tagata. E pei ona ia ta'ua i le fuai'upu e 7, o lo'o fa'apea ai ana upu, "A ta le la'au, e fa'amoemoe i ai ia toe tupu, e le aunoa foi ma ona tatupu.

O lo'o tautala Iopu i le natura o mea na faia e le Atua, e pei o le la'au a ta e toe tatupu ma toe ola mai ona lālā ma ona lau ma toe fua mai. Peita'i le tagata, e leiloa lona fa'amoemoe po o fea o ta'oto ai. Lea la e pei ona fesili ai i le fuai'upu e 10, "A'o le tagata e oti o ia, ma ta'atia, e to foi lana manava ona ifea lea o ia?"

O se fesili o le lē mautinoa ma le leiloa tonu po o fea e agai i ai le tagata pe a oti. A'o le fesili, e moni ea e le'o iloa e Iopu ia mea. O le upu moni lava, o lo'o malamalama lelei Iopu i le tali o ana fesili. A silasila i le fuaiupu e 14, o lo'o fa'apea mai Iopu, "Afai e oti le tagata, e toe ola mai ea o ia? Ou te faatalitali atu i aso uma o le taua ua tofia ai a'u, se'ia o'o ina suia o a'u".

O le manatu o Iopu, a oti le tino agasala, e toe ola mai ea? O le mea mautinoa e le toe ola mai le tino lea. Ae o le tagata e manumalo i le taua e pei ona ta'ua, o le tagata lea e toe ola mai i le ola e fa'avavau. O le taua e pei ona ta'ua, o le taua a le tagata ma le lalolagi. Le lalolagi o puapuaga ma faigata. Le lalolagi o le lelei ma le leaga, a'o le taua i le va o le tagata ma Satani.

O le taua lea e ao ona manumaloina e le tagata, ona mautinoa lea o lona toetu mai i le ola e fa'avavau. E le o le tino e pala, a'o le tino e ola pea e pei ona saunia e le Atua mo le tagata fa'atuatua ma tumau ia te ia e le aunoa. O lona uiga, o le olaga lenei o lo'o ola ma soifua ai le tagata, e o'o ina matua ma vaivai, ae o le ola fou

ua saunia e Keriso mo i latou e tumau i le fa'atuatua, o le olaga lena e fa'asolo ina malosi ma tumau.

O le a'oa'oga mo tatou, ia tatou tumau pea i le fa'atuatua ma le talitonu i le Atua ma lona Alo o Iesu Keriso. Ia iloa e tagata o tatou o tamaiti ma tagata fa'aolaina e ala i a tatou amio, ina ia atagia ai le olaga fa'a-Iesu.

### ***GALUEGA FAATINO:***

Tusi mai sau solo e fa'atatau i le “Oti”, e tusa o le manatu o Iopu e pei ona ta'ua i le matā'upu.

***PESE:*** 357 (Pese ma Vi'iga)

### ***A'OA'OGA:***

1. Ia tumau lo tatou talitonu i le toetu o Iesu, o lo tatou manumalo lea e fa'avavau.
2. O le oti i le tino, e le o le muta'aga lea o le ola o le tagata fa'atuatua..

.....

***ASO SA:*** 20 IUNI 2021

***MATAUPU:*** ***OLAGA SA'O I TAIMI O AFĀ***  
**(Right living in the storm)**

***SINI:*** Ia malamalama tamaiti po o le a le olaga sa'o i taimi o afā.

***TUSI FAITAU:*** Iopu 31: 1-15

### ***FESOASOANI MO FAIAOGA:***

O le upu *afā/storm* e pei ona fa'aaogaina i le manatu autu, o lo o aumai i le gagana faafaatusa – metaphorical language. Ua faatusa ai puapuaga na oo ia Iopu o se afā/storm.

I le soifuaga o aso uma, a tutupu afā po'o matagi malolosi, o le upu moni, e leai se isi e atoatoa sona fiafia. E tupu pea le popole ma le atuatuvaile i taimi uma e faalogoina ai le agi malosi o le savili. Pe afai foi e faalogo ma vaavaai i aafiaga o le siosiomaga ona o afā, o lagona lava o le lē mautonu e oo mai i le tagata soifua.

O lona uiga, o le olaga sa'o i le taimi o afā po o matagi malolosi, i le soifuaga lena tatou te i ai, o le olaga o le lē mautonu ma le popole, ma oo ai lava i le faanoanoa ona ua leai se faamoemoe (hopeless).

Peitai, o le tusi faitau o lena aso ma le tala ia Iopu, o lo o manino ai, o le olaga sa'o i taimi o afā po o puapuaga, o le onosa'i ma faapalepale. Ia aua nei avefa matagi vale poo faigata o le ola e muta ai le faamoemoe o le tagata ola. Ae ia avefa afā/puapuaga ma ala e saga tupu ai le faatuatua i le Atua Soifua.

O le mataupu e 31 o le tusi o Iopu, o lo o faamauiina ai upu a Iopu e faatatau i puapuaga ua oo ia te ia. O upu o lo o faamanino ai le faatuatua pea o Iopu i le Atua e ui ua avefa mea uma sa ia te ia. O le talitonuga o Iopu, o le Atua lava le faamasino sili. O a mea leaga ua ia faia, o le Atua lava e faasala mai ia te ia. O lo o faaaogaina e Iopu le faitau: “*Afai ua...*” e tomua ai ona lagona mautinoa, o loo soifua le Atua e faamasino mai ia te ia ma laasaga uma o lona ola.

O le olaga sa'o lea i taimi o afa/puapuaga i le manatu o Iopu: Ia tumau i le faatuatua, ae le o le popole ma lē mautonu.

O se feau taua lea mo i tatou le fanau, o lena soifuaga, ua le masino auala o lo o agi mai ai afa ma matagi e faaleaga lo tatou ola faatuatua i le Alii. Ao le fautuaga a Iopu, ia aua nei muta le faamoemoe. Po o a lava, faafitauli, ia mau pea le toovae, ma ia saili i le Atua e alofa mai, e maua ai lo tatou toomaga.

**GALUEGA FAATINO:**

1. O le a le uiga o le upu – afā o lo o fa’aaogaina i le manatu autu?

Tali: *O puapuaga*

2. O lo o manino i le tala le faatuatua o Iopu i le Atua e ui i faigata na oo ia te ia, ae faapefea tatou, tatou te tutumau i le faatuatua e pei o Iopu pe leai?

Tali: *Ia manino ni manatu e lagolago ai le tali Ioe po o le Leai.*

3. O le a le olaga sa’o i taimi o afā e pei ona faamamafa e le tatou mataupu?

Tali: *Tumau ma faatuatua i le Atua.*

**PESE:** *Ou te tumau ma pipii mau....*

**A’OA’OGA:**

1. Ia aua le popolevale pe a tutupu faigata.
2. O le Atua lava le tali o puapuaga o lenei olaga.
3. Tumau i le tatalo.

.....

**ASO SA:** *27 IUNI 2021*

**MATAUPU:** *IA ILOA UA LATA MAI LE TAUMAFANAFANA*  
**(Know the summer is already near)**

**SINI:** Ia malamalama tamaiti i le uiga o le faataoto i le mati ua lē fua i le taumafanafana.

**TUSI FAITAU:** Luka 21: 29-31

**FESOASOANI MO FAIAOGA:**

O le *mati*, o se laau o lo o faatusa i ai Isaraelu ma lona tamaoiga mai le Atua i nisi o tusitusiga o le Tusi Paia – *Hosea 9:10*. O lo o i ai foi le talitonuga, e i ai mati e fua mai i fua lelei, e i ai foi mati e fua mai i fua leaga. Ma e foliga foi faapena le soifuaga o Isaraelu i lo latou va feagai ma le Atua. Na amata mai lava i le Feagaiga Tuai, seia oo mai lava i le Feagaiga Fou o lo o fa’auau pea ia uiga o Isaraelu e peiseai o se mati. O le taimi ua usiusitai i le Atua, o le taimi foi ua faalogogatā.

O le faataoto, i lona uiga masani, o tala faafaatusa e faamatalaina e Iesu e momoli ai se feau taua i loto ma agaga o tagata faalogologo. I faataoto o lo o taua i le Tusi Paia, o lo o fa’aaogaina lava e Iesu vaaiga masani o lo o ola ai tagata Isaraelu/Iutaia: ft – *lulu saito, vine ma ona lala, o le mati ma isi*. O le faamoemoe ia faigofie ona manino ma malamalama i le feau o lo o faailoa mai.

O le faataoto i le mati o le a fua i le taimi o le taumafanafana, ua faamatala ai e Iesu le tatau ona nofo tapena ma sauniuni tagata uma aua o le a oo mai le iuga o le lalolagi. O le laau o le mati, o lo o faavasegaina o le isi lea laau e fai ma faailoga i tagata o le a oo mai le taumafanafana. E totogo loa fua o le mati, iloa loa e tagata, o le taumafanafana ua latalata mai. I le finagalo o Iesu, e faapena le oo mai o le iuga o le lalolagi, aemaise o le malo o le Atua. E le o fuatia la i le tau totogo o fua o le mati, a o mea e tutupu e pei ona taua i le amataga o le mataupu lenei e 21 o le tusi o Luka. (*Silasila i mea o lo o lisiina i le fuaiupu e 10 faasolo mai i le faaiuga o le mataupu lea 21*).

O le faataua a Iesu, ia nofo tapena ma sauniuni tagata uma ao le’i oo mai le iuga o le lalolagi. A o le fesili tele lea, e faapefea ona tapena o tatou tagata mo le malo o le Atua? O le tali, e tapena i le taimi lenei, o le olaga lenei. O ou aso ma lou taimi e faaalu mo le Alii, o lau tapenaga lava lena mo le malo o le Atua. O lau amio ia lelei i so o se itu, o itu taua na o le soifuaga mo le agai atu i le malo o le Atua.

Ia tatou mataala ua latalata mai le taumafanafana, o le iuga o le lalolagi ua i o tatou faitotoa.

***GALUEGA FAATINO:***

Ia tuu le avanoa i le vasega e faasoa ai, po o a mai a latou tapenaga mo le oo mai o le iuga o le lalolagi.

***PESE:*** 166 (Pese & Viiga)

***A’OA’OGA:***

1. Tapena lou ola mo le malo o le Atua.
2. Omai ia, tatou finafinau mo le Atua ma lona finagalo.
3. Ia iloa le taumafanafana ma saununi ae lē o le nofonofo.

.....

***ASO SA :*** 4 IULAI 2021.

***MATAUPU :*** ***O LE TUSI TA’IALA MO LE OLA.***  
***(A handbook for living)***

***SINI:*** Ia malamalama le vasega i le taua o Upu a le poto o lo o aumai i le Tusi Taiala mo le Ola . E aoga e a’oa’o ai, e a’oai, e faatonu, ma faapoto ai i le amiotonu.

***TUSI FAITAU:*** Faataoto 1 : 1-7.

***FESOASOANI MO FAIAOGA.***

E eseese lava tu ma aganuu i talitonuga o atunuu eseese e faatatau i le faauigaina o upu a le poto e pei ona tatou iloa ma faitau i ai i tusi taiala mo le ola, po o Afioga Paia a le Atua. E pei o nisi foi ia o Faataoto a Solomona le atalii o Tavita, o lē sa fai ma tupu ia

Israelu, i le vaitau o le gagaifo o le la, po o le matua o lona soifua. O lo’o talanoa ai Solomona i le tele o mea eseese ua a’oa’oina mai ai o Ia i lona olaga a o talavou, (talk from experience).

E pei ona silafia, o le poto o Solomona o se meaalofo na tuuina i ai e le Atua e taitai ai lona nuu. O Faataoto e a’oa’o ai le tomai ma le poto i so o se itu ma so o se matātā e pei ona moomia mo le ola lelei o le tagata. E le o ni tusitusiga e na ona pei e logomalie i le faalogo o taliga, ae o faataoto po o tusi taiala e a’oa’oina ai le poto i so o se mea, aua lava le ola manuia o le tagata. Lea e tele a foi ina faatusaina e nai o tatou matua ia tusi, i le faaogaina lelei i ai o le mafaufau.

Ae ua le sologa manuia nei aso, o le upu moni, ua amata ona mou malie atu le faaogaina o ia a’oa’oga aogā i nei ona po. E mafua lava ona o le lē faatauaina o nei tomai aoga ma malamalamaga taua e pei ona aumai i Tusi taiala mo le Ola. Ua amata ona mafuli le toatele i tulaga tau i fesootaiga i luga o upega tafa’ilagi, ma ua tausisi lava i ai i ia faiga fou o le olaga. Ua faasolo ina tuua ai le mea moni ae ua alu sese ai a ma le lē malamalama i le tele o mea. Ua faatalale i a’oa’oga taua mai tusi taiala o le ola e uiga i tomai ma agavaa e onomea ma alagataua ona faaoga mo le ola manuia. Ua tauau ai ina solo le falute ma manunu ai le to’au.

Ae o le tuualalo mai o le tusi taiala mo le ola, a fai e te fia mauaina le poto, e te amata lava i le ola mata’u i le Atua. Ia iloa e le tagata o le Atua o le pogai o le ola ma le puna o faamanuiaga uma. O le ala lea e tatau ai ona suia o tatou tagata tuai e avea ma tagata fou ia aoga mo le Alii ma ana feau. Ia tatou tausisi i uiga lelei e pei o le faamaoni, mataalia, loto alofa, o le pulea o lou loto, ma aloalo ese mai tuinanauga e aafia ai le soifua ma le ola. E ao ona tatou galulue faatasi mo se auala e faasinotonu ai tagata i le Atua.

Ia faailoa i tagata mea e lē tatau ma lē o gatasi ma le finagalo o le Atua, e maumau ai taimi ma aso o le ola. Ae ia tatou tutu faatasi mo le galuega a le Atua ma lona malo. Aua o le upu moni, e le o se mea lelei ona oo mai o maseiga, aemaise o mala ma puapuaga ona o lo tatou faatamala. O le mea lea ia aua ai nei o tatou

faatuatuanai i fautuaga taua ma le aoga ua aumai i Tusi taiala mo le Ola, po o Afioga a le Atua e limataitaina ai lo tatou ola tatou te maua ai le poto sili mai le Alii.

### **Uiga o Upu:**

i) faataoto - O tusitusiga a e popoto. (wisdom writings)

### **GALUEGA FAATINO: FETUFAAIGA.**

Vaevae le vasega i vaega e lua.

Vaega muamua, @ Ta'u mai poo le a se tāua, ma se aogā o le Tusi taiala mo le ola, i le olaga o le tagata?

Vaega Lua, @ Faailoa mai pe faafelea ona maua e tagata le poto, ae po o le a foi se taunuuga o le poto?

**PESE :** O le Poto e tāua.

O le poto e taua, i le olaga o le tagata.  
Leai se mea e oi ai lou loto, pe'a e mauaina o le poto.  
O le mamalu, e faaeaina, o le oa le tamaoaiga.  
Tupulaga saili ia le poto, ma ia teu mau i lou loto.

Le palealii o le tagata, o le poto mo aso uma lava.  
Pei o le sulu malamalama, i le olaga o le tagata.  
E suegata e taugata, e anagata o le poto.  
Ia manatua i lou loto, e faafeao oe e le poto.

### **A'OA'OGA:**

1. Ia mata'u i le Atua e maua ai le poto.
2. Ia faalogo ma fa'aaoga upu mai le Tusi taiala mo le ola.
3. O le ava i matua e faaumiumi ai aso o le ola.

**ASO SA :** **11 IULAI 2021(ASO SA FGFL-[CWM])**

**MATAUPU :** **ELEELE O FINAUGA**  
**(Contested ground)**

**SINI:** Ia malamalama le vasega, o le fetineia'i i se oga-eleele e tasi, e tupu ai finauga mo le ola lelei o so o se meaola aemaise i laau toto.

**TUSI FAITAU:** Mataio 13 : 24-30.

### **FESOASOANI MO FAIAOGA:**

E masani lava ona fa'aaoga mai e Iesu le mau faataoto e pei ona aumai i Tala Lelei ua faamauina e le au fai Evagalia ( Gospels). E pei foi ona iloa lautele ai, o Faataoto, o tala pupuu ia o lo o aumai ai se feau aoga faa le Agaga. A o se feau foi o lo o aumai i se uiga faalilolilo. O le ala lea e manaomia ai le fai i ai o se tatou galuega, ma se taimi tatou te mafaufau loloto i ai. O le fuaiupu e 36 – 43 o lo o ua toe faamatala mai ai e Iesu uiga o nei Faataoto lea e faataoto i le malo o le Atua. O le malo e le tutusa ma malo o lo o tou soifua ma o tatou ola ai nei aua o le malo o le ola faa le agaga. E pulea e le Atua.

Aua a fai ae tatou le iloa lelei ma tatou le suesueina le taua o nei faataoto, o lona uiga, o le a tatou misia foi ma o tatou le mauaina sona aoga ma sona taua i lo tatou ola. Aua e aoga e a'oa'oina ai i tatou i mea o le olaga nei, ma faa lautele ai lo tatou iloa lelei o le Alii.

I le Mataio e sefulutolu, e amata lava i Faataoto e fa e faataoto i mea o le olaga nei. E pei o le natura o le ola mai o laau e tutupu mai i fatu laau. E pei foi o le laau o le saito lea e faatusa i le tupu mai o le malo o le Atua i le lalolagi. Peitai i le aga'iga'i i luma, e le faigofie. E pei ona aumai i le tala o le Faataoto i le lulu saito; (Mataio 13 : 1 – 9) ua tatou iloa ai e suegata le manuia. E faapena foi i le Faataoto i saito na luluina ae tutupu faatasi ae ma vao leaga ia po o le titania. Lea na fesili ai auauna i le matai pe mai fea nei



titania aua ua na o le saito sa ia luluina, ae tali le matai, ua faia lenei mea e se ua ita mai ia poo le fili foi.

O i tatou te iloa tonu ai, o le galuega a le Atua, e i ai taimi e fetineiai ai i mea faigata ma tauau ai ina le sologa lelei ma faaletonu ai le galuega. O nisi o taimi e mafua lava ona faaletonu, ona o i tatou o tagata o lo o faia le galuega a le Atua. I se isi foi itu, ua matua faigata ona iloa tonu le tagata sa'o mai le toatele o isi tagata. E faigata foi ona iloa tino le tiapolo po o le fili po o fea tonu o i ai. Ae o le upu moni lava ia, o mea sese, o mea faigata, o le manatu-faapito, ma le ola agasala, o nisi ia o mea e ono lamatia ma faaleagina ai le galuega a le Atua. Ua foliga ai i tatou i se eleele o finauga o lo o finau ai ni laau toto e fia maua le ola. E le gata i meaai po o minerale, ae faapena foi ona finau mo se vai atoa ai ma le malamalama o le la ina ia ola lelei ai.

Ae o le tuualalo mo i tatou, ia aua a nei o tatou gauai pe fiafia i tulaga taufaasese ma le faatosina mai a le tiapolo. Ae ia tatou manatua pea nei faamanatu taua ma a'oa'oga aoga mai nisi o Faataoto e pei ona tatou faitauina. E aoga mo i tatou, ina ia tonu ai a tatou filifiliga uma aemaise o a tatou faaiuga fai, ina ia o tatou aloalo'ese ai mai i mea sese ma mea faaletonu. Ae ia fai so tatou sao taua ma se galuega lelei mo le Atua ma le Tala Lelei. Ae ia tuu pea lava le faamasinoga mulimuli i le Atua, nei tusa i tatou ma elelele o finauga e finau ma taua i mea faaletino e maua ai le ola i le tino ae ama ai la tatou vaai i mea e ola ai o tatou agaga. Aua o le upu moni o lo o i le Atua lava le faamasinoga sili ma le pule tonu e fua i le ituaiga finauga o lo o ave i ai la tatou faamamafa. Ia avea i tatou ma eleele lelei e maua ai le ola mo agaga o e o taumafai atu mo le Atua ma lona malo.

### **GALUEGA FAATINO: TALIGA FESILI**

- (1) Ta'u mai po o le a le uiga o lea upu eleele o finauga?
- (2) O le fea o faataoto ua taua o tupu ai le eleele o finauga?
- (3) O le a se fofo e te'a ai le finauga o ia elelele?
- (4) O le a se ituaiga eleele e tatau ona fai mo'i tatou?

**PESE:** Tatou finau atu ia. (Pese ma Viiga 176)

### **A'OA'OGA:**

- 1 Ia tatou finau mo tulaga uma e ola ai o tatou agaga
- 2 Ia usitai i aoaoga mai Afioga a le Atua
- 3 Ia fai i tatou ma eleele lelei e maua ai le ola i Agaga o nisi.

.....

**ASO SA: 18 IULAI 2021**

**MATAUPU: O LE IVI O O'U IVI (Bone of my bone)**

**SINI:** Ia malamalama le fanau i le so'otaga o Atamu ma Eva, atoa ai ma le faamoemoe o le Atua ina ia tino e tasi i laua.

**TUSI FAITAU:** Kenese 2 : 18 – 25.

### **FESOASOANI MO FAIAOGA:**

O le foafoaga a le Atua e foliga mai fa'ato'a atoatoa ina ua maea ona faia e le Atua le fafine. E i ai le manatu e mafai lava e le Atua ona fauina le fafine mai le efuefu o le eleele, faapei ona faia e le Atua o le tane. Peitai ua filifili le Atua ia faia le fafine i le ivi o Atamu. O le faailoga o le tatau ona avea o le tane ma le fafine ma tino e tasi ina ua tuufataisa i le faaipoipoga. Ua tuufatasia i la'ua i le loto e tasi ma le tino e tasi. O le faaaliga manino mai lea o le finagalo o le Atua mo e tuu faatasia i faaipoipoga. E ui ina eseese matafaioi ua tuuina e le Atua i le tane ma le fafine, ae tasi a le faamoemoe o le Atua mo le tagata, ia iloa ona ava ma matau ia te Ia. Ua avatu e le tama le ola i le fafine, ae ua tuuina e le fafine le ola i le lalolagi. E le tatau la ona i ai se agaga poo se faamoemoe e sili le tasi i le isi, aua e tutusa uma i laua i le Atua.

Na faia e le Atua le tuu-faatasiga o Atamu ma Eva o se meaalofo taua moi laua. Na faia o se fiafiaga sili moi laua. O se faatasiga e lei faia ina ia faamalieina ai loto, ia po o se faataunuuna o se tu ma se aganuu. Peitai, e tolu ni vaega taua e finagalo le Atua ina ia tausia e le tagata. Muamua, e tuua ai e le tane lona tama ma lona tina, ae ia tautino ma folafola i luma o e molimau lona alofa moni i lana ava. O lona lua, ia faatasia i la'ua e ala i lo laua malilie faatasi ma 'au'au faatasi e galulue felagolagomai aua se manuia o lo la aiga, tusa lava po o a tulaga e oo iai. O le faailoga o le alofa moni o le isi i le tasi. Ma lona tolu, ia avea i laua ma tino e tasi, ma ia feofoofotai lo laua alofa faapei ona teuina ma saunia mo faaiipoipoga faapaiaina. O le agaga ina ia mausali i laua o e ua tuufaatasia e le Atua.

E faapena se vaaiga i le soifuga o Atamu ma Eva, faatasi ai ma le finagalo o le Atua mo i laua. I le amataga mai o le la aiga sa leai so laua manatu i lo laua le lavalavā e pei ona faia ai i la'ua ma tuufaatasia ai i laua e le Atua. Peitai, ina ua agasala i la'ua i lo la le usiusitai i le finagalo o le Atua. O inā sa o laua lagona ai ua mamā po ua o la maasiasi i luma o le Atua. Ua peiseai ua i ai se pa pupuni ua va a'i ma le Atua. Ua amata ona lalafi i luma o le Atua. Ae o le upu moni, e le'o le finagalo lea po o le faamoemoe na fai ai le tagata e le Atua. O lona finagalo ia fealofani i laua ma ia usitai, ia ava ma mata'u le tagata i le Atua.

O le ivi o ou ivi, o lona uiga o le ivi lava o Atamu na fai ai Eva, ua toe malaia ai Atamu. E pei foi o le muagagana faa Samoa, O si ota lima lava ua toe paia ai si ota mata. Ae ua mafua ina ua faaseseina gofie le tagata i le faaososoga a le alii o le lalolagi po o le tiapolo.

O lona uiga e tataua a ona aua nei faaseseina gofie i tatou e le tiapolo. E manaomia ai le malosi atoatoa o lo tatou ola talitonu ma faatuatua i le Atua e ala i lo tatou faalagolago i le fesoasoani mai o le Agaga o le Atua ia i tatou, tatou te malolosi ai ma lē faaseseina gofie ai i tatou e Satani.

O le faamoemoe foi lena o lo o aumai i lenei mataupu o le “ivi o ou ivi” e faapei ona faatasia o le tane ma le fafine i le faaiipoipoga, e faapena le finagalo o le Atua moi tatou. Ia faatasia i tatou ma Ia.

O le faatasiga e tumau, e le toe tuueseeseina e se tasi. O le faailoga o le Alofa o le Atua e tumau moi tatou uma, e le mafaia e se mea e tasi ona aveeseina.

**GALUEGA FAATINO:** Faamatalaga

Faamatala mai i ni au lava upu le uiga o le mataupu o le “Ivi o ou ivi”, ae po o le a se faamoemoe o le Atua na ia faia ai le tagata?

**PESE:** Ave lou ola ia aoga, Pese ma Viiga 157

**A'OA'OGA:**

1. Aua nei faaseseina gofie i tatou e le tiapolo.
2. Na faia e le Atua le tagata ia foliga ia te Ia
3. Ia mauaa ma mausali lo tatou faatuatua i le Atua.

.....

**ASO SA:** 25 IULAI, 2021.

**MATAUPU:** AGAALLOFA AE LĒ O LE FASIOTI.  
(Caring not Killing)

**SINI:** Ia malamalama le fanau, e finagalo le Atua ia agaalofo i tagata, ae le'o le fasioti. E malaia ma faasalaina e le Atua le na te faaoo le oti i le isi tagata.

**TUSI FAITAU:** Kenese 4 : 1 – 16.

**FESOASOANI MO FAIAOGA:**

O le agaalofo, o le tasi lea natura o le Atua e finagalo ia tatou ola ai. O lea o lo o tatou i ai pea i le tala o le uluai tagata, ia Atamu ma Eva, ma le la fanau. O le tulieseai ai o i laua mai le faatoaga o

le faasalaina lava lea e le Atua o i laua ona o lo laua le usiusitai i le finagalo o le Atua. Ua le toe faigofie le olaga ua o la ola ai, aua ua faasalaina i laua e le Atua. O Atamu e ai ma le afu o ona mata, ao Eva e fanau o ia ma le tiga.

Ua fesaga'i ma mea faigata o le ola, ona ua la le usiusitai i le Upu a le Atua. O le mafuaaga foi lena ua femisaai ai la la fanau tama muamua, o Kaino ma Apelu. Talu ai ona o le ita tele o Kaino ina ua silasila le Atua, po ua talia e le Atua le taulaga a Apelu, a ua le silasila atu o Ia i lana taulaga.

O Kaino o le galue fanua o ia, ao Apelu o le fai lafu manu. Na ave e Apelu uluai tama pepeti mai ana lafu e osi ai lana taulaga i le Atua, ao Kaino na ia ave fua o ana faatoaga e osi ai lana taulaga. E leo taua mai i tusi se mafuaaga na le silasila ai le Atua i le taulaga a Kaino, peitai, O le loto tiga o Kaino na ia fai ai ia Apelu la te o ma ia i le fanua, ona ia tulai atu lea ma fasioti ia Apelu lona uso.

O le fasioti tagata muamua lea ma o se faamaligi toto muamua foi lea i tala ole Tusi Paia. Ua lilo ia Kaino o le toto o le ola o le tagata, O le mea e pule ai le Atua. Ao lea ua oo i ai lana pule. Ae ina ua fesili le Atua ia Kaino po o fea o i ai Apelu, ae tali Kaino, po o ia ea o se leoleo o lona uso? O le faailoga o le le ava ma le le matau i le Atua. Talofa ua alo i le ata o le laau, ua pepelo i le Atua. Ua fetalai le Atua ia Kaino, o loo alaga mai le elelele le toto o lou uso. Ua lilo ia Kaino, o le finagalo o le Atua, ia agaalofa, ae leo le fasioti.

Peitai o le Atua lava e i ai le faamasinoga tonu ma le pule aoao o mea uma. O lana faamasinoga tonu foi lea na ia faamalaia ai ia Kaino e tusa ma lana mea sese ua fai. Ua le gata ina le toe fua lelei mai ni laau toto mo ia ai le elele, ae o le a avea o ia ma maumausolo ma o le a faasevasevaloina foi lona olaga. O inā na faato'a lagona ai e Kaino lona faatauvaā ina ua faamalaia o ia e pei ona fetalai atu le Atua, o le a malaia o ia ai le lauelele. Ua fefe o ia ma ua ia fai i le Atua a nei e fasioti o ia e se tasi pe a ia mauaina o ia. Peitai ua tuu i ai e le Atua le faailoga ia Kaino ina ia sao ai o ia e le fasiotia o ia e se tasi, ai se fasioti ia te ia e tauia faafitu le mamafa o le faasalaga e pei ona oo ia Kaino. O i tonu lea ua manino mai ai o le agaalofa ae le o le fasioti e finagalo i ai

le Atua. E ui ina faamalaia o le Atua Kaino, peitai e le finagalo o Ia ina ia fasiotia Kaino e se isi tagata. O le faailoga o le Atua e agaalofa ae le o le fasioti. O lona finagalo foi lea mo i tatou. Ia tatou lagonaina le agaga lea e tasi. O le agaalofa ae le o le fasioti. Le faamoemoe lava lena na ia auina mai ai lona lava Alo e toatasi, ina ia faaola ma laveai le lalolagi mai le agasala, ua ia saunia ai le faaolataga moi tatou uma.

### ***GALUEGA FAATINO:*** TUSIGA SOLO.

Tusi mai sau solo ia tusa ma le lua pe tolu fuaiupu tai fa laina i le fuaiupu e tasi e faatatau i le Ulusolo ua tuuina atu i lalo.

**Ulusolo:** O le au uso o Kaino ma Apelu.

**PESE:** Iesu e ou te fia fai; Pese ma Viiga 158

### ***A'OA'OGA:***

1. Ia agalelei ma agaalofa i so o se tagata.
2. Manatua le tulafono e ono, "Aua e te fasioti tagata".
3. Ia fiafia e fai mea sili e faitaulaga ai i le Alii.

.....

**ASO SA:** *1 AOKUSO 2021.*

**MATAUPU:** *E MANAOMIA LE FAI O SE MALOLOGA. (A need for rest)*

**SINI:** Ia malamalama le vasega i le taua o le fai o le malologa, auā e toe faafouina ai le malosi i le tino, mafaufau ma le agaga o le tagata; ina ua i ai se taimi e mafuta ai ma le Atua.

**TUSI FAITAU:** Esoto 20: 8 - 11.

## **FESOASOANI MO LE FAIAOGA:**

I le soifua galulue o tagata lava ia, e taua le fai o se malologa. E manaomia tele le malolo o le tino ma le mafaufau aua e i ai le taimi e lagonaina ai le vaivai mai feau ma tiute o lo o feagai ai i aso uma. O le malolo ai la o le tagata, e fai ma auala e toe tapue ai le malosi o le tino, mafaufau faapea i le agaga; ina ia maua ai mafaufauga lelei ma le malosi o le tino e faatino ai feau ma galuega fai o lo tatou ola valaauina i so o se ala ua faasino ia i tatou e le Atua.

O le mataupu lenei e 20 o le Tusi o Esoto, o lo o faamatalaina ai uluai tulafono e sefulu na tuuina e le Atua ia Mose i luga o le mauga o Sinai mo Isaraelu, e fai ma taitaitama i lo latou soifua tau atiae mo le Atua ma le feagaiga ua uma ona o latou osia. O uluai tulafono e fa, o lo o faatatau i le va feagai ai o le tagata ma lona Atua. Ia tuu tasi lona mafaufau, o lona loto ma le agaga i le Atua na ia tatlitonu ai; o Ia lava e toatasi, o Le e paia na faia le tagata. O lea la e i ai ma le tulafono lona fa, e pei ona i ai le tusi faitau ua faasino mai mo le tatou mataupu. O le sapatu ina ia faapaiaina, e le mafai lava ona faia ai se galuega. Ioe, fai mai e ono aso e galue ai le tagata, a o le aso fitu e malolo ai ma mea uma lava o lona siomiaga. O ia, o lana fanau, o ana auauna, o manu ma le tagata ese ua aumau ma ia; latou te tausi faatasi lenei aso faapaiaina mo le Atua. O le aa o lenei tulafono, o lo o faavaeina i aso na galue ai le Atua i le foafoaina o mea uma i le amataga e pei ona taua i le tusi o Kenese. E ono aso na foafoa ai e le Atua le foafoaga, ma malolo ai i le aso fitu ina ua silasila atu o Ia; ua lelei atoatoa mea uma o lana foafoaga. O lona uiga, o le ata atoa lea ma le faatamiloga o le soifuaga o le tagata ua uma ona faataataatia mai e le Atua, e ala ma soifua ai. Peitai, afa i le aso fitu na malolo ai le Atua mai ana galuega mamana; e faapea foi i le tagata. E malolo aua o le aso lea ua faia mo le Atua. O le uiga lea o le sapatu, o le aso e malolo ai, po o le aso e malolo ma tapuai ai le tagata i lona Atua. I se isi faamatalaga, o le aso lea e mafuta ai le tagata ma le Atua e ala i ana tapuaiga fai. E faafoi ai le faafetai ma mafaufau loloto ai i le alofa o le Atua na laveaiina ma tausia ai lona ola mai

feau ma faamoemoega sa feagai ai i aso e ono sa galue ai. O le uiga moni lea o le aso faapaiaina, aua e paia Le na afua ai lea aso. Peitai i le talitonuga faa-Iutaia o lo o fa'auauina ai lava lenei sapatu faafeagaiga tuai, e pei ona finau ai foi isi ekalesia i le Aso Toonai o le sapatu moni lea. I se lagona faatauvaa o le mataupu, ua fa'aaogaina e le tatou ekalesia le Aso Sa ona o le aso na Toetu ai Iesu ma lana fetalaiga, e ao ona faatino le alofa i le sapatu ina ia faasaoina ai le ola; aua o le mea aupito sili lea ona taua. E le taua tele la i se lagona se finauga po o fea le sao, a o fea le sese. Peitai, e ao lava ona I ai se aso tatou te potopoto ai ma manatunatu i le Atua ma lona alofa mo i tatou.

E faapea foi mo i tatou uma le fanau a le Atua, o e ua talitonu ma faatuatua ia Iesu Keriso ma lana faaolataga. Tatou te faia le Aso Sa e pei ona faia ai sauniga ma tapuaiga ma aso tatou te manatunatu ai i le alofa silisili ese o le Atua. Aemaise e toe faafouina ai lo tatou malosi faaletino ae faapea foi i lo tatou ola faaleagaga aua le toe faagasologa o le isi vaiaso o le a savalia, i tiute tauave o le tagata lava ia. Peitai, e i ai foi le talitonuga; e i ai taimi paganoa ia o le tagata e mafuta ai ma le Atua, aua e le tutusa uma le malolosi o i tatou i le faatinoina o tatou valaauina.

## **GALUEGA FAATINO:** Taliga fesili.

Fa'aaoga le tala e pei ona faamatalaina e tali ai fesili ua saunia.

1. I lou malamalamaaga i le tala na faamatalaina, toe faamatala mai i au lava upu le taua o le fai o se malologa.  
Tali: Tatou te manatua ai le alofa o le Atua ma maua ai le faasiliga o le malosi, i le tino, mafaufau ma le agaga.
2. Faamatala mai po o le a tonu le mafuaaga e ala ai ona tatou faapaiaina le Sapatu?  
Tali: O le aso na malolo ai le Atua mai ana galuega, o Ia foi o Le e paia na faia le aso.

3. Fa'aali mai sou oe lava manatu, po o le fea e taua, po o le aso e tatau ona faatino ai le sapatu, po o le agaga moni e ala ai ona faatino le sapatu. (tuu le avanoa i tamaiti e fa'aali ai o latou manatu.)

4. Aisea e tatau ai ona i ai se taimi paganoa o le tagata e mafuta ai i le Atua?

Tali: E saili fesoasoani ai i le Atua i lona vaivai, aemaise e vivii ai le tagata i le Atua ma faafoi le faafetai.

**PESE:** Pese ma Viiga: 207 - Le malologa e lelei.

### **A'OA'OGA:**

1. E alaga tatau ona tatou faafoi o le faafetai i le Atua, aua o Ia na te lavea'iina lo tatou ola mai faigata.
2. E taua ma tatau mo i tatou le fai o se malologa, e toe tapue ai le malosi aua feau ma tiute tauave o aso uma.
3. E taua le i ai o le taimi tatou te mafuta ai i le Atua, tatou te manatunatu ai i lona alofa ma o tatou faaletonu, ae na te le tuulafoai mai ia te i tatou.

.....

**ASO SA:** **8 AUKUSO 2021 (ASO SA O TAMĀ)**

**MATAUPU:** **PEI SE MUSIKA I OU TALIGA.**  
**(Like music to your ears)**

**SINI:** Ia a'oa'o tamaiti ia malamalama o le silisili ese o le Atua, e ui na le auga ma lo tatou faatauva, ae mafai ona avea ma musika malie i o tatou taliga pe a tatou lagonaina le loto faafetai ina ua a'e manuia a tatou galuega fai.

**TUSI FAITAU:** 2 Nofoaiga Tupu 5: 2, 11 - 14.

### **FESOASOANI MO FAIAOGA:**

O se taumafaiga o Samoa e finauina se saolotoga mai i puleaga a isi atunuu. O se taumafaiga sa lei faigofie lona faatinoina, aua sa maua ai le toto masaa. Na maumau ai le tele o soifua ma taavao ai tagata Samoa. Peitai, tatou te manatunatu i le silisili ese o le alofa o le Atua na afua ai ona a'e manuia. Ua fai lava ma musika malie i o tatou taliga ona o lo tatou loto faafetai a'e ia te Ia, ona ua Ia tauia mai le soifua tautiga o tuua, i le finauina o lea saolotoga ua tutoatasi ai nei Samoa ma faavae ai i le Atua. O le oo mai ai foi o le Talalelei i Samoa, sa molimauina ai foi le silisili ese o le Atua na avea ma musika malie i le soifua auauna o tagata Samoa i le galuega faa-misionare i le pasefika.

I le mataupu leni e 5 o le tusi e lua o Nofoaiga Tupu, ua maea le fausiaina o le malumalu e pei ona faataunuaina e Solomon le tupu ma Isaraelu. O lea na faapotopoto ai e le tupu, toelaiina, matai uma o ituaiga ma alii sili i Ierusalem latou te aumaia le ato laau mai le aai o Tavita, o Siona. Manatua foi tamaiti o le atolaau lea, o le nofoaga lea po o le afioaga lea o le Atua sa iai ia Isaraelu a o faimalaga mai ai i le vao ina ua tuua Aikupito e agai atu i Kanana le nuu folafolaina. Peitai, o lea ua aumaia ina ia tuu ai i le vaega ua faaigoaina, o le mea pito sili ona paia o le malumalu ua saunia mo le Atua.

O lea na latou faia ai lea o le tausamiga, e pei ona taua lo latou faia ai i le fitu o masina. O le tausamiga lea e faia lava e Isaraelu mo le falefetafai e malu i ai le atolaau o le Atua ma faatino ai a latou sauniga e manatunatu ai i le alofa o le Atua ia i latou. O lea ua latou faatinoina e faaulufale ai le oloa na faasaina e Tavita mo le Atua, aemaise le tuuina atu o le atolaau i le mea paia e afio ai le Atua. Ua latou ili pu, ta a latou napeli, o kitara ma sumepalo, o laaupese foi e pei ona nafa ai ma le au sa Levi uma, ma pepese. Ua avea ai foi ua peiseai o se toatasi (fuaiupu 13), o le faailoga o le loto e tasi ma le agaga ua tasi e lagiina ai le viiga ma le faamanu i le Atua. O lo o faailoa foi i upu o le latou pese fai mai,

"Aua e lelei o Ia, aua e faavavau lava lona alofa." O lo latou vivii lea i le silisili ese i le alofa o le Atua ua leo malie ia te i latou, ona o lenei galuega tele ua maea e ala i le fale o le Atua. A o pepese i latou, fai mai ua tumu le fale i le ao, o le faailoga o le i ai o le paia silisili ese o le Atua i lona maota, ma ua le mafai ai ona faatino le galuega a le au ositaulaga ona latou tuumuli ai lea i fafo. O le ata manino lea o le le auga o le faatauvaa o le tagata agasala ma le paia o le Atua. E ui i le le faatinoina o le galuega a ositaulaga, peitai ua latou mautinoa ua lava le galuega pese ma viiga a isi o le au sa Levi e fai ma musika i o latou taliga le silisili ese o le Atua ua latou molimauina, ua afio mai e faapaiaina le latou galuega ua taunuu manuia.

E faapea foi mo i tatou le fanau, o le alofa silisili ese o le Atua; o lo o atagia lava i lo tatou ola i aso uma. O le poto ma taleni eseese ua tatou maua, o taumafaiga o lenei tausaga i a'oa'oga, aemaise o le ola ma le malosi ua tatou maua. E ao la ona avea ia mea alofa mai le Atua, tatou te manatunatu ai ma fai ma musika malie i o tatou taliga. E saga faamanatu mai ai ia te i tatou, o le musika lea, o lo o tatou sisiva ma fiafia ai i lenei olaga o faaososoga ma tofotofoga, ma a'e malo ai o tatou faiva ma faamoemoega eseese mai lea aso i lea aso. E pei foi o Iesu la tatou uo, na Ia saasaa lava i le alofa o lona Tama, aua ua Ia mautinoa; o le musika lea e faaeaeaina ai o ia. O lea lava na manumalo ai i le oti ma le tuugamau, ina ia mafai foi ona avea ma musika i o tatou taliga le faaolataga na Ia saunia mo i tatou.

### ***GALUEGA FAATINO:*** Tusiga Pese

Tusi sau pese, ua lava le tasi o le fuaiupu ma le tali. O se pese e faailoa ai pe faapefea ona avea o le paia silisili ese o le Atua o se musika i ou taliga i lou talavou ma aso uma o lou soifua.

***PESE:*** Pese ma Viiga: 230. - Lagi ia lau pese...

### ***A'OA'OGA:***

1. E a'e manuia o tatou faiva pe a tatou manatua le alofa silisili ese o le Atua.
2. O le Atua, o le musika malie mo i tatou i taimi uma o lo tatou ola, solo lelei po o taimi o tiga, pau lea o le musika tatou maua ai le filemu.
3. Ia fai ma a tatou masani le fiafia e pepese i le alofa silisili ese o le Atua.

.....

***ASO SA:*** ***15 AOKUSO 2021.***

***MATAUPU:*** ***O LE A LAU FUAINUMERA?***  
***(What's your number?)***

***SINI:*** Ia a'oa'o tamaiti ia malamalama e tele le aoga o fuainumera i le soifua o le tagata, aemaise ai, o lo o i ai uiga loloto e pei ona fa'aaogaina i le Tusi Paia.

***TUSI FAITAU:*** Kenese 2: 1 - 4.

### ***FESOASOANI MO FAIAOGA:***

O le tatou mataupu i lenei taeao tamaiti, e faataua lea i le taua o fuainumera. O lo o fesiligia ai foi i tatou po o a a tatou fuainumera. E tele le aoga o fuainumera i totonu o le Tusi Paia. Na amata mai lava i le tala i le foafoaga, o lo o faitauina ai aso na faia ai e le Atua mea taitasi. E tovalu le aiga o Noa na toe amata ai le isi lalolagi fou i le finagalo le Atua. O le faitauina o ituaiga o Isaraelu ma lona faitau aofai. E faapea foi i le taimi lenei po o lenei vaitau. O lo o fa'aaogaina e le matagaluega o fuainumera (statistics) mo le silafia o e fananau mai, o i latou ua maliliu, faapea aiga taitasi ina ia mautinoa le aofai o tagata. O le ofisa o le

vaai tau, e fua iai le taimi e oo mai ai lea suiga ma lea suiga o le tau, ina ia mafai ona tauiologolo lo tatou atunuu i taimi o faalavelave faalenatura. E mafai foi ona fa'aaogaina e fai ma taiala, e pei ona faaaogaina i luga o femalagaiga i vaalele, e faitauina ai lea itulagi ma lea itulagi, ina ia sao ma taunuu tonu le faigamalaga i le atunuu o loo agai i ai.

O le tusi faitau la mo le mataupu o lenei aso; o loo talanoa ai i le fuainumera e fitu. O le fitu i le gagana Eperu - *sheba*, o loo faavae mai i le upu Eperu o le *saba*, o lona uiga o le faamalieina po o le lelei atoatoa. O aso e fitu na faia ai e le Atua le lagi ma le lalolagi. E ono aso na galue ai, ae malolo i le aso fitu, ona la faamanuia lea i le aso fitu. O lea lava ua fa'aaogaina ai i nei ona po e faitau ai aso o le vaiaso i le kalena faaletausaga, ono aso tatou te galulue ai, a o le Aso Sa tatou te tapuai ai i le Atua. O le ala o lana faamanuia, ona o le aso na malolo ai mai ana galuega ma la faapaiaina, ma faasaina lea aso mo Ia. E pei ona aumaia i le tulafono e fa o tulafono e sefulu. (Esoto 20: 8 - 11) O le uiga lea o le numera fitu ma lona mataupu silisili o loo aumai ai. O le numera atoa, o loo fa'aalia ai le atoatoa lelei o galuega mamana a le Silisili ese. O mea uma foi o le soifuaga nei, e atoa lava i le Atua mea uma, aua na te lei faataga faia mea uma ua tatou manuia ai. O lo o atagia foi lea mataupu silisili o le numera fitu i nisi o tala o le Tusi Paia. O le tala i le savali a Naamanu ia Elisaia ina ia malolo ai lona ma'i. (2 Tupu 5: 9-10) Na fai i ai Elisaia, e alu e tofu faafitu i le vai o Ioritana. O le atoatoa o le ola faamamaina o le tagata i le tino mafaufau ma le agaga. O le fesili foi a Peteru ia Iesu, pe faafia ona faamagalalo atu i le e agaleaga mai, pe faafitu ea. (Mataio 18: 21-22) Tali Iesu, ia faafitugafulu ni fitu. E le o le finagalo o Iesu ina ia faafaselau ivasefulu ona faamagalalo. Peitai o le fa'aaogaina o le numera fitu, o le ata lena o lona finagalo; ia atoatoa ma faamalieina le loto faamagalalo ina ia toe maua le nonofo filemu ma le fealofani.

Tamaiti, o le fuainumera foi lea e tatau ona fai mo i tatou, aua o lo o faailoa mai ai ia te i tatou le lelei atoatoa o galuega a le Atua mo i tatou. E moni e ui na tatou vaivai ma le atoatoa, ae tatau ona tatou taumafai i le mea e gata ai, e faatino le mea sili mo le Atua.

O lou ola taumafai i a'oa'oga, o galuega, o totonu o le aiga, o le aoga Aso Sa, autalavou ma le tele o lo tatou ola fa'aaogaina. Ia fai le mea sili, e faafiafiaina ai matua, tauleleia ai nuu aemaise le viiga o le Atua. Ia sili ai, lo tatou faatinoina o lo tatou tiute i le faaleagaga, ina ia atoa le viiga o le Atua i o tatou tagata atoa, tino, mafaufau ma le agaga. O Iesu la tatou uo, na ia aumaia le alofa atoatoa o le Atua le Tamā e ala i le faaolataga ua saunia mo i tatou.

**GALUEGA FAATINO:** Tusitusiga.

Tusiga parakalafa.

Toe faamatala mai i au lava upu, le aotelega o le mataupu e pei ona faamatalaina. Ia le silia ma le tasi pe lua foi parakalafa e faailoa mai ai lou malamalama i le tatou mataupu o lenei Aso Sa.

**PESE:** O le Atua mamana,  
O Ia e ou le foafoaga, (Aleluia....)  
O Le silisili ese,  
Puaina mai i lana fetalaiga, (Aleluia...)  
Ua atoa ai tino o le tama,  
I aso e fitu mai le amataga,  
O le uiga, lena, o le numera atoa.

Fati: Soon and very soon, we are going to see the king.

**A'OA'OGA:**

1. Ia tatou taumafai e fai le mea sili mo le Atua.
2. Ia faatino lo tatou ola valaauina i le atoa e oo i ai lo tatou mafai mo le viiga o le Atua.
3. O le Atua silisili ese, o Ia lava e atoatoa lona alofa mo i tatou.
4. Na faia e le Atua mea uma o lona atoatoa matagofie ina ia tatou ola manuia ma fiafia ai.

**ASO SA:** 22 AOKUSO 2021

**MATAUPU:** O FUAINUMERA E SOIFUA AI  
(Numbers to live by)

**SINI:** Ia a'oa'oina le fanau, o fuainumera e i ai o latou uiga, e fesootai lelei ma le soifua o so o se tagata.

**TUSI FAITAU:** Galuega 1: 15 - 26

### **FESOASOANI MO FAIAOGA:**

O le molimau a le Tusitala o Galuega, ua Afio Iesu i le lagi, ae tuua ai na o ona so'o i Ierusalem. Peitai, e le na o so'o o Iesu sa nonofo i Ierusalem i ia aso, a ua faatasi atu foi ia te i latou o isi fafine, o Maria le tinā o Iesu, atoa ai ma ona so'o. O lo o taua i le fuaiupu e 15, e tusa ma le to'a selau ma le to'aluafulu le au so'o sa potopoto i lea aso o Ierusalem. Ona tulai atu lea o Peteru, ma lauga atu i le au so'o, o e uma sa i le afeafe aupitoaluga i Ierusalem i lea aso, e faamafanafana ma faalototetele ia te i latou, e uiga i le taua ma le aoga o le galuega faasoa o le Tala Lelei ua valaauina i ai latou e le Alii. Ae na faamamafa lava i lana galuega, le taua o faiva e tatau ona faatino e so o se tagata ua filifilia e Iesu Keriso. O le uiga o le manatu, afai ua filifilia e Iesu ona so'o e toasefululua, e faataunuuna le galuega talai, e tatau foi la ona filifilia se tasi e sui tulaga ia Iuta le Sekara, o le na tietie i ona luga lana agasala, ona o lona faalataina o Iesu. O le manatu o Peteru, ia atoa lava le to'asefululua o le au so'o, auā o le finagalo lea o le Alii Faaola, e tusa ma le faitau aofai o ituaiga o to'asefululua o le malo o Isaraelu.

A atoa so'o e toasefululua e pei ona i ai taimi o Iesu, o le ata manino lena, o le atoaga o le galuega faale-Tala Lelei e uiga i le malo o le Atua, na aumaia e Iesu. O le filifilia ai o se tasi e sui tulaga ia Iuta le Sekara, ina ia atoa so'o e to'asefululua e pei ona

sa i ai i le amataga, o le faailoga o le faamautuina o le malo o le Atua i lona lelei atoatoa e pei ona sa i ai i le amataga.

O le galuega a le Atua, e pei ona sa folafola mai e Keriso, e le faia faa-afaafa, pe fai na o sina vaega, pe na o le faataunuua lava. E leai, o le galuega e faia ma le atoatoa ma ia mae'a lelei ona faatinoina. E faatino i le loto, mafaufau ma le malosia atoa ina ia maua'a le mausali le Tala Lelei mo tagata uma.

Mulimuli ane, ua latou faia le vili, e filifilia ai po o Pasapa po o Matatia. Ua latou tatalo ma aioi i le Atua, na te tofofi mai se tasi i lenei faiva, o le avea ma so'o. Ona filifilia ai lea o Matatia, ma ua faitau faatasi o ia ma so'o o Iesu Keriso, e sefulu ma le tasi. O lea ua atoa le au so'o o sefululua, ina ua filifilia ai lea o Matatia, ma ua faitau faatasi o ia ma so'o o Iesu Keriso, e sefulu ma le tasi. O lea ua atoa le au so'o e sefululua, o e ua filifilia e fai le galuega folafola o le Tala Lelei.

E tele faafitauli o lenei lalolagi tatou te fetaii, ae tatou te faalagolago lava i le Agaga o le Atua, na te faamalosi i tatou. E leai so tatou poto ma se malosia, a o le Agaga Paia lava na te leoleoina i tatou, ina ia mafai ona faatinoina le galuega a le Atua i le lelei atoatoa e pei ona sa i ai mai le amataga.

**GALUEGA FAATINO:** Fefaasoa'iga

E fautuaina le fefaasoa'i o lau susuga i le faiaoga ma le vasega i lenei tala. E le gata ia latou malamalama, ae ia latou iloa foi le taua o le numera 12. O le numera 12, e tolu nisi o ona vaega taua

- 12 so'o o Iesu
- 12 ituaiga o Isaraelu
- 12 (o lona uiga, ua atoa mea atoa)

**PESE:** Ua ou filifili e mulimuli ia Iesu  
(I have decided to follow Jesus)



**A’OA’OGA:**

1. Ofoina atu o tatou tagata atoa mo Iesu.
2. E le faigofie le avea ma so’o o le Tala Lelei.
3. E le tuulafoa’iina e le Atua le tagata faamaoni.

.....

**ASO SA: 29 AOKUSO 2021**

**MATAUPU: O MELI TAUALOA(Royal mail)**

**SINI:** Ia a’oa’oina le vasega, o meli taualoa, e mafai foi ona faauiga faapea, o ni tusitusiga pito sili ona aogā, o lo o momoli mai ai se feau faale-Talalelei, i le soifua o so o se tagata.

**TUSI FAITAU:** Fa’aaliga 1: 4 – 11

**FESOASOANI MO FAIAOGA:**

O le mataupu o lenei Aso Sa “**O MELI TAUALOA**” e mafai ona faapea, o ni tusitusiga pito sili ona taua ma le aogā, e fai ma taiala i soifuaga o tagata uma. O lona uiga, e leai lava nisi tusitusiga e sili atu nai lo Afioga Paia a lo tatou Alii, o lo o fai ma sulu e faamalamalama ai o tatou tagata taitoatasi.

E mafai la ona faapea, o meli taualoa, o lo o faasino tonu i Afioga Paia a lo tatou Alii, o lo o faailoa mai ai le finagalo o lo tatou Atua mo i tatou, aemaise lava i le lalolagi kerisiano. O le fa’aaliga na iloa e Ioane i le motu o Patano, o le finagalo lava lea o le Atua ua faailoa mai i ana auauna, o ē sa mulimuli ma talitonu faamaoni i galuega a Iesu Keriso. O Ioane, o se tasi molimau ola i le Afioga a le Atua, ma le mau iā Iesu Keriso. O ia lea ua fa’aali i ai le Atua na te tusia ni tusi e ave i Ekalesia e fitu o i Asia. E aofia ai Efeso, Semurana, Perekamo, Tuatira, Sarataisa, Filatelefaia ma

Laotikaia, ma e eseese uma feau o lo o tusia e Ioane e ave i Ekalesia uma nei.

O lo o faamanatu ai e Ioane le taua o le avea ma molimau faamaoni mo Iesu Keriso tusa lava po o a faigata o le ola, e ono faavaivaia ai le soifua auauna, o le mea pito sili ona taua e i ai le taunuuga matagofie o le auauna e alofa ma faamaoni mo Keriso. E tusa ma le molimau a Ioane, o le a Afio mai Iesu i ao, ma o le a iloa foi o ia e tagata uma, o ē sa mulimuli ma le faamaoni ia te ia, atoa ma ē sa faalumuluma i lana Talalelei, ma sauāina lana galuega faaola. O le feau taua mo tagata uma o le toe Afio mai o Iesu, o fuafuaga ua uma ona faataoto e le Atua, e i ai le aso ma le taimi e toe Afio mai ai Keriso e faamasino i le lalolagi. O le Atua, o Ia o le Alefa ma le Omeka, o lo o soifua, na soifua foi, o le a toe Afio mai, e ona le malosi uma lava. O le toe Afio mai la o le Atua e ala ia Iesu, e Afio mai i ao, o se fiafiaga tele lea mo ē sa tautua ma auauna ma le faamaoni ia te ia, a o se luitau lea mo ē o lo o latou lē taliaina o Ia, ma le Talalelei o le faaolataga.

O Ioane, o ia lava lea, sa ia tusitusia mea uma lava ua fa’aali i ai le Atua e uiga i mea o le a tutupu i le lumanai. O nei valoaga uma, e ao ona malamalama ma talitonu i ai tagata uma. O nei uma la faamaumauga o lo o tusitusia e Ioane, o ni meli e taualoa ma taua tele i soifua o so o se Kerisiano, ina ia fa’aauau pea ma tumau pea ia Iesu Keriso a o se faamanatu ma se lapataiga mo ē o lo o ola pea i le pogisa, ina ia suia o latou ala leaga uma.

E leai lava se isi auala o fesootaiga e pito i sili ona faigofie ma aogā mo tatou e maua ai le ola na i lo Afioga a lo tatou Alii. Tatou te faitau ma saga faitau ai pea, ma tatou iloa ai le mafaufau o le pai mai o le Agaga o le Atua mo tatou.

**GALUEGA FAATINO:** Fa’aaliga Manatu

E lelei pe a fesiligia le fanau, po o le a le uiga o le upu “Alefa” ma le “Omeka”

Faaitaiga:	Alefa -	amataga
	Omeka -	gataaga

Ia faailoa i le fanau vaega o Asia e maua ai Ekaelsia e 7, o lo o tusi i ai Ioane. – Efeso, Semurana, Perekamo, Tuatira, Sarataisa, Filatelefaia ma Laotikaia. (Silasila i le faafanua o lo o i le pito i tua o le Tusi Paia, o lo o faa-ulutalaina – “**O nuu sa femalagai ai le Aposetolo o Paulo.**”)

E aogā ina ia malamalama le fanau i vaega o Asia e maua ai Ekalesia nei e 7.

**PESE:** 146 (Pese ma Viiga)

**A’OA’OGA:**

1. Ia fai i tatou ma Kerisiano faamaoni.
2. O Afioa a lo tatou Atua, o le taiala sili lea mo tatou i aso uma.
3. E manuia le tagata e fai ma molimau ola o le Talalelei ia Iesu Keriso.

.....

**ASO SA:** 5 SETEMA 2021 (ASO SA TALALELEI)

**MATAUPU:** LĒ FIAFIA(Not happy)

**SINI:** Ia a’oa’oina le fanau ina ia latou iloa, e manuia le tagata e tumau ma le faamaoni i le Talalelei ia Iesu Keriso.

**TUSI FAITAU:** Kalatia 1: 1 - 10

**FESOASOANI MO FAIAOGA**

O le amataga lava o le Tusi lenei a le Aposetolo i le Ekalesia i Kalatia, o lo o ia tautino ai i tagata Kerisiano uma i Kalatia, o ia lava na tofia ma valaauina e Iesu Keriso ma le Atua le Tamā, na te folafola le Talalelei e uiga i le Toetu mai o Iesu. O le naunautaiga

o Paulo, ia faailoa atu ia Kalatia, e le se Talalelei mai tagata ua ia muai folafolaina atu, a o le Talalelei mai ia Iesu Keriso.

Ua mafua nei upu uma a le Aposetolo, auā ua ia maua tala, ua tele ina liliu ese le au Kerisiano mai le Talalelei ia Iesu Keriso, ae faasaga atu i talitonuga a tagata kerisiano Iutaia. Fai mai le mau a tagata Iutaia nei, e tatau i le au Kerisiano nuu ese nei o lo o i le Ekalesia i Kalatia ona peritomeina, ma latou faitau ma talia le Tulafono a Mose, ona faatoa maua lea o le Faaolataga. Ae mo Paulo lava ia, ua na o le talitonu ma le faamaoni i le maliu ma le Toetu o Iesu, e maua ai e le tagata le Faaolataga.

O le lē fiafia o Paulo, ona o le vave na liliu o le Ekalesia i Kalatia i talaiga nei a Iutaia Kerisiano, ae ua faatuatunai le Talalelei ia Iesu Keriso na ia folafolaina atu ia te i latou.

O le talitonuga o le Aposetolo, o le maliu ma le Toetu o Iesu, o le atoaga lea o mea uma o lo o tusia i le Tulafono a Mose. O le fu’a tualuga lea o le galuega alofa a le Atua i le lalolagi, lea lava na valoia mai lava e le Feagaiga Tuai e le au perofeta. E leai la se isi Talalelei i luma mai po o tua atu, aua o lea ua Afio mai le Atua e ala ia Iesu, sei faataunuu folafolaga uma o lo o tusia i le Tulafono a Mose. O le manatu foi o Paulo, ua na o le faatuatua ia Iesu Keriso e tauamionuina ai le tagata ae lē o le Tulafono a Mose, auā ua uma ona tapenaina e Iesu le saolotoga mo le au Kerisiano mai le saisaitia i le Tulafono.

O le Tusi lenei ia Kalatia sa tusia mai i Efeso i le vaitau e 53-54 T.A., i le malaga faamisionare lona lua a Paulo na ui atu i Asia itiiti. O le faamalosiua a Paulo mo Kerisiano nei i Kalatia, ia tumau i le Talalelei ia Iesu Keriso, e pei ona ia folafolaina atu. Auā o le auala lea e maua ai le saolotoga moni i le Faaolataga. Ai se tasi na te tala’iina atu po o se agelu, se talalelei e ese mai, ia anatema ia. O lona uiga ia malaia lena tagata po o se agelu.

O le feau faamalosiua foi lea mo tatou o ē ua talitonu ma faatuatua ia Iesu Keriso. Ia maua’a pea o tatou loto ma agaga mo Iesu, o le taiala sili lea mo fanau ma aiga, e manuia ai nei ma aso a sau.

**Uiga o Upu:**

i) anatema - malaia

**GALUEGA FAATINO:** Fa'aaliga Manatu.

Tusi mai sau aotelega (summary) o le Tusi Faitau o lenei aso, Kalatia 1: 1 – 10, e faailoa mai ai lou silafia i lagona na oo i le Aposetolo o Paulo (ft → lē fiafia, ita)

**PESE:** 234 (Pese ma Viiga)

**A'OA'OGA:**

1. E malosi le mea moni, ae le moni se mea malosi.
2. E mafai e le talitonu ma faamaoni mo Iesu, ona aveeseina faafitauli o le ola
3. A'oa'o ma faatonu fanau i Afioga Paia a lo tatou Alii

.....

**ASO SA:** 12 SETEMA 2021

**MATAŪPU:** MAFAUFAUGA (Imagination)

**SINI:** Ia malamalama le vasega i le tāua o le fetu'utu'una'i o mafaufauga. Aemaise le pulea o le loto ina ia aua nei afaina o tatou lagona, i tala 'ave e fa'aseseina ai lo tatou fa'atuatua i le Atua.

**TUSI FAITAU:** Kalatia 4:1-11

**FESOASOANI MO FAIĀ'OGA:**

O le mafaufau, o le meaalofoa a le Atua i le tagata. E feso'ota'i le mafaufau ma le loto. Auā o le loto e māfua ai tatou amio, o le tautala i upu lelei, o le vaai i mea lelei, aemaise foi o fa'aiuga lelei e fai i aso uma. O le loto, o le nofoaga o le lelei ma le leaga o le tagata. O le loto e aafia ai foi ma mafaufauga a le tagata.

O ia ona po ae lei pulea e Roma le aai lenei o Kalatia, sa nonofo ai tagata Eleni po o tagata Kuliki (Greeks) ma latou tapuaiga masani i o latou atua fa'apaupau.

O Kalatia o se tasi lenei o aai e i totonu o Asia itiiti o lo o ta'ua nei o Take po o *modern day Turkey*.

Ua mae'a ona tala'i atu e le Aposetolo o Paulo le Tala Lelei ia Iesu i Ekalesia i Kalatia, ae ua fa'alavelaveina le talitonuga a tagata ia Keriso i se isi foi aoaoga taufa'asesē (Kalatia 1:6).

O Kalatia sa aumau ai tagata Iutaia, o Iutaia Kerisiano ma tagata nu'uese (Jews, Jewish Christians and Gentiles). E fete'ena'i talitonuga ma mafaufauga o tagata nei. O Paulo na tala'i atu le Faaolataga mo tagata nu'uese. O lona uiga, o le Tala Lelei ia Iesu Keriso e mo tagata uma. O le fa'atuatua ia Iesu Keriso, o le ala lea i le ola e fa'avavau.

Peitai, e faigata ona taliaina e Iutaia Kerisiano lenei mataupu silisili faapea. Fai mai latou, afai ua manana'o tagata nu'uese e fai ma Kerisiano moni, e tataua ona peritomeina ma mulimuli i tulafono faa-Iutaia po o tulafono a Mose. O le talitonuga lava lea o tagata Iutaia Kerisiano, o le Faaolataga e ala ia Iesu Keriso, e patino lava i tagata Iutaia, e le mafai ona maua e tagata nu'uese, sei vaganā ai ua mulimuli i tu ma aga faa-Iutaia.

O le mafua'aga lea na tusia ai e Paulo lenei tusi i ekalesia i Kalatia. Na tusi lava ma le to'atama'i i a'oa'oga sesē ia, ua lē mautonu ai i latou ua fia inu i le Faaolataga e ala ia Keriso.

O le uiga foi lenā o le mataupu autū o lenei aso. O le feau taulogologo a Paulo i Kerisiano o nu'uese, ia toe fa'asagatonu latou mafaufau, ina ia 'aua nei fa'alogo i tala 'ave e taufa'asesē ai i latou, ae ia u'ai mai o latou taliga i le upu moni o le Tala Lelei ia Iesu Keriso, e ala i le galuega tala'i a Paulo.

O lo o fa'amamafa foi e Paulo, ia talitonu ma maua'a lo latou fa'atuatua ia Iesu Keriso. O ia lea o le tulafono e tatau ona mulimuli uma i ai le 'au Kerisiano. E le mana'omia le mulimuli i tulafono tuai pei ona masani ai i le amataga. Auā, o mea ia sa pologa ai le mafaufau o tagata i le Feagaiga Tuai. Sa talafeagai lava i ia ona po i le taumafai i le atinaeina o le fanauga a Isaraelu. Ona o latou loto ma'a'a. Ae o i latou ua ola i le Feagaiga Fou, o Keriso ua sa'oloto ai le tagata e ala i le fa'atuatua.

Lea ua aumai foi e Paulo o le ata fa'ata'ita'i i tu ma aga fa'apaupau o tagata Kalatia i ia ona po. Sa fa'apologaina o latou mafaufau i atua ese ma tapuaiga masani. E fa'apena foi lo latou mulimuli i tulafono fa'a-lutaia.

Lea ua tusi atu Paulo i ekalesia nei i Kalatia. Tou te toe fia nonofo pologa pei ona outou i ai i ia ona po? Tou te lē fia inu i le ipu o le Feagaiga Fou? O fea o nei mea tou te sailia?

O le faamalosi'a'u lenā a Paulo i ekalesia i Kalatia. IA TOE MAFAUFAU MA TOE FETU'UTU'UNA'I LE TŌFĀ. Po o sa'o ea le talitonu i le Keriso moni? O le **usita'i** ma le **lagonaina** o le upu moni ia Iesu Keriso, na tala'iina e Paulo i tagata Kalatia, e le māluelue ai le fa'atuatua o le tagata.

**GALUEGA FA'ATINO:** Taligā Fesili

1. O le ā le mafua'aga na tusi ai e Paulo lenei tusi i Ekalesia i Kalatia?
2. O le ā le tulafono fou na aumai e Iesu Keriso i le lalolagi?
3. Pe fa'apefea ona tatou iloa ma te'ena o nisi tapuaiga eseese, e ono aafia ai lo tatou tapuaiga masani faale-EFKS?
4. O le ā se feau tāua a Paulo i lenei tusi, e fa'atatau ia i tatou i lenei seneturi?

**PESE:** 165

**A'OA'OGA:**

1. 'Aua nei faalavelaveina se isi talitonuga e ese mai le Tala Lelei ia Iesu Keriso.
2. Ia fa'amausaliina lou talitonu i le Atua.
3. Ia pulea lou loto, auā e aafia ai ou mafaufauga ma lou faatuatua.
4. Ia iloa foi ona fetu'utu'una'i lou mafaufau i mea e te faalogo i ai.

.....

**ASO SA:** 19 SETEMA 2021

**MATĀUPU:** TAULAGA O LE SELESELEGA  
(Harvesting Offering)

**SINI:** Tāua tele ona iloa e le vasega o le uiga loloto o le ofoina o le taulaga i le Atua.

**TUSI FAITAU:** Teuteronomie 26:1-15

**FESOASOANI MO FAIĀ'OGA:**

O le tusi lenei o Teuteronomie ua fa'auigaina, o le tusi o le 'loto' (Book of the Heart). O lona uiga, o a'oa'oga ia o le ola fa'apa'iaina ma le ola tapua'i i le Atua, e tatau ona tauloto i taimi uma. E tatau ona faasoa atu I tagata Eperu uma, aemaise i totonu o aiga seia oo i fanau iti. Auā, o tu ma aga masani na o tagata Eperu, ua fai ma nuu o le feagaiga (Teuteronomie 6:9).

Ae lei taunuu Isaraelu i le nuu na folafolaina e le Atua, sa aumau ma to lauapi Isaraelu i le vao mo nai tausaga e 40 i le mauga o Moapi, i le va o Sinai ma Kanana. O lenei foi nofoaga na toe faamanatu ai e Mose i le fanauga o Isaraelu, o tulafono e tatau ona mulimuli ai pe a taunuu i le nuu na folafolaina e le Atua i o latou augātāmā.

O le tulafono lea mai le Atua na tau atu ia Mose e fai i le nuu pe a taunuu i Kanana. O le foai o uluai fua o a latou fa'atoaga (first fruits) i le Atua, e ala i lana auauna ositaulaga. O le uiga o lea taulaga o le seleselega, ia foai ma le loto faafetai i le Atua. Ia ave ulua'i fua o le faatoaga i le Atua ina ia iloa ai e tagata Eperu o le Atua e tatau ona fa'amuamua i mea uma. Auā, o uluai fua o le faatoaga o le faailoga lea ua tuu atu le faatuatua o le Eperu I le Alii na te toe faatutumu, ma toe foaiina nisi tamaoaiga se tele, i mea ua faagaogaoina i le latou tautua mo le Atua ma lona finagalo. Ma ia manatua ai e tagata Eperu, o le Atua lava ia, na laveaiina i latou mai Aikupito, ma faasaoina i latou mai le lima sāua o Farao.

E faapena foi ma le taulaga o le sefulu a'i o lo o tā'ua mai i le fuaiupu e 12-15. E eseese mafuaaga o le taulaga o le sefulu a'i o loo faatonuina mai i le Feagaiga Tuai mo le fanauga a Isaraelu. O le sefulu a'i lava ia i lenei mataupu, e pei o se lafoga e ave i sā Levī, o tagata ese, ma lē ua āumatuā, ma le fafine ua oti lana tane. E pei o se tologi lea mo le sā Levī i lana foi auaunaga mo le Atua. Ae o se galuega faatino foi lea e faailoa ai le agaga alofa i tagata matitiva, ma le lima vaivai.

O lona uiga, o le taulaga o le seleselega, o le faamoemoe ia ave i le Atua le fa'amuamua. Ave ma le loto malie ma le loto fiafia aemaise le loto faafetai. Ia manatua ai foi o le Atua na te toe fa'aatoatoaina mea ua avanoa. O le galuega faatino lea a le Eperu ua tuu atoa ai lona faatuatua ma le talitonu i le na faia i latou, ma mea uma o le foafoaga.

**GALUEGA FA'ATINO:** Taligā Fesili

1. O le a le uiga o le taulaga o le seleselega ia te oe?
2. E faapefea ona foai o uluai fua o le faatoaga i le Atua i nei aso?
3. O le a le ituaiga taulaga e fia silasila i ai le Atua? O le taulaga e faia ma le loto malie? Po o le taulaga e faia i le vaaiga faaletagata?

4. O a nisi ituaiga taulaga e mafai ona tatou ofoina atu i le Atua, e ese ai ma taulaga tupe?

**PESE:** 158 (Pese ma Viiga)

**A'OA'OGA:**

1. Ia iloa le Atua e tatau ona faamuamua i mea uma
2. Foai lau taulaga ma le loto fiafia
3. Aua le vaai i taulaga o lo o foai e isi.
4. O le va lena a oe ma le Atua.

.....

**ASO SA:** 26 SETEMA 2021

**MATĀ'UPU:** O LE LOTO FA'AFETAI  
(A grateful heart)

**SINI:** Ia malamalama le vasega i le taua o le loto faafetai i le Atua.

**TUSI FAITAU:** Auega 3: 22 – 33

**FESOASOANI MO FAI'ĀOGA:**

O le tusi lenei o Auega ua lauiloa, o le tusi na tusia e le perofeta o Ieremia. O le perofeta na ia vaai tonu i le mea o le a oo ia sā Iutā. O le a avea ma faatagata o taua i le tafeaga i Papelonia.

O le tusi lenei, o lo o sasa'a mai ai le lagona faanoanoa a le perofeta, ae o le faanoanoa e liua i le fiafia. O le fiafia e taunuu i le faamoemoe.

O lo o faatatau i le feagaiga a le Atua ma lona nuu. E pei ona masani i latou talaaga, e i ai taimi e lelei ai, ae tele foi taimi ua o ese mai le Atua.

O le finagalo lava o le Atua i lona nuu ua fai ma nuu o le feagaiga, ia tumau le loto tapuai i le Atua, ma le ola faapaiaina. Ia atagia ai, o le nuu na filifilia e le Atua.

Peitai, ua le mafai e le nuu o le Atua ona tausi le feagaiga ua osia. Lea ua oo mai i le taimi o le perofeta o Ieremia, ua tatau ai ona tuu i ai se faasalaga. O le uiga lena o lenei tusi o Auega. O lagona faanoanoa i le lē mafai e le nuu ona salamō I le Atua.

O le mataupu e 3 o le tusi lenei o Auega, ua faamatala ai e Ieremia le lagona o puapuaga o tagata sã Iutã, i le mea o le a oo i ai. Ua ia lagonaina le faatauvaa ma le fefe i le oti o le oo mai. O le fa'aaogaina lea e le Atua o tagata faapaupau ia sasa ma aoai le nuu o le Atua.

Ae i lea lava taimi e tasi, e lagona lava e ia e tumau pea le alofa mutimutivale a le Atua i ona tagata. E le tuulafoai e le Atua ona tagata. Ae ia aoai ina ia faatonutonu lona nuu, ia toe savavali i ala o le Alii.

Ua lagona foi e Ieremia, o le faamasinoga lea a le Atua i lona nuu, ua talafeauga ma amioga faapaupau na faia e le nuu.

O le fesootaiga foi lea ma le mataupu autu o lenei aso – O LE LOTO FAAFETAI. Auã o le Atua o se Atua alofa. E amiotonu ma faamaoni lava ona ala.

Lea e gagana mai ai le fuaiupu e 25-27. E aoai e le Atua lana fanau. Ae o ē e tumau i le onosai, e maua e ia le fiafia ma le atoaga o lana faaolataga.

Fuaiupu e 28-30, o lo o faamatala mai ai le mea o lo o finagalo i ai le Atua i le tagata. O le loto maualalo ma le salamō (humility & repentance). Tusa lava pe fa'aaoga e le Atua tagata faapaupau e aoai ai lona nuu, ia usitai pea i fuafuaga a le Atua ua mafua ai ona oo mai lana faamasinoga.

Fuaiupu 30-33, ua vavala mai ai o le Atua e le tuulafoa'ia ona tagata. E le tumau le tagata i le tiga ma le faigata. Ae ua ala ona feagai le nuu a le Atua ma le tiga, ona ua latou le onosai ma sutesue o ia. Ae o lo o tuu avanoa pea le Atua i e o lo o saili ia te ia.

O le mea lea, e ao ona tatou faafetaia le alofa ma le agalelei o le Atua, aua e le tuu e ia i tatou ina ia fano. Ae tatau lava ona aoai le

tagata ua alu ese mai ia te ia. Auã o le Atua e tonu ma sa'o ona ala, ma lana faasinoga i le tagata ia manuia.

**GALUEGA FA'ATINO:** Taligã Fesili

1. O le a le uiga o le tusi O LE AUEGA A LE PEROFETA O IEREMIA?
2. Pe faapefea ona tatou iloa ala o le Atua?
3. O le a foi se tatou tali atu i le alofa ma le agalelei a le Atua mo tatou?
4. Faamatala mai poo le a le uiga o le loto?
5. I le tusi sa tatou faitauina, o le a le mea tatau ai ona tatou maua i le loto faafetai i le Atua?

**PESE:** 143 (Pese ma Viiga)

**A'OA'OGA:**

1. Ia tumau pea i le loto maualalo ma le loto salamo
2. Ia faamasani i tatou i le tautino o tatou sesē
3. Aua le manatu faamaualuga ma faamasino i le isi ou uso
4. Ia toaga e mafuta ma le Atua i le tatalo.

**ASO SA:** 3 OKETOPA 2021

**MATAUPU:** FA'ATO'ILALO LE MATA'UA  
(Defeating Hostility)

**TUSI FAITAU:** 1 Samuelu: 24: 1 – 7

**FESOASOANI MO FAIAOGA:**

E i ai taimi e o'o ai ituaiga lagona ia o le ita ma le naunau e tauai atu le leaga i le isi ou uso a tagata. E mafua ona tutupu nei lagona

ona ua fai e le isi ou uso se galuega lelei ma ua fa'aeaina ai o ia i totonu o le sosaiete. O le isi itu, ua le maua ai se to'a filemu o le mafaufau ma ua pei ai lava o se avega mamafa ma ua faatupu ma'i i lona tagata.

Atonu e faapena lagona na o'o ia Saulo i lona mata'ua tele ma lona naunau e fia fa'ao'o le oti ia Tavita. O se vaaiga mata'utia na tupu i totonu o le ana i Enokati, i le tulituliloa pea e Saulo o Tavita i le fia fasioti ia te ia. E taunuu atu Saulo i totonu o le ana o lo'o ua lalafi Tavita ma lana 'au i le muli ana. Na i ai lava le manatu o le vaega'au a Tavita, o le aso lava lenei ua tuuina mai e le Alii ia i latou ma Tavita lo latou ta'ita'i 'au latou te fasiotia ai Saulo.

Peitai ane e le o le finagalo lona o le tupu, ae na ia tau ai le agaleaga i le agalelei, e ala lea i lona faasaoina o le tupu o Saulo. E le'i o'o le lima o le tupu o Tavita ia Saulo, e tigã lava lona matamata ita ae na matua'i faatoilaloina lava. Fai mai le tala na tulai Tavita na i le muliana ua ia sesele ese le pito ofu o le ofu talaloa o le tupu. O le fesili? Pe aisea lava ua sesele ese ai le pito o le ofu? E tele lava faauigaga pe a mafaufau i ai i le gaioiga a Tavita ua faia. Ua lava a le sesele ese e Tavita o le pito ofu o Saulo, e ta'u mai ai lona to'ilalo popo. O le vaega tonu na ua atagia ai le faatoilaloina o le mata'ua o Saulo.

O le isi itu e faamamafaina i le gaioiga na faia e Tavita; manatua foi Saulo o le tupu na fa'au'uina e Samuelu ina ua manana'o Isaraelu i so latou tupu. O le ofu o lo'o ofuina e Saulo, o le ofu o le tupu, o le sesele ese o le pito o le ofu o le aveeseina o le tulaga tau tupu mai ia Saulo. E mafai foi ona faapea, o le ata vaaia foi lona o le aveeseina e le Atua o manuia mai ia Saulo. O le tau lona o le tagata faamaualuga ma le fia malosi, e saunia lava e le Atua auala e faatoilaloina ai le tagata.

O lea foi se faamalosi mo le agai atu o nai fanau i le tapenaina o le Lotu Tamaiti i lenei tausaga. Le fanau e leaga le tau ma sui, e leaga le faamaualuga leaga e faatoilaloina ai lava oe e le Atua. 'Aua le manatu faapito ua na o oe lava, ae ia manatu alofa i le isi ou uso a tagata, ia po'o le isi a uo. Aua foi e faatoilaloina lava le tagata e loto faamaualuga.

.....

**ASO SA:** **17 OKETOPA 2021**

**MATAUPU:** **GAOIOIGA (Movement)**

**TUSI FAITAU:** Mareko 9: 1 – 13

**FESOASOANI FAIAOGA:**

O le liua ai o Iesu i o latou luma, e pei ona ta'ua, o se gaioiga na faateia ai le au so'o; a o le uiga foi lea o le upu liua e pei ona taumafai le tala e tau faamatala, o lona uiga pe a faaliliuina mai le gagana Eleni, o le suia o foliga vaai, po'o le faafuasei ona sui. O se vaaiga e mafai ona tupu ai le mautinoa mo le lumanai. E lē gata i lea, ae tupu ai foi ma le mautinoa mo auaunaga i le taimi nei.

O le mea moni lava ia, e lē mafai ona vaai se isi i le mamalu o le Atua. E lē mafai auā o le talitonuga faa-Feagaiga Tuai, e mata'utia le mamalu o le Atua. E lē mafai ona vaai i ai se isi, auā e oti ai. Peitai, fai mai le faamatalaga Mareko, e lē gata ina latou vaai atu ua liua Iesu, ae vaavaai atu foi ua fetautalatala'i mai Iesu ma Mose ma Elia.

O le vaaia ai foi o Mose ma Elia faatasi ma Iesu, ua faapupula mai ai le atoaga o le tulaga Mesia o Iesu, o Mose o lo o faatusa i ai le tulafono pei ona i ai ana tusi e lima i le Feagaiga Tuai, o Elia ua faatusa i ai le au perofeta uma ma a latou valoaga i le afio mai ole Mesia na te aumaia le faaolataga i le lalolagi.

A'o vaaia e le au so'o lea lava vaaiga, ae fai mai o le ao pupula ua ufitia ai i latou, ua latou faalogoina foi le siufofoga mai le ao ua faapea mai, O lo'u atalii pele lona, ou te fiafia ia te Ia, ia outou faalogo ia te Ia. O le faailoga ua toe faamausali mai ai o Iesu lava, o le atoaga o mea uma, o Iesu lava o le fuafuaga a le Atua o le gaioiga a le Atua mo le tagata le malamalama.

Le au so'o e tiga lava ona vaavaai i vavega ma faamalologa, e tiga lava ona faalogologo i a'oa'oga a Iesu, ae a oo loa i faigata ona femēmēa'i lea ma lē mautonu. E manana'o i le olaga e fifilemu, e mulimuli iā Iesu ona o le fia viia ma le fia iloa i tagata, aemaise

lava i so'o e toatolu na o ma Iesu. Lea fo'i a na i'u ai ina fesili tofotofa ai le au soo "Se a le mea ua fai mai ai le au tusiupu, e ao ina muai sau o Elia?"

Ae a le tali a Iesu...e muai sau lava Elia ma toe fuata'i mea uma. A ou te fai atu ua mavae ona sau o Elia, e lei iloa foi o ia e i latou, a ua latou faia ia te ia o mea uma na latou loto i ai....o lona uiga sau Elia, sau Mose ae peita'i e lei iloa lava e Isaraelu. Po'o ai a e sau, e le mafai lava ona iloa e tagata, a'o ai se isi e toe sau, a lea ua vaai ma le toto'a, lea ua manino, o le Mesia lava lenei o lo o mau ma i latou, lea lava e pogisa i ai la latou vaai.

Lea la ua faapupula i le suia o Iesu, o se vaaiga na se'i toe faamanino atu i ai i so'o, o Iesu lava lenei o le Mesia na valoia, o le faamoemoe ma le mautinoa ua tuuina atu mo i latou ina ia faatupu ai le lototele ma faatupuina ai lo latou fiafia; e talai le finagalo o le Atua.

Manatu foi, o le autu o lenei aso mo i tatou le fanau aemaise o le au faalogologo e luitauina ai pea lo tatou ola pogisa ma le le malamalama. A lea lava ua tatou manino i le tala ua aumai, o le malamalama o Iesu Keriso e na te faapupula atu ma faamalamalamaina atu ni mea o lo'o faa pogisaina ai o tatou tagata. O le gaioiga foi e pei ona taua i le manatu autu, o le gaioiga ma le fuafuaga mamao a le Atua e ala mai ia Iesu Keriso ina ia faaolaina i tatou. Lea lava na maliu i luga o le satauro aua le faamagaloina o a tatou agasala. Manuia ona o Iesu. Amene

.....

**ASO SA:** **24 OKETOPA 2021**

**MATAUPU:** **FANUA MA FAIGA FA'A'AIMAMAGO**  
**(Land and exploitation)**

**SINI:** Ia malamalama le vasega, o fanua ma eleele o le tofi lea mai le Atua; na Ia foa'iina mo le tagata e galuea'iina ma le faamoemoe ina ia faaoga ma le tataua.

**TUSI FAITAU:** Mareko 12: 1 – 12

**FESOASOANI MO FAIAOGA:**

O le tala sa o tatou faitauina o se tasi lea o faataoto sa faamatalaina e Iesu. O lenei faataoto e mau eseese le 'au suesue o le Tusi Paia; ma e i ai le talitonuga o lenei ituaiga tusitusiga fai mai le latou mau e mafai ona faaigoa o le (*allegory writing*). O lona uiga, o ituaiga tusitusiga poo faataoto e tasi lava a le tala ae tele ona faauigaga pe tele foi ni a'oa'oga eseese e maua mai ai.

Peita'i la le faamamafa o lenei aso e lua lava upu taua o lo'o aumai ai, o le fanua ma faiga fa'aa'imamago. O le fanua lava ia i le vaai a le tagata Isaraelu po'o le Iutaia o se measina, o le mea e pele i le loto ma e faamemelo ai lava so'o se Isaraelu. Le mafuaaga tonu foi lena o le taua ai e Iesu o lenei faataoto e faaogaina ai le toga vine. O le tovine na totoina e le tagata ma lotoaina i le ai, o lona uiga o le tovine ua uma ona toso lona pa, ua mae'a puipuiina ina ne'i satia e ni tagata po'o ni manu feai foi.

A o le natura lava lea o le galuega faapea foi le galueaiina o le tovine, e toto e le e ana le tovine ma fai uma mea uma mo lona malu puipuiia. A mae'a ona ia tu'u ai lea ma tagata e galulue ai, pe a o'o ina alu malaga le pule o le tovine. Peitai e alu malaga le pule o le tovine a ua mae'a lava ona faa polokalameina lana galuega faa le tausaga, ua i ai lava ma ana auauna o e asiasi i le tovine. Peitai i le faitauga o le faataoto, fai mai na fasi e tagata o e galulue i le tovine auauna a le matai. E to'atolu lava auauna na auina e le pule o le fanua e asiasi, peitai na fasia e nei tagata. E o'o lava foi i le atalii e toatasi o le pule o le tovine, ua ia auina atu foi i le fanua; ae o le tali lava e tasi na o latou fasi i le atalii ona latou fai ai lea o le fanua mo i latou.

O le uiga loloto foi lena o le faataoto, o le faatusaina o le Atua o Ia o le pule o le tovine; o Ia foi na galueaiina le tovine, o Ia na foafoa le lagi atoa ma le lalolagi. Ua mae'a ona faia o le lalolagi, ua maea ona toto o le tovine ona ia tu'u ai lea o le tagata i totonu o le faatoaga ma le faamoemoe ia galue ma le faamaoni. Peitai e le i faamaoni le tagata i le tausiga o le tovine; ina ua agasala le



lalolagi i le amataga, ma pau ai le uluai tagata. Ua gasolo mea o le foafoaga ma fuafuaga a le Atua i lana tovine, ua silasila atu le Atua le pule i le fanua ua tele lava le aafiaga o le toga vine ua i ai nei.

Ona manatu ai lea o le Atua; o le a auina atu ana auauna e asiasi i le toga vine. Ua ia auina mai ana faamasino e faamasino i lona nu'u, o mai ana perofeta faapea foi i tupu na filifilia. O i latou nei na auina mai e le Atua e asiasi i le tovine ma vaai lana au faigaluega. E le o se tala fiafia na faalogo ai le pule o le fanua o ia foi o le pule i le togavine, ona ia auina mai lea o lona atalii. E faapena lava le gasologa o mea o le foafoaga a le Atua, na ia aumaia ai lona atalii pele e toatasi i le lalolagi, o lana galuega tala'i o lana galuega asiasi i totonu o le tovine, e faasoa atu, e ofo atu le fesoasoani mo e galulue i tovine.

Peitai e le i tali leleia e le au galulue i le tovine le afio mai o Iesu, e ui na o mai perofeta, o faamasino ma i latou uma na muamua ia Iesu. E le i taliaina lava e tagata. O le mafuaaga foi lena o le talanoa ai o Iesu i lana faataoto lea, talanoa lava Iesu i mea o le a tutupu, a o lumanai ai lona maliu. E fasia, e togia i ma'a o Ia e le au galulue i totonu o le tovine, o le au faresaio, o le au satukaio, o tagata Iutaia lava. Fai mai Iesu "E sau o ia, ma faaumatia na tagata galulue i vine ma tuu ane le tovine i nisi". O lona uiga o le faamasinoga a le Atua.

E ui i lea ua le amanaia, ua lafoaiina le afio mai o Iesu i le lalolagi e ona tagata peitai, lea ua faaaogaina e Iesu upu si'i mai le Salamo e 18: 22 "O le ma'a na lafoaiina e tufuga fai fale, ua fai lena ma maa tulimanu aupitoaluga; o le mea lea na faia e le Alii, tatou te ofo ai pe a vaavaai atu i ai?" Lea ua faatusa e Iesu le au tufuga fai fale i taitai o le lotu Iutaia, o e na o latou teena talaiga a Iesu Keriso, o Iesu lava o le maa na tuulafoaiina e le i taliaina e le au Iutaia, ae na avea ma faatumutumuga o le mea aupitoaluga.

O fanua ma faiga fa'aa'imamago; o le fanua ua fa'aoga sese e le tagata. O le togavine ua le galuea'iina ma le faamaoni, ae peitai fai ma auala e saili ai le pule ma le fia sili o le tagata. E faapena foi lenei taeao ma le faataoto na faitauina. Na faia e le Atua le lalolagi ina ia ulu ola ma viia e le au galulue i le tovine le Atua. Ia

viia e tagata uma le Atua, e molimauina lona agalelei ma lona alofa tunoa. Ae 'aua nei fai ma ala e saili ai le viiga o le tagata, ma fa'aoga sese ai lava le fanua na aumai e le Atua e pule sa'oloto ai le tagata. A lea na Afio mai Iesu i le lalolagi, o le atalii e toatasi o le pule o le tovine, na fasiotia ma amusia, e le i amanaia e le au galulue i togavine. Lea na fai ma maa tulimanu aupitoaluga, na tu mati'e lava lana taulaga ofoina mai i le lalolagi atoa. E ala i lona maliu ma lona toetu manumalo mai le oti ma le tuugamau. Ia manuia tele outou le fanau i le alofa ma le agalelei o le Atua; ona o Iesu. Amene.

### Uiga o Upu:

- i) Faataoto – tala faa-faatusa
- ii) lotoaina i le ai – o lo'o faatautu i le fauina o se pa puipui, mo le lotoa o lo'o fai ai le togavine, puipui mai i manu feai ma tagata nei gaoia le togavine.
- iii) aufuaina – toe foi ua leai se mea e avea

### **GALUEGA FAATINO:** Fa'aaliga o manatu

Mafaufau loloto i le uiga o le mataupu "Fanua ma Faiga Fa'aa'imamago", i le tulaga o i ai nei Samoa i le mataupu lava lea tau fanua. Ua tele ina faatau atu e le mālō fanua ma eleele faa le aganuu i tagata mauoa, aemaise lava i tagata mai isi atunuu pei o Saina ia ma isi. Ua tele ina pulea e le malosi o le tupe, ma i'u ai lava ina faatau atu o tatou eleele. Mafaufau i le uiga o le upu fa'aa'imamago; pe le o se faiga fa'aa'imamago ea lea ua atagia i lenei vaitau i le gasologa o mea o le soifuaga. A o le a foi se fesoataiga aga'i i le tala ma le alofa tunoa o le Atua na Ia foafoa ai le lalolagi i lona poto.

Saunia e lau susuga i le faiaoga ni nai fesili, e tulituliloa ai lava le mataupu ma taumafai e talatala ai mafaufauga o nai fanau.

**PESE:** Iesu e, o lou tovine.... (324)

**A’OA’OGA:**

1. Ia e manatua le alofa tunoa o le Atua mo oe ma a’u.
2. ‘Aua e te mana’o tele i le ‘oa ma le tamaoaiga.
3. E faamasino e le Atua i tatou e tusa ma a tatou galuega fai.

.....

**ASO SA:** **31 OKETOPA 2021**

**MATAUPU:** **FAAPEPEPEPE I LUGA O LE AFĀ**  
**(Soaring above the storm)**

**SINI:** Ia malamalama tamaiti o le faapepepepe i luga o le afa; o lo o faamatala ai le tumau o le faamalumaluga alofa a le Atua i lona nuu o Isaraelu a o feagai ma puapuaga.

**TUSI FAITAU:** Esoto 19: 1 – 6

**FESOASOANI MO FAIAOGA:**

I le gasologa lava ia o le tala faasolopito o Isaraelu ma le Atua. O lo o atagia ai lava le natura alofa lea o le Atua i lona nuu. E ui lava ona o se nuu e silimusa i le ola tomumumu ma le faitio i le Atua i le tele o taimi, ae le mafai ai lava ona liliu ese fofoga alofa o le Atua ia te i latou.

O lea ua tolu masina talu ona o ese mai Aikupito le nuu sa nofo pologa ai, ma ua oo atu foi faiga malaga a le nuu o Isaraelu i le vao Sinai. Ua to laupi foi le nuu e latalata ane i le mauga o Sinai ia po o le mauga o Horepa. O se tasi o mauga matua’i iloga foi lona taua i le tala faasolopito o Isaraelu. O le mauga fai mai o le afioaga o le Atua Soifua. O le mauga e paia ma mamalu; le ala lea

o le lē solia pe pa’ia e Isaraelu ona eleele. Ua na ona tutu ma latalata i ai ae latou te le pa’ia lava, ona o latou o se nuu agasala.

Ua fetalai le Atua, ia fai atu i le aiga o Iakopo ma fa’aali atu i le fanauga a Isaraelu. E faamanatu i ai, e ui i lo latou agasala ma le ola femoumoua’i, ae tumau pea lona alofa ia i latou.

O le aiga o Iakopo ma le fanauga a Isaraelu o le mea lava e tasi. Manatua foi, na o i totonu o Aikupito ua na o se aiga e tasi, o le aiga o Iakopo; ae ina ua taunuu i totonu ma fanafanau ma uluola lenei aiga, ma avea ai o se nuu ma faamanuia i ai le Atua. O i lea na avea ai loa o le nuu o Isaraelu. Aua o le mea mautinoa, o le nuu o Isaraelu na fofoa mai totonu o Aikupito. E o ese mai la ma Aikupito, na o ese mai o le nuu.

O lea ua fetalai manino le Atua ia Mose, sei toe faamanatu ia Isaraelu vavega tetele na Ia faia ia te i latou; a o latou nofo pologa i Aikupito. Na Ia aveina a’e i latou i apaau o Aeto. Ua faaogaina le Aeto e fai ma ata faa-faatusa e faatusa i ai e le Atua; le malosi tulaga ese o lo o puipuia ma laveaiina Isaraelu. Le malosi o loo mulimuli ta’i pea e laveai i le nuu o le Atua.

A tatou mafaufau i le manulele lea o le Aeto, e le gata o le tupu lea o manulele uma ae o lona malosi ma lona tino mai, e manino ai o se manulele e matautia lona fotu’ai mai. O se manulele foi e matautia le saosaoa o lana lele ma lana vaai. O ona apaau e lautete pe a tatala ma sauni e lele.

O lona uiga o ata faa-faatusa uma ia ua faatusa i ai le matautia o le puipuiga ma le laveaiina o le Atua o lona nuu. O le silasila a le Atua ia Isaraelu ma a latou faatinoga, e leai se mea e lilo i lana silafaga. O le lautetele o apaau o le aeto, ua faatusa i ai le alofa lautele o le Atua e fusia ai lona nuu o Isaraelu.

O le aveina a’e la o Isaraelu i aapau o aeto, O le faailoga o le faasaolotoina o Isaraelu mai le amo o le pologa sa i ai i Aikupito, e le Atua soifua. A o lea faasaolotoga e manino ai le pule aoao o le Atua i mea uma na ia faia. E oo lava foi i le potu ma le malosi, le tamaoaiga sa fai ma ala o le faauliulito ma le taofi mamau pea o Farao e tuu atu Isaraelu e o.

Ae i le faaiuga o le vaega lea sa faitauina, peiseai o le tagata e faalogo ma tausi i le feagaiga ma le Atua, fai mai e fai ma oloa

tāua a le Atua. A o le oloa taua, o se mea e tausi ma faapelepele i ai le tagata. O lona uiga, e faapena le manuia e oo i ai le Isaraelu e faalogo ma usitai i le Atua, e avea i latou ma oloa taua i le malo e faavavau, e tausi foi ma faapelepele i ai le Atua.

O se feau foi lea mo i tatou le fanau i lenei taeao. O lo o tatou ola i se olaga e anoanoa'i faafitauli ma faigata. O mea e tutupu i lo tatou ola ua faaluafesasi ai o tatou mafaufau. Ae pau o lea le faamanatu, o lo o i ai pea le faamalumaluga ma le tausiga a le Atua i ai tatou. O le Atua na te puipua ma leoleo i lo tatou ola mai mailei a le fili e ona lamatia ai lo tatou ola. E faapei ona aveina a'e o Isaraelu e le Atua mai le nofo pologa i Aikupito, ma faasaoloto ia te i latou. E faapena foi ona faasaolotoina i tatou e le Atua mai faigata ma faafitauli o loo faapunapa'ulia ai lo tatou taumafai. O Ia na te tatala i o tatou noanoataga ma faasaoloto i ai tatou.

**GALUEGA FAATINO:** FA'AALIINA O MANATU

Fa'aali sou manatu pe aisea lava ua fa'aaoga ai e le Atua le manulele lea o le Aeto e faatusa i ai o Ia.

**PESE:** Tuu au avega ia Iesu, e alofa mai.  
(Cast your burdens on to Jesus)

**A'OA'OGA:**

1. O le Atua na te faasaolotoina i tatou mai faigata uma o le ola.
2. O le Atua o le alofa fua ma le alofa mutimutivale uma lava.
3. E manuia se faamoemoe pe a tautai e le Atua lona faatinoga.

.....

**ASO SA:** 7 NOVEMA 2021

**MATAUPU:** **FAALETONU MAILE FALEVAAI**  
**(Chaos from the watchpost)**

**SINI:** Ia malamalama tamaiti, a faaletonu le falevaai ua fesiligia le saogalemu ma le malupuipua o se nuu.

**TUSI FAITAU:** Mika 7: 1 – 7

**FESOASOANI MO FAIAOGA:**

A talanoa i le falevaai, ua talanoa agai le malu puipua ma le saogalemu; aua o le ute lea ma le faamoemoe o le falevaai. O lana matāfaioi tauave, o le faamautinoaina lea o le saogalemu ma le taotoga lelei o mea uma. E faalagolago ma faamoemoe i ai le manuia o se faamoemoe.

A faaletonu la le falevaai, ua pa'u i faigata ma poia i puapuaga le nuu. Ua olopalaina ma faatafunaina ma avea faatagata o tauaina. E foliga faapea ni fatufatuaga o lo o afifi mai le tala lea sa tatou faitauina. O le faaletonu o le nuu na faapogai mai; ina ua lape ma faaletonu le taitaiga a i latou na fai ma taitai o le nuu i lea taimi. O ē na faalagolago i ai le ola saogalemu ma le malu puipua o le nuu i la latou taitaiga. O le ala lea o le tualaga a le perofeta o Mika ia Iuta, ina ia latou salamo ma toe foi e fai le leleiga ma le Atua ao lei oo mai le toasa o le Atua ia te i latou.

A o le manulauti lea o le sau o le perofeta o Mika, sei toe faamanatu lava ia Iuta le faamoemoe o le Atua na ala ai ona valaauina o ia, le galuega molimau, le tiute ma le tofi ua le faatinoina.

O le vaitau o le tulai mai o Mika, o taimi tonu ia o le maoae o le tulaga manuia ua oo i ai le nuu, taimi na osaosa ai le tamaoiga, ma ua faapena foi ona solo lelei le soifua ma le ola, pau a o lona, ua aunoa le nuu ma se ola faatuatua o i ai, ua matua mate lava le ola faaleagaga.

Ao le itu e faanoanoa ai, o loo taulamua lava taitai o le nuu. I le silafaga a le Atua, ua leai se vaipanoa o le ola o Isaraelu o toe lelei. Ua faaletonu le ola tapuai, o aga fesootai i aso uma, ma le itu i le tamaoaiga ua faaleagaina.

Ua fao e le tagata malosi le fanua e tasi a le tagata vaivai, ua mafai foi ona fa'atau e le mauoa le fa'aiuga a le fa'amasinoga. O taimi foi ia na pule sauā ai taitai o le malo i le ola o tagata matitiva ma le lē taualoa.

Ua le gata i tu ma aga faalemalo, ae ua aafia atu ai ma le itu a taitai o le lotu latou, ua leai se mamalu i totonu o tapuaiga, a ua pei o se mea ula, ua na o se mea e fa'ataunuu, ae ua leai se agaga o i ai. Ua fai mea uma ina ia fa'amalieina le tagata tapuai, a ua le faia mo se viiga o le Atua.

Ua avea foi le tele o le tamaoaiga ua maua, ma tofi maualuluga faa-le-malo fa'apea le Lotu ma ala e tafili saunoa ai i le ola ma le malosi o le isi, ua leiloa ai e le tagata lona tuaoi, ua galo ai le va fealoai, o le va tapuia o le tagata i le isi tagata; aemaise lava o le va tapuia ma le Atua.

Le ata manino lea ma le matamata tetele o le olaga faigata o lo o ola ai le nuu o le Atua. O le galuega la a Mika, o le timai lea ma lapataia le nuu, ina ia toe foi i le Atua. Aua o le mea ua manino ma mautinoa, ua leai lava se isi o le nuu o toe tumau lona faamaoni i le la feagaiga osi ma le Atua. Peiseai ua matuai tulaga faigata lava ona toe maua se tasi, e oo lava i taitai o le lotu, ua tuu ese uma ma faatuatuanai tofiga faalelotu a ua faatino lava le mea e manao i ai le tagata.

O le faamanatu foi lea mo i tatou le fanau. E i ai taimi e siitia ai lo tatou tulaga e ala i se faaeaea a lo tatou aiga, se faaeaea a nuu ma ekalesia. A ia tatou manatua, so o se faaeaea tatou te sapi ai, o le faaeaea lena mai le Atua i lo tatou ola. Ae ao foi ina tatou manatua, o tulaga faapea e le faigofie. O ni tulaga ua faalagolago mai ai foi ma le ola saogalemu o nisi ia i tatou. O la tatou taitaiiga foi, e vavala mai ai ataata o taulelei mo se manuia o le nuu i le lumanai.

## ***GALUEGA FAATINO: TALIGA FESILI***

1. O le a le tulaga ogaoga ua oo i ai le nuu o le Atua?  
Tali: Ua faaletonu le ola tapuai, ma ua avaga loto i tu ma aga faapaupau.
2. O le a le faamoemoe maualuga o le tusi a Mika?  
Tali: E tima'i ma lapata'i i le nuu o le Atua ina ia salamo ma toe foi e fai le leleiga ma le Atua.
3. O le a le vaitau o le galuega faaperofeta a Mika?  
Tali: O le vaitau o le avea o Ioatama ma tupu o Iuta.

***PESE:*** 165(Pese ma Viiga)

## ***A'OA'OGA:***

1. Aua tatou te faatamala i o tatou tiute tauave.
2. Ia manatua le alofa tulituliloa o le Atua i lo tatou ola.
3. O tatou o lumanai manuia o aiga, nuu ma le ekalesia.
4. Aua le avea le tamaoaiga ma ala e galo ai le Atua.

.....

***ASO SA:*** 14 NOVEMA 2021

***MATAUPU:*** IA MAFAUFAU I OU ALA  
(Consider how you have fared)

***SINI:*** Ia malamalama tamaiti o le faatasi mai o le Atua tatou te mafaufau ai i faaiuga e tatau ma lelei, ma iu ai i le manuia lona taunuuga.

***TUSI FAITAU:*** Hakai 1

## **FESOASOANI MO FAIAOGA:**

O le tatou mataupu i lenei taeao o lo o taoto mai o se faatonuga. E taua ai le fa'aaogaina o le tulaga o le "Ia" lea o lo o amata ai le tatou mataupu. "*Ia mafaufau i ou ala*" o se faatonuga o lo o atagia mai ai o lo o i ai se faaletonu i se faatinoga.

A o le ata manino lea o loo ali'ae i totonu o le tusi lea sa tatou faitauina. Ua lape ma ua sese le faamuamua a tagata o le nuu o le Atua, pe a fua i le mafuaaga na faafoisia ai e Kuresa le tupu o Peresia le tafeaga. I le TLM 538 na toe faafoisia ai le tafeaga mai Papelonía. A o le manulauti ma le faamoemoe tupito o le toe fo'i o le toe fausia lea o le malumalu i Ierusalemá sa faatafunaina.

Peitai, ina ua toe fo'i le tafeaga sa i ai lava ni feeseesea'iga i le va o ē na totoe i le nuu ma i latou sa faatafea. Manatua foi o le tafeaga e lei aofia uma ai le nuu atoa, sa faatafea na o e malolosi ma ē atamamai; ae sa faatotoe pe na tuua i latou o ē mama'i ma e vaivai.

I le toe foi mai ai la o le tafeaga, e lei talia gofie e i latou sa totoe i le nuu. Ina ua o mai i latou o e na faatafea ma mafaufauga faapea, o i latou e fitōitonu ai le galuega o le toe fausiaina o le malumalu. Ae finau atu foi e na totoe o latou, o nisi ia o feeseeseaiga na avea ma mea ua ponatia ai le fausiaina o le malumalu, ma ua avea ma mea ua see ese ai le faamuamua ma le faamamafa a le tagata lava ia. Ua le o toe mafaufau i le fausiaina o le malumalu, ae ua manatu ane lava le tagata ia e atia'e lona aiga.

O mafaufau ia o le nuu na avea ma ala na malaia ai a latou taumafaiga uma. Ua latou galulue malolosi mo le atina'eina o latou aiga, ae ua latou selesele ai na o sina vaega e le faamalíeina ai. Ua fiu foi e aai e le maona lava, ua feinu foi e le malilíe lava, e oofu foi e le mafanafana lava, e taofia foi le totō ane o sau i le laueleele, ma ni fua lelei e fua mai faatasi ai ma le lamala o le a ia valaau i luga o le elelee.

E foliga mai la, o so o se taumafaiga lava a le nuu e taumafai i ai; e iu lava i se i'uga e lei mafaufauina. Se i'uga e le faamalíeina ai. O se i'uga e maua pe afai ua le faamuamua le Atua o le puna o le ola.

A o le faapogai lea o le oo mai o le afioga a le Atua ia Hakai, e faaaíloa i le nuu; ina ia latou mafaufau poo talafeagai la latou faamuamua. O se feau faamalosi ma matuai lagalaga'ia ai finagalo ma manatu lelei o nisi o le nuu e faaaau le fausiaina o le malumalu.

Aua o le mea ua mautinoa e le nuu o le Atua, o le sese o la latou faamuamua o le tele foi lea o le tulaga faaletonu e ona oo i ai lo latou ola. O le lava foi ua aliali manino i le aafiaga o a latou mea toto sa faamoemoe i ai lo latou ola i aso uma. E leai lava se faamoemoe e fuaina mai ni fua lelei.

Ae i le faaiuga o le tatou tusi faitau, o lo o aliali manino mai ai se faaiuga talafeagai ua fuafuaina e le nuu. O se faaiuga ua atagia mai ai ua lagona e le nuu le salamo mai ia latou faatinoga sese ma la latou faamuamua ua sasi.

O le feau foi lea mo i tatou le fanau, o le faamuamua o le Atua i mea uma tatou te faia; o le fau ma soloi foi na o faamanuiaga a le Atua mo i tatou. Ina nei sasi pe faatamala la ta faamuamua ona avea lea ma lape o le tatou mafutaga ma le Atua. Ia fai lava ma aoaiga le tulaga lea na oo i ai le nuu o le Atua ina ua toe fo'i le tafeaga. Ua avea feeseeseaiga ma ala ua sese ai manatu ma lagona, ma ua faatuatuanai ai le Atua. O le mea taua ia tatou manatua le fanau, e le o faaleaogaina e le Atua le tausiga o tatou aiga; a o le mea e ao ina tatou íloa, ia faamuamua le Atua i mea uma tatou te faia, e faamanuia mai ai le Atua i a tatou taumafaiga uma.

## **GALUEGA FAATINO: TALIGA FESILI**

1. O le a se mafuaaga o le feeseese'ai o ē na faatafea ma i latou e lei o le tafeaga?

Tali: Ona ua o mai i latou na faatafea ma le mafaufau o i latou e fausiaina le malumalu, ae tetee foi i latou na totoe i le nuu.

2. O le a le mea na tupu ina ua feeseese'ai le nuu?

Tali: Ua ponatia le fa'aaauina o le fausiaina o le malumalu, ma ua sese ai ma le faamamafa a le tagata lava ia.

3. O le a se taunuuga o lea feeseesea'iga?  
Tali: Na toe fo'i i le fausiaina ma le faamae'aina o le faia o le malumalu.

4. O se tulaga lelei na ali'ae mai ina ua ponatia le fausiaina o le malumalu ma toe foi le tagata e ati'ae lona lava aiga? Aisea?

Tali: Leai, ona ua ave'a ma ala ua faamuamua ai manaoga o le tagata ae ua galo le Atua ma lona finagalo.

**PESE:** 266 (IPI – Tumau mai oe, lou nei matai.)

**A'OA'OGA:**

1. Ia faamuamua le Atua ia tatou faaiuga fai, e faamalieina ai i tatou i lona taunuuga.
2. Ia tatou ola fealofani ma galulue faatasi mo se viiga o le Atua.
3. Aua le ola tusitusilima.

.....

**ASO SA:** 21 NOVEMA 2021

**MATAUPU:** MALOSI I LE ALOFA (Strong in Love)

**SINI:** Ia malamalama le vasega o le alofa o le Atua e leai sona gata'aga, o le alofa e faamaoni ma e tumau e oo i le faavavau.

**TUSI FAITAU:** Sakaria 10: 1 – 12

**FESOASOANI MO FAIAOGA:**

E faatalofa atu i le tatou vasega i lenei taeao fou, o le tatou mataupu ua faaulutalaina e faapea “Malosi i le alofa”. E tele

ituaiga alofa ua silafia e outou le fanau, o le alofa i le va o matua ma fanau, o le alofa i le va o faigauo, o le alofa i le va o ulugalii, ma le alofa i le va o le tagata ma le Atua.

O le alofa o le fatu lea soo se mafutaga, aua a leai se alofa, e le mafai ona maua se sootaga lelei o le isi tagata i le isi. O le alofa e afua ai ona pele fanau i matua, ia po o matua fo'i i fanau. A leai fo'i se alofa e leai se sootaga e osi ai ulugalii ma tumau ai le faamaoni o le tasi i le tasi. Peita'i e i ai taimi e fesouaina ai le olaga i peau laga vale ona o faafitauli ma mea e tutupu. E fiu le alofa le faa-matua, e masalosalo ma i'u foi i le femisa'ai ulugalii, ae o le alofa faa-le-Atua e le mafai ona mavae mo lana tagata na fai, e tusa lava po o le a e tali atu ai le tagata. E malosi lona alofa, ma e tumau ina ia ola le tagata na Ia faia.

E faapena le faamoemoe o le perofeta o Sakaria, o le faamalosiau mo tagata Iuta o e na totoe i Ierusalem faatasi ai ma i latou na toe fo'i ane i le tafeaga mai le pule malosi a le malo o Papelonia. O le valaau o le faamoemoe, ma le valoia o le manuia o Ierusalem i le lumana'i e ala i le Mesia e afio mai. I le fuaiupu e 6 o lo o manino ai ua vaeluaina le malo Isaraelu, o le aiga o Iuta, o lo o faasino i le malo i Saute, ae o le aiga o Iosefa o loo faasino i le malo i Matu, o le faamoemoe o le Atua e i ai le taimi na te toe tuu faatasia ai lona nuu. O le malosi lea o le alofa o le Atua, e le faatusaina i le alofa faaletagata, aua po o le a lava le leaga o le tagata, e le mafai ona mavae lona agalelei. O le alofa tatou te maua ai le mautinoa, e tupu ai le faamoemoe ma maua ai le leleiga o lana fanau.

**GALUEGA FAATINO:** Tusitusiga

1. Tusi mai sau solo i le autu lea ‘**Malosi o le Alofa**’
2. Tau o le 2 fuaiupu, 4 laina i le fuaiupu.

**PESE:** 138 (Pese ma Viiga)

**A’OA’OGA:**

1. E silisiliese le alofa o le Atua.
2. O le Atua e maua ai le faamoemoe fou.
3. O le alofa o le Atua e maua ai le maopopoga.

.....

**ASO SA:** 28 NOVEMA 2021

**MATAUPU:** TAMĀ NA FAAVAEINA  
(Founding fathers)

**SINI:** Ia malamalama le vasega o le Atua lava na faavaeina mea uma lava.

**TUSI FAITAU:** 2 Samuelu 22: 29 – 37

**FESOASOANI MO FAIAOGA:**

Talofa lava i le tatou vasega i lenei taeao. O le tatou mataupu ua faaulutalaina “TAMĀ NA FAAVAEINA”. O Samoa i le amataga, sa sii taua isi itumalo i isi itumalo. Na saili le pule i le toto masaa, o ona tu fo’i ma aga o ala lava o le pogisa. E tele fo’i atua faapaupau na tapua’i ma ifo i ai. Peita’i ua alofagia e le Atua nei aso, ona o tamā na faavaeina ma talia le Talalelei, lea ua sulunia ai Samoa i le malamalama e ala i le faaolataga ia Iesu Keriso.

O lo o tatou i ai i lenei vaitau i le faatalitali i le Afio mai o Iesu e ala i le Pepe o le Kerisimasi, na te aumaia le malamalama i le lalolagi, ae o le Mesia na valoia mai e Augatama o e na muai faaali i ai e le Atua lona mamalu.

O Aperaamo, Isaako ma Iakopo, o augatama ia o le nuu o Isaraelu, e mafai fo’i ona fesoota’i i ai la tatou autu “tama na faavaeina” o le tupuaga lea o le nuu na muai fofola le fala ma ta’ita’i Isaraelu i ala o le Atua, o e na osi feagaiga ma le Atua.

Peita’i tamaiti, e ese le faamamafa a Tavita, ua le o augatama o Isaraelu ae o lo o vivii Tavita i le Atua ina ua ia mautinoa o le pogai o faamanuiaga na ia maua ina. O le Atua na ia manumalo mai ai taua. O le Atua na fai ma ona talita. O le Atua na faasino ona ala, o le papa ma le olo malosi.

I le fuaiupu e 35-37, o lo o faafetai ai Tavita i le Atua, o lo o talanoa Tavita o le Atua na Ia a’oa’o ia te ia i taua. O le uiga o le vivii a Tavita i le Atua, aua o le Atua lava o le faavae o lona ola, o le amataga o lona manuia ma le pogai o faamanuiaga ua ia maua ina. E leai se iloa o ia te ia pe ana le seanoa le Atua na tapena ma amata manuia mo lana fanau faatuatua.

Mo tatou i le fanau, o a mea ua tatou maua ia lagona lo tatou loto maualalo ma faafetai i le Atua ma vivii atu ia te ia, o ia lava le amataga ma le pogai o lo tatou ola. E leai se mea e mafaia e le tagata pe ana le seanoa ma lona agalelei. O le Atua na te faavaeina mea silisili mo lo tatou ola.

Na ia faavaeina le lalolagi matagofie ma le atoatoa ina ia ola fiafia lana tagata na fai ma ia ola sa’oloto. Ae paga lea ua le usita’i le tagata, ua fia pule ma fia sili, o le ala lea o le feagai ma faigata, ua pologa ona o le ola agasala. Peita’i o le Atua fo’i ua amataina ma faavae le faaolataga sili ina ua auina mai lona Alo o Iesu e osi le taulaga o le faaolataga e ala i lona maliu ma lona toe tu manumalo. O le faaolataga ua manumalo faatasi ai ma i tatou ma saofaga uma i le ola e faavavau pe a fai tatou te faamaoni ma tutumau ia te ia.

**GALUEGA FAATINO:** Tusitusiga.

Tusi sau pese, lua fuaiupu e faaulu-talaina e “Faafetai Matua” o lagona o le pese o le agaga faafetai ona o le galuega alofa a matua na faavae mai ai lo tatou ola se ia oo mai lava i lenei taimi.

**PESE:** 92 (Pese ma Viiga)

**A’OA’OGA:**

1. Ia iloa ona faafo'i le faafetai i le Atua ona o lona alofa mai.
2. O le Atua o le faavae malosi o lo tatou ola.

.....

**ASO SA: 05 TESEMA 2021**

**MATAUPU: SA FAUSIA FAATASI (Built together)**

**SINI:** “Ia malamalama le vasega e mana'o Iesu ia galulue faatasi lana fanau faatuatua”

**TUSI FAITAU:** Efeso 2: 11 – 22

**FESOASOANI MO FAIAOGA:**

Faatalofa atu tamaiti i lenei Aso Sa, tatou i ai pea i le vaiatau o le faatalitali i le afio mai o le Pepe o le Kerisimasi o le Tupu o le au-faatuatua uma o le lalolagi. O le vaiatau fo'i o mafutaga faaleaiga, e toe mafuta ma fialia faatasi e molimauina le agaga o le Kerisimasi, e feofoa'i mea alofa o le faailoga o le nofo fealofani ma le mafuta faatasi.

E faapena se lagona o le Aposetolo o Paulo mo le ekalesia i Efeso. O le faamalosiua a Paulo ia malosi le ola faatuatua o le Ekalesia, ia lagona e tagata uma le taua o le mafuta faatasi i le ekalesia ma ia iloa o le ekalesia o le tino lea o Iesu.

E le faigofie le faatulagaina o le Ekalesia i Efeso aua e eseese talitonuga o tagata, o le au kerisiano Iutaia i lo latou fo'i talaitonuga e tusa ma a'oa'oga o le Feagaiga Tuai, faatasi ma kerisiano o nuu ese. I le faamanatu a Paulo i tagata Iutaia, o e ua mulimuli ia Iesu, na ta'u le faamamaina i latou anamua ona o le tulafono o le peritomeina, i le faamamaina i le itu i le tino. O lea fo'i tulafono na ta'ua ai tagata o nuu ese, e le o ni tagata o le Atua. Peita'i o le afio mai o Iesu ua ia faia le faaolataga sili, ua tutusa ai

tagata uma lava ina ua faamamaina lo tatou tagata tuai i lona toto paia. Ua le toe i ai se Iutaia po o se nuu ese ae ua ta'ua uma I tatou o le fanau a le Atua.

O le faamoemoe lea o le Afio mai o Iesu i le lalolagi, ina ia faia le togiola ma laveaina le lalolagi atoa i lona toto, ia le toe i ai se fevaevae a'i, ae ia mafuta faatasi lana fanau o e ua mulimuli ia te ia ma faia lona finagalo.

O le avea ai o tagata i totonu o le lio o le Ekalesia, o lona uiga ua tasi, e leai se faailoga tagata, e galulue faatasi tagata uma e auuuna ma tapua'i, e fefaasoa'i foi I manuia o le Alii. O i latou o le tino e tasi, e ui ina na eseese itu tino, e tofua fo'i ma lana e fai, peita'i e tasi lava le tino. E galulue uma fo'i itutino mo le manuia o le tino atoa. E faapena le Ekalesia a le Alii, e eseese tagata uma ma taleni ma agavaa, ae tasi lava le Ekalesia.

Mo tatou le fanau o le faamoemoe o le Aposetolo ia fealofani le Ekalesia ma galulue faatasi, e le mafai ona manuia se Ekalesia pe a fai o i ai i totonu le faamaualuga, fia sili, faamisa, ma isi tulaga faapena, ae o le Ekalesia e manuia, o le Ekalesia e galulue faatasi ma tumau i le fealofani.

**GALUEGA FAATINO:** Faatalanoaga

Ia faasoa le vasega e uiga i le mataupu, ia fesootea'i ma le autu ae o le a se feau mo tatou le fanau mo le taimi nei ma le agai atu i le avea ma tagata matua i le lumana'i. O a ni auala e mafai ona talanoaina e mafai ona fesoasoani e tineia ai le fevaevaea'i i totonu o Ekalesia.

**PESE:** E mana'o Iesu i le fealofani

**A’OA’OGA:**

1. E iloa le fanau a le Atua pe a mafuta faatasi ma fealofani.
2. E manuia le Ekalesia pe a galulue faatasi.

.....



**ASO SA:** *12 TESEMA 2021*

**MATAUPU:** *FILIFILIA MO SE FAAMOEMOE  
FAAPITOA*  
(Chosen for a special purpose)

**SINI** Ia malamalama le vasega, o le taua o i tatou o Kerisiano i le Ekalesia a Keriso, o lo tatou iloa lea ona o la vivii ia te Ia, ma faailoa atu lona finagalo paia i isi tagata.

**TUSI FAITAU:** 1 Peteru 2: 1 – 10

**FESOASOANI MO FAIAOGA:**

O le filifilia o le tagata i se tulaga taua ma se tofiga aloaia, o se valaauina lava lea mai le Atua, e galue ai i se galuega faapitoa. Ua filifilia le matai e le aiga e fai ma taitai i lona aiga. Ua filifilia le palemia ia avea ma taitai o le malo. Ua faapea foi i le faifeau mo le tausia o se aulotu. O tofiga uma nei faatasi ma isi e tele, o le faamoemoe taua lava o i ai, ia ofoina atu le ola ina ia solo lelei le feau ia valaauina i ai, ma ia maua se viiga o le Atua i le auaunaga. Ua le gata i lona, ae o se taunuuga manuia foi o tagata o agai i ai le galuega ua ofo atu ai le ola.

O lona uiga, ia le tatau i le ua filifilia, ona toe filogia i lenei valaauina nisi uiga mataga o le ola, e pei o le manatu faapitoa, agaleaga, pepelo, faamaualuga ma isi. Ia faia mea uma ma le manatua o le Atua, o le na Ia valaauina o ia i le feau. Ia tauave i le faamaoni ma le alofa itu uma o le tofiga.

O se ata faapea o faatatau i ai la tatou mataupu o lenei Aso Sa – ‘Filifilia mo se faamoemoe faapitoa.’ O se faataua ua a’oa’o ma faamanatu atu ai le Aposetolo o Peteru, i Kerisiano uma o i Asia itiiti, o e ua ta’ua o Kerisiano fou ua faatuatua, ma faasililiina ma le mautinoa, le faaolataga ua teua e le Atua i le lagi, mo e ua talitonu moni i le Maliu ma le Toetu o Iesu Keriso.

Ua faailoa manino atu e le Aposetolo, o i latou lava ua filifilia e le Atua le Tamā, i le faamoemoe e viia i lona Suafa paia, aemaise lava ia avea i latou ma e talatala atu ma faalautele atu le Tala Lelei o le Faaolataga i e o pogisa pea. Ma o le tagata ua na talia Iesu Keriso ma lana Faaolataga, ia matua tuueseina e ia uiga mataga ma vaivaiga le aoga o le olaga, e pei o le loto leaga, le faaoleole, le pepelo, le mataua ma le tautalatala i mea leaga. O sauaga foi o feagai pea ma i latou, o tofotofoga lava ia e feagai pea ma lenei ola, ma o lona taunuuga lava, o le faaolaina lea o o latou agaga, pe a alolofa moni ia Iesu Toetu. Ia paia i latou, faapei o le na filifilia i latou, e paia lava o Ia.

O le Kerisiano ua ofoina atu le ola mo le Alii, o le tagata lea ua fanaufouina ma ua ola Afioga a le Atua i lona loto, e faavavau. Ua faatusaina foi o ia i se tama meamea faatoa fanau mai. O le manaoga lava o se pepe faatoa fanau mai, ua na o le fia maua o le suasusu e fafagaina ai, ina ia maua ai lona malosi mo lona tuputupu ae maloloina. Ua faapena le tagata ua toe fanaufouina mo le Alii, e faaosofia pea lona naunau atu i le suasusu faaleagaga e le sua. Se faatupu malosi e le toe faalavelaveina e nisi mea leaga o lenei ola, lona ola fou ua ia Keriso. Tamaiti, ua tatou iloa ma le faanoanoa i o tatou aiga, nuu, ma le atunuu nisi o tagata ua lē o fanaufouina lo latou ola, pe a fua ia latou amioga ma upu ua latou tautatala ai ma faatinoga ua latou fai. O tagata tonu ia ua moomia le upu a le Atua e fafaga ai, aua ua oge faaleagaga i meaa moni e toe amata ai se olaga fou. O le soifua faafouina o le Kerisiano i le Alii, o lona ola lea ma le iloa lelei o le agalelei o le Alii, ua valaauina ai ma filifilia o ia i le faaolataga na ia saunia.

O le feau taugologolo lea a Peteru, ua tuuina atu i lana Tusi i le au Kerisiano i nuu ese, ma so o se tasi e faitau i ai. I latou ua filifili e mulimuli ia Iesu. Ua ta’u atu e le Aposetolo – O Iesu Keriso ua maliu, ae na Toetu mai lava o Ia. O Ia o le maa-ola, na Toetu, ma o lo o ola pea faatasi ma i tatou i so o se mea tatou te i ai. O tupua na fausia i maa, o mea mamate ia e leai se ola, leai se malosi leai se fesoasoani na latou maua mai ai, a o latou mua’i tapua’i i ai. Peitai le Keriso soifua ua latou filifilia, e ui ina lafoa’iina ma faatautauina i le satauro, ae na filifilia lava e le Atua, aua o Ia lava

le faaola ua alofa mai ai le Atua i le lalolagi agasala – “*Aua ua faapea lava ona alofa mai o le Atua i le lalolagi, ua Ia aumai ai lona Atalii e toatasi, ina ia le fano se tasi e faatuatua ia te Ia, a ia maua e ia le ola faavavau.*” (Ioane 3: 16)

O le mea foi lea e ao ina atiina a’e ai tagata fou ua filifili mo le faamoemoe ola ua ia Keriso Iesu. Ia malosi ma tumau le fesootaiga ma Keriso i taimi uma, ma avea ai foi latou o maa ola, ua atia’e faatasi le fale faaleagaga, le Ekalesia a Keriso. O lona uiga ia paia i latou, aua ua vavaeeseina mai i latou mai le lalolagi e auauna mo le Alii. Ua mafai foi ona taua i latou o le au ositaulaga paia, e auauna i le va o le Atua ma tagata, e fesoasoani ina ia avea tagata uma ma e ua paia mo le Alii. Ia ofo atu taulaga i le Atua ma le loto fiafia ma le faafetai, e pei ona faia e ositaulaga o le Feagaiga Tuai. O le viiga ia e faia lea ma taulaga i le Atua. (Salamo 50: 4). O taulaga foi i le Atua, o le loto momomo lea (Salamo 51: 17). O taulaga ia mo le viiga o le Atua ia le aunoa mo e ua filifilia e le Alii i lona alofa tunoa. O lo latou ola ofo atu mo le Alii, o le ola ua faatumuina e le Agaga Paia i aso fai soo o le ola. O iina foi e tosina mai ai ē, o taumamao pea ma Iesu Keriso, ina ia latou maua le fesootaiga ma le Alii.

Le fesootaiga lea ua avea ai Iesu Keriso ma maa tulimanu taua ua filifilia, e sosoo faatasi ai le au faatuatua uma, i le malumalu faavavau, e tasi ina ia mausali i taimi uma. O le atia’e i luga o Keriso le maa tulimanu o le talitonu lava lea ia te Ia, ma filifili e tofo i le faaolataga na ia faia. E le fefe pe mata’u i so o se mea o lenei lalolagi, e le fememeai foi ae vave ona tali atu i le Alii aua ua ia te Ia lona agaga i taimi uma.

O le mea lea, na tautino atu ai e le Aposetolo i tagata uma, o Kerisiano moni ua atoatoa loto i le Alii, o tupulaga lava i latou ua filifilia e le Alii e atia’e se aiga e tasi, se aiga e ese mai le lalolagi, i se isi agaga fou, se faavae ma faatinoga e ese mai le mea muamua na ola ai. O i latou ua matua o ese mai le pogisa o mea o lenei ola, e ulufale atu i le fiafia ma le malamalama o le Alii, ma ia faapea ona latou ta’uta’u le viiga ma le alofa o Keriso i isi tagata, aua ua moni le alolofa i le Atua.

Tamaiti, ua a’oa’o mai la tatou mataupu mo i tatou o lenei Aso Sa, ina ia tatou ola ma le mautinoa, e mafai e le Alii ona filifilia oe ma au e avea ma ona tagata faapitoa, po o ē pele i lona finagalo, pe afai ua tatou talia le Alii i le loto salamō ma le faatuatua, i lona alofa mai e ala i le Maliu ma le Toetu o Keriso. Pe a iu aoga ma fa’aaoga le ola i so o se feau, po o fea lava e te galue ai, poto po o le atamai, mativa ma le lē aloaia, e filifilia lava i tatou e le Atua, ina ia tatou faailoa atu lona viiga ma fai i tatou ma faataitaiga o mea lelei, i e o siomia i tatou. Le faamoemoe lena mo Kerisiano uma, ia tatou molimau atu le viiga ma le paia o le Atua aemaise se feau taua mo e ua taumamao ma le Alii.

### Uiga o Upu ma Fuaitau:

- i) tautalatalaga leaga - taulata i upu pepelo ma gagana i upu faa satani
- ii) suasusu faaleagaga e le suia- O upu mama ma a’oa’oga a le Alii, ia le filogia i nisi a’oa’oga pepelo ma upu leaga.
- iii) maa ola - Ua faatusa ia Iesu. E ui ina maliu o Ia, ae na Toetu mai lava. Ma o lo o ola (soifua) pea e oo mai nei lava.
- iv) fale faaleagaga - O le malumalu o le Atua, o lana Ekalesia lea.
- v) maa tulimanu - O Keriso le maa tulimanu. O Ia e fesootai i ai le ola o tagata uma ua talia o Ia, se ia faaolaina i lana faaolataga na fai.

**GALUEGA FAATINO:** Tusitusiga

Faailoa mai ni ou manatu taua o le a e faatinoina, pe afai e “filifilia oe e te galue i se galuega taua” i le lumanai. (tau o le afa itulau le tele)

**PESE:** Pese ma Viiga 147  
(Ia e afio mai, Lo'u Faaola e)

**A'OA'OGA:**

1. Pipii ia Iesu i taimi uma.
2. Ia fai sou aoga mo le Alii
3. A'oa'o ma fai le finagalo o Iesu.

.....

**ASO SA:** **19 TESEMA 2021**

**MATAUPU:** **TAUMASUASUA LE FAATUATUA**  
**(Leaps of Faith)**

**SINI:** Ia malamalama le vasega, e faaosofia i tatou e le Agaga o le Atua ina ia tatou talitonu i lona finagalo paia, pe afai e puna a'e pea lo tatou faatuatua i le Alii.

**TUSI FAITAU:** Luka 1: 26 – 38

**FESOASOANI MO FAIAOGA:**

Le tatou vasega i lenei taeao, pe i ai se tamaitiiti na te iloa le uiga o le upu Taumasuasua i le tatou gagana? (tuu le avanoa i nisi se toalua pe toatolu foi e tali mai). Ia lelei, o le taumasuasua, o le tumuoso ma tafe atu. E pei o se ipu ua tumu i vai ma oso i lalo ma tafe atu. Ua faapena foi lo tatou faatuatua pe afai ua tumu ma oso, ma ua taua ai 'O le faatuatua ua taumasuasua.' O lona uiga ua tele naua, auā ua faaosofia e le Agaga o le Atua le loto e talitonu, i se faamoemoe lelei ua lē vaايا e mata i le taimi nei. Peitai, mulimuli ane ua taunuu lava.

O le tatou Tusi Faitau na faitauina o le tatou mataupu i lenei Aso Sa, o lo o faatatauina lea i le feiloaiga a le Agelu o Kaperielu, ma

le Taupou e suafa ia Maria, o le aiga o Tavita, i le aai o Nasareta i Kalilaia. O Maria foi, ua faufautane o ia i le tagata e igoa ia Iosefa.

O le oo ane o le agelu ma faafesagai ma le Taupou o Maria, o lona fia faailoa atu lea ia Maria o se feau taua mai le Atua mo ia. Ua ofo alofa atu le agelu i le Taupou – "Si ou alofa ia te oe, le ua alofaina, ua ia te oe le Alii." Na atuavale ma taumanatunatu o ia i le uiga o lenei alofaaga ua ta'u atu e le agelu ia te ia. A manatu foi i lona teine talavou, o ia lava o se tagata mativa faapei o le tele o e latou te tupulaga, e le amanaia foi e le Atua e tofia i se tiute taua. Ae ui lava i lea, na faalologo pea o ia, ao faailoa mai pea e le agelu o le feau mai le Atua – "Maria e, 'aua e te fefe, aua ua alofaina mai oe e le Atua. Faauta foi, o le a to oe, ma e fanauina se tamatane, e te faaigoa ia te Ia, o Iesu." O le mea moni, e ui ina lagona lona fefe, ae o lo o tau faatulaga pea e ona lagona sana filifiliga tatau e ao ina fai. O le tele o taimi o lo tatou ola, tatou te le mautinoa po o a ni taunuuga ma ni aafiaga o le a alia'e mai ia tatou filifiliga. O nisi taimi ua tatou le mananao ia toe faapoopeo mai se isi manatu i le mea ua tatou filifili i ai. E seasea foi ona ia i tatou se lagona faapea - "O le mea na tatou filifili i ai, e mafai ona suia ai mea uma ua tatou loto i ai."

Peitai, pe afai tatou te tuuina atu o tatou loto i le Alii i lona alofa mai ia tatou filifiliga, o iina foi tatou te lagona ai se iuleo mai lona Agaga Paia ina ia taumasuasua le faatuatua. O lona uiga, ia malosi lo tatou faatuatua i le Atua na te liliuina o tatou loto i so o se mea ua manao mai ai ia i tatou. Le lagona lea o le faatuatua na tuputupu ae ia Maria, na siitia ai ona lagona i le tulaga moni, i le mea e tatau ona ia fai. O le faaosofia o ia e talia le feau mai le Alii, o le faailoga o le faatuatua ua tumu ai lona tagata lilo, ma na iloa ai i ona luma, o lo o taoto mai ai se meaalofa atoatoa ma matagofie. O se taunuuga manuia e mafai lava ona ia manino i ai, i lona faatinoga e faia e le Atua ia te ia i le lumanai. O se mea o le a matuā talitonu i ai ma fiafia i ai, auā ua na o le Atua moni e toatasi, e ana nei upu uma ua folafola atu, i le moni ma le faamaoni. O nei foi upu uma mai le Atua, na sosolo lemu atu pea

i lona loto ma pulea ai loa ona lagona i le lototele, auā ua tupu tele le faatuatua ma ia lagonaina ai lava le mea e tatau ma talafeagai.

O le mea moni, afai e laa ma agai pea i luma Maria i le mea ua folafolaina mai, e mautinoa lava, o ona sootaga ma a'a taitasi o lona tagata, o le a tuuina atu ma le alofa, inai a sosolo ma tafe atu lona manuia i le lalolagi atoa. O le logologoā lea o le faatuatua ua taumasuasua o Maria, ina ua na talia atoatoa le feau mai le Atua. E ui lava o le tamatane o le a na fanau mai, o le Alo o le Silisili ese, ae o Ia lava ua i ai le faamoemoe na te aumai le faaolataga mo le lalolagi uma. O le uiga lea o le suafa 'Iesu', o le Alii e Faaola ma Laveai. O Iesu na te lavea'i ma Faaola tagata mai le agasala, ma taitai atu i le ola faavavau. O le suafa o i ai le malosi e malolo ai ē mafatia i ma'i ma puapuaga, e tutuli ai temoni ma faamagalo ai agasala.

O le soifua mai o Iesu ia Maria le Taupou, e i ai pea nisi tagata e faigata ona malamalama i ai. Peitai, o Kerisiano ma Iutaia uma ua faatuatua ma tapuai i le Atua na faia mea uma, ua latou talitonu, ua i le Atua Soifua le malosi ma le pule na te faia ai se tamaitiiti i le toala fanau, o se Taupou. Na ta'u atu foi e le agelu ia Maria se tasi o lona aiga o Elisapeta lea na loomatua, peitai o lona onoga masina lenei, ona ia fanauina lea o se tama tane. O lona uiga e leai lava se mea e tasi e le mafaia e le Atua. E ui lava la i le maitau mai a le lalolagi le talitonu, i le feau ma lona faataunuina na aumia e le agelu, peitai na faatuatua lava Maria i le Atua. Na tupu tele ma taumasuasua lona faatuatua, aua ua le gata o le vavega ua faia e le Atua ia Elisapeta, ae ua afio le Agaga Paia i lona loto, ua afua ai lona olioli, ma ia faapea atu ai loa – "*Faauta, o a'u nei o le auuuna a le Alii, ia faia ia te a'u e tusa ma lau fetalaiga.*"

O le tautinoga a le tagata ua taumasuasua le faatuatua i le Atua, ua filifili mai i lona tagata faatauvaa, e auuuna ma fa'aaoga le ola mo lana valaau. O le faatuatua ua tumuoso ma tafe atu e ofo le ola ma le usitai faamaoni i le Atua, aua o le punāvaiola ua finagalo le Atua ia maua ai e le lalolagi uma lana faaolataga, ia Iesu Keriso lona Alo Pele, na ala mai ia Maria le Taupou.

Tamaiti, e tele nauā ni aoaoga taua e fafaga mai ai tatou mai lenei tala (1) 'Aua tatou te taofi ni tofiga ua filifili mai ai le Atua mo lou ola e fa'aaogaina. Tuu i le Atua lau filifiliga na te musuia oe i le itu e te agai i ai (2) E fa'aaoga oe e le Alii pe afai e te faatuatua ia te Ia. A faapefea ona fa'aaoga oe e le Alii, pe afai e te le o'au ma Ia i au amioga ma ou mafaufauga. (3) E mafai e le Atua ona fai se vavega mo lou ola, pe afai e te ole atu mo sana fesoasoani ma le faatuatua (4) Ia avea i tatou ma tagata usiusitai i matua, ma le Atua i taimi uma. (5) Ofo atu lou ola ia aoga mo le alii ma ana feau.

### Uiga o Upu:

- i) faufautane - faamau a se tamaitai mo se faaiipoipoga.
  - naunau ia faaiipoipoina.
- ii) alofaina - o se tagata ua alofa i ai tagata.

**GALUEGA FAATINO:** Taliga Fesili

### Tali mai i fesili nei faatatau i le Mataupu.

1. O fea e i ai le nuu o Nasareta?
2. O ai ua alofaina Maria?
3. "E afio ifo le Agaga Paia i luga ia te oe ...." O ai o faatatau i ai lea faaupuga?
4. Ta'u mai ni mea ofoofogia se lua i le Tusi Paia na faia e le Atua, i le va ma tagata?
5. Faamatala mai i ni au fuaiupu se lua, le uiga o le "Taumasuasua le Faatuatua"

**PESE:** Pese o le Kirisimasi  
"Na fanau mai o Iesu, i Peteleema"

**A’OA’OGA:**

1. Faamoemoe i le Atua ao fai sau filifiliga
2. Ofo atu lou ola mo le Alii
3. Faalogo ma talia le fesoasoani mai o le Agaga Paia.

.....

**ASO SA: 26 TESEMA 2021**

**MATAUPU: PULE AOA (Domination)**

**SINI:** Ia malamalama le vasega, o le pule ua i le tagata ola e fa’aaoga, tausia ma saga atia’e lelei ai mea uma o le foafoaga, sa faasino mai lava le Atua, le pule aoao o mea uma.

**TUSI FAITAU:** Kenese 1: 26 – 30

**FESOASOANI MO FAIAOGA:**

Mo le amataga o lenei mataupu, e fautuaina lau susuga i le faiaoga, pe mafai lava ona faatutu i luga tamaiti, pe o foi i fafo ma le fale, sei o latou vaavaai tasi lava ma le mafaufau lelei i le matagofie o le siosiomaga na aumai ma faia e le Atua mo le ola o le tagata. Mafaufau i le laueleele o tutupu ai laau. Laau ua ‘aina e tagata ma isi latou aoga i le tagata. Ia faapena foi i manulele ma manuvaefa ma le sami i tamaoaiga o i ai.

O le tatou mataupu o lenei Aso Sa – “PULE AOA – Domination.” O le pule, o le matuā i ai lea i le tagata o le aiā tatau ma le pulega faautauta lelei, e vaai ai ma faatonutonu ala talafeagai i ni mea ua tuuina atu na te vaai. E moni lava ua ia te ia le pule, ae ole pule ia soso’o faatasi pea ma le Atua foafoa, o le pule aoao i mea uma i so o se taimi.

O le saunia lelei ma le matagofie o le foafoaga i mea uma na faia e le Atua, na Ia finagalo ai lea, ia faia le tagata. Na fetalai le Atua;

*“Ina tatou faia ia o le tagata i lo tatou faatusa, ia foliga ia tatou ...”* O le fa’aaogaina o le upu **“tatou”** i le fuaiupu, o lo o saunoa ai i le numera tele (plural form) ma foliga ai e tele atua. Peitai o lo o faatatau lea i le faatasia o le Atua Tolu Tasi (Trinity) le Atua le Tamā, Iesu Keriso lona Alo ma le Agaga Paia. O Suafa Paia e tolu mo le Atua e toatasi. O lona uiga, o le Agaga o le Atua na i ai i le foafoaga (Iopu 33: 4 & Salamo 104: 30) aemaise foi lona Alo Pele (Kolose 1: 16).

O le faia la e le Atua o le tagata i lona faatusa (image) e le faapea ua tutusa ai le tagata ma Ia. O le Atua e leai sona tino tagata, ae ia atagia ia i tatou na ia faia, lona mamalu. Ia iloa iā tatou mea e fai; i o tatou mafaufau, le tautala ma a tatou faaiuga fai faatusa o le Atua. E ui lava la po o le a se maoae o so tatou lelei, e le mafai lava ona faatutusa ma lē na faia i tatou auā o Ia lava o lo tatou Foafoa silisili ma maua. Ua ia i tatou le malosi e alofa ai, e maua ai le onosai, loto faamagalo, agalelei aemaise le olaga faatuatua.

O le faasilisiliina o le tagata e le Atua i lana foafoaga paia, na ia tuuina ai ia i laua o le tane ma le fafine o le pule i mea uma. O le pule ua i ai faamanuiaga i fanau e fanafanau mai, ia uluola ma faateleina ia tumu ai le lalolagi ma faatonutonu i ai, i isi mea uma o le foafoaga. O le Atua lava o le Pule aoao i lana tausiga alofa i mea uma o le foafoaga. Ma ua ia tuuina atu nisi vaega o lana pule i le tagata, ina ia faataunuina ai e le tagata ana matafaioi tatau mo le siosiomaga ua aumai, ina ia mafai ona fefaalagolagoa’i mea o le foafoaga ua i le lalolagi ua tatou i ai. Ia tausia e le tagata ma le faautauta lelei le siosiomaga, auā o i le foafoaga le ola solo lelei o le tagata i aso taitasi. O lona uiga e le tatau ona tatou faatamala ma faatalalē e faataunuu lenei pule ua ofo mai e le Atua mo i tatou. Afai sa matuā galue le Atua e faia lenei lalolagi ma ofo mai le pule i le tagata e tausia ai, ma fai nisi mea lelei e faatumauiina ai le lelei, e le tatau foi la ona faatalalē i ai le tagata.

O le pule aoao a le Atua ua faasoa mai mo i tatou e ala i lana foafoaga, e tatau ona tatou lagona ai le fiafia ma le mimita, auā ua ia topule lona mataisau foafoa ma mea uma mo i tatou e pule ai. O i ua i ai lona famoemoe mo i tatou o tagata tausimea i lea pule

ua aumai, ina ia tatou faapea ona faia pei ona ia faanaunau mai ai, ina ia atagia ai lona faatusa i o tatou tagata. O lona uiga e tatau ona tatou tauivi ma galulue filiga, mo se olaga manuia ma tamaoaiga i le sami ma faamanuiaga o i ai. Ia galueaina le laueleele i ona fua aoga i le ola, aemaise o manu ma laau eseese. Ua faapena foi i le vanimonimo, ina ia mama mo manulelei ma tagata. Ua i le palapala foi minerale eseese ia eliina ma le faautauta mo manuia faa-le-tino o le tagata.

E tatau lava la ona tatou tausi (tend), faato'a (cultivate) ma fesoasoani i le laueleele, le sami ma le vanimonimo. E le na o lo tatou nofoa'i ma matamata i ai, peitai o le pule ua ia i tatou e faaleleia ai pei ona lelei atoatoa i le amataga. E le o le pule foi ua aumai e galueaina ai le foafoaga, e tafili saunoa ai ma tineia mea aoga na faia e le Atua. Ua tatou mautinoa foi, o faafitauli ua feagai ma isi tagata, e ono oo mai foi i lo tatou olaga pe a valetuulima le faatatau o le ola.

O i tatou o se vasega o le foafoaga paia a le Atua. O lona uiga e le tatau ona tatou faapea ifo, o i tatou o tagata lē aoga ma lē manaiaina. O le mea moni, na faia i tatou e le Atua ina ia tatou ola fesootai ma Ia auā e i ai o tatou aoga ma agavaaa e faia ai lona finagalo. O le ola alofa, loto maulalo, o le faamagalalo ma faatuatua ia te Ia ma isi fua o le agaga, o auupega ia tatou te tauivi ai e tauave le pule aoao a le Atua ua faaso mai mo i tatou. O ananafi na tatou faamanatuina ai le pule alofa a le Atua, e pei ona Afio mai Iesu lo tatou lavea'i. Ui lava e faatauva le ala na Afio mai ai, ae o lana pule tutasi na ia faatoilaloina ai le oti i lona Toetu manumalo, ua faaolaina ai i tatou tagata palapala ma le agasala. Saunia tatou e ulufale atu i lona tausaga fou ma le loto salamō moni ma faatuatua pea i lo taou Alii alofa.

**GALUEGA FAATINO:** (Faatumu avanoa)

**Filifili mai upu i le tatou Tusi Faitau, e faatumu ai avanoa:**

1. O le \_\_\_\_\_ o le Atua na ia faia le tagata.

2. Na tuuina e le Atua le \_\_\_\_\_ i tagata i mea uma o le foafoaga.
3. Sa \_\_\_\_\_ le Atua i le tane ma le fafine ina ua maea ona foafoaina.
4. Ina tatou faia ia o le tagata i lo \_\_\_\_\_ faatusa.
5. Na finagalo le Atua i le tane ma le fafine, ia \_\_\_\_\_ ma ia \_\_\_\_\_ ina ia \_\_\_\_\_ ai le lalolagi.

**PESE:** Se Pese o le Kerisimasi

**A'OA'OGA:**

1. Fa'aaoga tatau lo tatou ola mo le Alii.
2. Ua ia i tatou le alofa o le Atua e alolofa atu ai.
3. Ia faautauta i le fa'aaogaina o le foafoaga.

.....

**MANUIA LE KERISIMASI & TAUSAGA FOU**